

ESEKIEL

Esekiel ena mata-hanai

1 ¹Laḡani ihatoi-ahuina ai, hua ihahanina dinana iha-imana ai, lau na dauhai e hanohodia taudia bogaragidiai, sinavai ladana Kebara isena ai. Bena guba e parara; bena Dirava na mata hanailaia. ²Hua dinana iha-imana ai (una na King Iehoiakini dauhai ai e hanohoava laḡanina iha-imana lalonai), ³Iehova ena hereva na hahelaḡa tauna Esekiel, Busi natuna, enai e kau, Kaldea taudia edia tano ai, Kehara sinavaina isena ai. Iehova imana na ia latanai mia una gabu ai.

⁴Na roha lao, bena na itaia, lai gubana ta mirigini kahana amo ema, bona dagadaga ta, diari ese e hadiaria heḡeḡe, bona ia lalona amo lahi na e hururua lasi loulou, bona lahi bogaraginai ḡau ta, ita-itana auri labora-labora hururu-hururuna na heto. ⁵Bena bogaragina amo mauri ḡaudia hani hetomadia e hedinarai. Ita-itadia na iniheto: oromadia na taunimanima na heheto, ⁶a vairadia na hani hani amo, bona hanidia na hani hani amo. ⁷Aedia na mamaoro-mamaoro; aedia palapaladia lalodia na boromakau natuna aena palapalana lalona na heto; bona e kimore-kimore, aun laboralabora na heto. ⁸Hanidia henudiai, kahadia haniosi ai, imadia na mimia, taunimanima imadia na heheto. Hahaniosi vairadia bona anidia na iniheto: ⁹hanidia na e hekapa hekapa heheni; hahaniosi na e raka vairava, asie hegirova. ¹⁰Vairadia ita-itadia na iniheto: vaira kahadia ai ta ta vairadia na taunimanima vairadia, idibadia kahadia ai hahaniosi vairadia na leona vairadia, lauridia kahadia ai hahaniosi vairadia na boromakau mamaruanedia vairadia, bona muridia kahadia ai hahaniosi vairadia na ugava vairadia. ¹¹Vairadia na unuheto. Hanidia n;l atai ai e hetoi roro; hari mauri ḡaudia ta ta hanidia rua rua e hetoi roro, bena mauri ḡauna ta hanina na mauri ḡauna ma ta hanina ida e hekapa heheni; a hanidia rua rua ese tau-anidia e ḡovadia. ¹²Idia na ta ta e lao vaira: lauma e urava baela gabudia, unu e laova, bona laodia ai asie hegiro. ¹³Hari mauri ḡaudia bogaragidiai na ḡau ta, ita-itana na gida hururu-hururudia na heheto, eiava kede na heheto, mauri ḡaudia bogaragidiai e loa eva-evava. Lahi na mai hururu-hururuna, bona lahi

lalona amo kevaru na e kevarua isi. ¹⁴Bona hari mauri ġaudia na e tata eva-eva, kevaru na heto.

¹⁵Hari mauri ġaudia na raraidia, bena ava-keikeina na tanobada ai na itaia, mauri ġaudia ta ta ediai ta ta. ¹⁶Unu ava-keikei ita-itadia bona ikaradia dalana na iniheto: ita-itadia na krusolito^a ena kiama-kiama na heto; haniosi oromadia na heheġereġere, ikaradia dalana be e hekara ava-keikeina ta ava-keikeina ta lalonai na heto. ¹⁷E hekei laova negana ai, ena be asie hegiro to kaha haniosi ilao-henidia mai dibadia. ¹⁸Hari ava-keikei haniosi na mai isedia auridia kuborodia bona heto'o-tao auridia; bona isedia auridia kuborodia idoidiai na mata ai e honu. ¹⁹Bena mauri ġaudia e loava negadia ai hari ava-keikei na idia ida e loa hebouva; bona mauri ġaudia na tano amo e daeva negadia ai hari ava-keikei danu e dae e laova. ²⁰Lauma e urava bainela gabudia na idia danu e lao heniva, bona hari ava-keikei na idia ida ela; badina be hari mauri ġaudia laumadia na ava-keikei lalodiai. ²¹Unu na e laova negadia ai, ini danu e laova; unu na e giniva negadia ai, ini danu e giniva; bona unu na tano amo e daeva negadia ai, hari ava-keikei na idia ida e daeva; badina be hari mauri ġaudia laumadia na ava-keikei lalodiai.

²²Hari mauri ġaudia kwaradia daediai ġau ta, ita-itana na guba na heto, e hururu-hururu gabisi na heto; kwaradia daediai e heidi roro. ²³Hari guba henunai idia hahaniosi hanidia na e toi roro heheni; bona mauri ġaudia ta ta na mai hanidia rua rua, tau-anidia igovalaidia ġaudia. ²⁴E rohova negana ai, hanidia reġedia na kamoni, sinavai momo reġedia na heheto, eiava Siahu-idoinai Diravana ena guba-rahu reġena na heto, eiava tuari oreana bada-hereana heloġo-heloġona na heto. E gini negadia ai, idia ese hanidia e hakapudia. ²⁵Bena kwaradia daediai e miava gubarta daena amo gado ta ema; idia e gini negadia ai na hanidia e hakapudia.

²⁶Hari kwaradia daediai e miava gubana daenai na ġau ta, terono ta hetomana, ita-itana na sapairo^b na heto; bona hari terono hetomana ġauna daenai na ġau ta helaina ai na itaia, taunimanima oromana hetomana. ²⁷Bena ia koekoena hetomana ġauna amo e dae e laova na itaia, e hekara auri labora-labora hururu-hururuna na heto, ita-itana na lahi hekou hegeġena na heto; bona ia koekoena hetomana ġauna amo e diho e laova na itaia, ita-itana na lahi na heto, bona diari badana ese e ġeġea dae. ²⁸Medu e dihomu dinana ai kevau na ori ai e hedinaraimu na heto, hari e haheġeġea dae diarina na unuheto.

Iehova hairaina hetomana ita-itana na unuheto. Bena na itaia negana ai, lau na goru diho; bena gado ta na kamoni.

^a 1.16 Krusolito bona gabisi na nadi hururu-hururudia ladadia. ^b 1.26 Sapairo na nadi hururu-hururuna ta ladana.

Esekiel iboirina

2 ¹Bena ia ese e hamaorogu, eto, Taunimanima natuna e, a gini tore, bena baina hereva henimu. ²Ia ese e hereva henigu negana ai, Lauma ese e rohegu bona e haginigu tore, bena ma na kamoni, e hereva henigu. ³Ia ese e hamaorogu, eto, Taunimanima natuna e, Israel taudia dekedia na siaimumu, dağedage besena, lau e dağedage henigumu taudia, dekediai; idia bona tamadia ese vada e kara dika henigu ema bona hari ina dina ai. ⁴Unu taunimanima danu asie matauraigumu, bona lalodia e ha-aukadiamu; dekedia na siaimumu, ba hamaorodia, baoto “Ġaubada Iehova na ini e gwau tomamu”. ⁵Bena bema kamoni eiava basiema kamoni (badina be idia na dağedage besena), to vada bae diba peroveta tauna ta na idia bogaragidiai vada ema. ⁶Oi danu, taunimanima natuna e, idia garidia basio gari bona edia hereva basio garilaidia; ena be au ginigini bona ava ginigini na emu ai bona doadoa o helaidia taomu, to edia hereva garidia basio gari bona edia vaira-hua basio garilaia, badina be idia na dağedage besena. ⁷Egu hereva ba hamaorolaidia, bena bae kamoni eiava kamoni basie ura; badina be idia na dağedage besena.

⁸A taunimanima natuna e, na hamaorolaimumu herevana ba kamoni: oi na basio dağedage, una dağedage besena na heto; udumu a hagaia, aina henimu gauna bavania. ⁹Bena na roha lao, ima ta na itaia, e hetoi roro henigu, bona lalonai na pepa mai revarevana helokuna ta. ¹⁰Bena ia ese lau vairagu ai e hulalaia: pepa kahana kahana na mai revarevadia, unu kaha ruaosi ai herohe-ahu bona taitai bona lalo-hisihisi herevadia vada e hetore.

3 ¹Bena ia ese e hamaorogu, eto, Taunimanima natuna e, na dudui henimu gauna na bavania; ina pepa helokuna bavania, bena baola, Israel taudia ba hereva henidia.

²Taunabunai, lau ese udugu na hagaia; bena ia ese pepa na e henigu, baina ania. ³E hamaorogu, eto, Taunimanima natuna e, ina na henimumu pepana bavania, bogamu ba hakunulaia. Bena na ania; udugu ai e gaiho, bada-ranuna na heto.

⁴Bena ia ese e hamaorogu, eto, Taunimanima natuna e, Israel besena dekena baola, egu hereva na ba hamaorolaidia. ⁵Badina be idau gado aukana ta taudia dekedia asina siaimumu, a Israel besena enai; ⁶dia bese idau-idau momo, edia gado na i'idau bona a'auka besedia, ediai. Momokani, unuhetomadia ediai bama siaimu, idia ese bema kamoni henimu. ⁷A Israel besena ese basine kamoni henimu, badina be idia na asie uramu lau bae kamoni henigu. Badina be Israel taudia iboudiai na vairadia e huamu bona lalodia e ha-aukamu. ⁸A itaia, oi vairamu vada na ha-aukaia, idia edia vaira-auka davana; bona oi vairamu vada na hahuakaia, idia edia vaira-hua davana. ⁹Vairamu vada na ha-aukaia,

nadi-vasiga ena auka e hereaiamu nadina na heto; idia garidia basio gari bona edia vaira-hua basio garilaia, badina be idia na daḡedaḡe besena.

¹⁰Ma e hamaorogu, eto, Taunimanima natuna e, na herevalai henimumu herevadia iboudiai na lalomu ai bavabi dae, bona taiamu amo ba hakala henidia. ¹¹Aola, dauhai e hanohodia taudia, emu bese taudia, dekediai, bena ba hamaorodia, baoto “Ḡaubada Iehova na ini e gwau tomamu”; bena bae kamoni eiava kamoni basie ura.

¹²Bena Lauma ese e abigu isi; bona Iehova hairaina na gabuna amo e tore isi negana ai tano-laga badana reḡena na murigu kahana ai na kamoni; ¹³una na mauri ḡaudia hanidia e hetomu heheni reḡedia bona idia badibadidiai e miava ava-keikeidia reḡedia, e hekara tano-laga reḡena na heto. ¹⁴Lauma ese e abigu isi, dauha e laohaigu; laumagu siahuna iditana ai nala, badina be Iehova imana na auka, lau latagu ai. ¹⁵Bena dauhai e hanohodia taudia dekediai na kau, Telabibi ai; idia na Kebara sinavaina isena ai e nohova. Bena unuseni ai na helai, idia bogaragidiai, laumagu na e daure ela bona dina hitu e ore.

Israel igimana tauna

¹⁶Dina hitu e ore ai, Iehova ena hereva na egu ai e kau, eto, ¹⁷Taunimanima natuna e, lau ese Israel besena igimana tauna ai vada na halaomu; lau udugu herevana ta ba kamoni negadia iboudiai na lau ladagu ai do ba sisiba henidia. ¹⁸Kara dika tauna bama hamaoroa, bama toma “Oi na vada ba mase”, bena oi basioma sisiba henia, una kara dika tauna na ena dala dikana amo ihakau-sirina bona ena mauri irauana herevadia basioma sisibalai henia, una kara dika tauna na ena dika ai baine mase; a ia rarana davana na oi imamu amo baina gwauraia. ¹⁹A kara dika tauna boma sisiba henia, bena ia na ena kara dika amo eiava ena dala dikana amo basine raka siri, ia na ena dika ai baine mase; a oi ese sibomu emu mauri do ba rauaia. ²⁰Ina danu, kara maoromaoro tauna ta na ena kara maoromaolo amo bema raka siri, bena bema kara havara, bena lau ese hekwakwanai ḡauna ta ia vairanai bama atoa, ia na baine mase; oi ese to sisiba henia dainai ia na baine mase, ena kara dika bagunai, bona ena kara maoromaorodia, guna ia ese e kara ḡaudia, na basie lalodia tao; a ia rarana davana na oi imamu amo baina gwauraia. ²¹Ḡau tamona, oi ese kara maoromaoro tauna boma sisiba henia basinema kara dika, bena basine kara dika, ia na do baine mauri, badina be sisiba herevana na e abia dae; bena oi ese sibomu emu mauri do ba rauaia.

Peroveta tauna e mu

²²Unuseni ai Iehova imana na lau latagu ai mia. Bena ia ese e hamaorogu, eto, A tore isi, ba raka lasi, taora baola; unuseni ai baina

hereva henimu. ²³Taunabunai na tore isi, na raka lasi, taora nala; unuseni ai Jehova hairaina ginina ai na itaia, Kebara sinavaina isena ai na itaia hairaina hegeregerena. Bena na goru diho. ²⁴A Lauma ese e rohegu, bena ia ese e haginigu tore. Bena e hereva henigu, eto, Aola, sibomu emu ruma lalonai ba hekou ahu. ²⁵Taunimanimata natuna e, a itaia, oi na varo amo bae guimu, bena taunimanimata dekediai basio raka lasi diba. ²⁶Bena lau ese malamau na udumu atai maona ai baina hakapea dae; taunabunai vada ba mu, bena basio gwau henidia diba; badina be idia na daḡedaḡe besena. ²⁷A baina hereva henimu negana ai, udumu do baina hahaḡaia, bena ba hereva henidia, baoto “Gaubada Jehova na ini e gwau tomamnu”. Kamonai e uramu tauna na baine kamonai; bona kamonai se uramu tauna na basine kamonai; badina be idia na daḡedaḡe besena.

Ierusalem ikou-ahuna

4 ¹Taunimanimata natuna e, e tunua nadina ta bavabia, vairamu ai bavatoa diho; bena ia kopina ai Ierusalem hanuana laulauna ta ba torea: ²ituari-henina ḡaudia bona ikoulaina maguna bona tano senudia bona taruha bona vaḡoma danu laulaudia ba tore. ³Bena auri palakapalakana ta bavabia, auri maḡuna ai bainela, oi bona hanua padamui ai; bena ba raraia tao, ikou-ahuna bona ituari-henina ba ha-aukaia. Ina na toa ta, Israel besena enai.

⁴Bena ohemu laurina ai ba eno dere; bena lau ese Israel besena ena dika davana na oi latamu ai baina atoa; dina edehohodia ai ba eno dere na edia dika davadia latamu ai bae mia. ⁵Badina be dina na gwaurai henimumu, dina sinahu-toi taurahanita-ahui, idia ese edia dika davadia bae abi laḡanidia hegeregeredia; nega unudaudauna na Israel besena ena dika davana latamu ai baine mia. ⁶Unu dina ba haḡuḡurudia, bena nega iharuana ai ma ba eno dere, a ohemu idibana ai, bena Iuda iduhuna ena dika davana na latamu ai baine mia; dina hari-ahui na gwaurai henimumu, dina ta ta be laḡani ta a toadia. ⁷Bena Ierusalem ikou-ahuna ba raraia tao, mai imamu ḡaḡaena Ia; bena hanua ihadikana ba perovetalai. ⁸A itaia, lau ese varo ai baina guimu, bena basio eno hegiro diba, ela bona emu hanua ikou-ahuna dinadia ba haḡuḡurudia.

⁹Ina danu, oi ese uit, bali, bini, *lentil*, *millet*, bona rae na bavabidia, nau tamona ai ba udadia hebou, bena igabu ba kara. Bena ohemu ai ba eno dere dinadia hidaosi, dina sinahu-toi taurahanita-ahui lalodiai bavani. ¹⁰Bavania anianina metauna ba hahetohoa, sekele ruahui^c dina ta lalonai; dina ta ai nega tamona mo bavani. ¹¹Ba inua ranuna danu ba hahetohoa, ranu hini ta ba karoaia, karoa tauratoi, bena karoa^d tamona

^c 4.10 Sekele ruahui = 327 grams sisivana. ^d 4.11 Hini ta bae karoaia, karoa tauratoi, bena karoa ta = 1 litre sisivana.

ba inua; dina ta ai nega tamona mo ranu ba inu. ¹²Bavania, bali atagana na heto, idia vairadiai ba gabua, taunimanima taġedia kakorodia lahina latanai. ¹³Bena Iehova na e tomu, Israel taudia adia aniani mirodia unu bae ani toma, ediai baina luludia lao besedia bogaragidiai.

¹⁴Bena lau nato, Ġaubada Iehova e, a itaia, lau na sibogu asina hahemiro; merogu negana amo ema bona hari ina nega sibona e mase kava ġauna ta eiava uda boromadia ese e darea ġauna ta asina ania, bona vamu bodagana taina na nega ta ai udugu ai se vareai.

¹⁵Bena ia ese e hamaorogu, eto, A itaia, na gwau maoromu, amu ataga na taunimanima taġena kakorona lahina latanai basio gabua, a boromakau taġena kakorona lahina latanai ba gabua. ¹⁶Ma e hamaorogu, eto, Taunimanima natuna e, a itaia, Ierusalem ai mauri anianina na baina abia oho; aniani metauna bae hahetohoa guna bena bae ania mai garidia ida; bona ranu na bae hahetohoa guna, bena bae inua mai kudou-hetahadia ida. ¹⁷Unu baina kara toma, bena aniani ai bona ranu ai bae dabu, bae heroaha heheni mai kudou-hetahadia ida, bona edia dika davadia daidiai taudia bae varoda.

5 ¹Taunimanima natuna e, dare ganona ta bavabia, kwaramu inauna ġauna ai ba halaoa, kwaramu ba naua bona aukimu huina bavabia; bena metau ihahetohona ġauna bavabia, hui ba karoa, karoa toi. ²Bena karoa toiosi amo karoa ta na lahi ai ba gabua, hanua bogaraginai, hanua idai-ahuna baine ore negana ai; ma karoa ta bavabia, dare amo ba tara utu-utu, hanua heġeġemadai ai; ma karoa ta na lai ai ba ġigia oda-oda; bena unu muridiai lau ese dare na pauana lalona amo baina veria lasi. ³Bona unu amo danu hui haida bavabi, emu dabua gevena ai ba turidia. ⁴Ma unu haida danu bavabi, lahi ai ba tahodia kau, ba gabudia; bena unu amo lahi ta baine lasi Israel besena idoinai enai.

⁵Ġaubada Iehova na ini e gwau tomamu: Ierusalem binai, bese idau- idau bogaragidiai vada na atoa, tano idau-idau ese e ġeġea daemu. ⁶A ia ese bese idau-idau vada e hereadia egu hahedua herevadia iutudia ai, bona heġeġemadai tanodia vada e hereadia egu taravatu itata-utudia ai; egu hahedua herevadia vada e dadaraidia, bona egu taravatu daladia ai asie raka. ⁷Taunabunai Ġaubada Iehova na ini e gwau tomamu: Badina be umui ese e gegemui ahumu besedia na o herediamu, heloġo ahuahui ai, bona egu taravatu daladia ai asio raka bona egu hahedua herevadia asio badinadia, a e gegemui ahumu besedia edia hahedua herevadia, vada o badinadia; ⁸una dainai (Ġaubada Iehova na ini e gwau tomamu) a itaia, lau ese na inai henimuimu, bona hahemaoro karadia baina kara umui bogaragimui ai, bese idau-idau vairadiai. ⁹Bona emui kara dika-rohorohodia iboudiaidai daidiai lau ese nega gunana ta ai asina karaia bona nega gabena ta ai basina karaia lou karana ta baina kara henimui. ¹⁰Taunabunai, umui bogaragimui ai tama ese natudia bae anidia,

bona memero ese tamadia bae anidia; bona lau ese baina hahemaoro henimui, bona hahidaosi ba roho mauri na lai kahadia iboudiai baina gigimui rohoroho. ¹¹Ġaubada Iehova na e tomu, Taunabunai na maurimu hegeregerena, umui ese egu gabu helaġana na emui ġau dika-hereadia bona emui kara dikarohorohodia amo vada o hamiroa dainai, momokani lau ese baina negemui daure; basina hageremui bona basina bogamui hisi. ¹²Emui ore a lalona amo kaha ta be dai-hanai gorereana amo bae mase bona doe amo bae ore bogaragimui ai; ma kaha ta na dare amo bae mase emui ore hegegemadai ai; ma kaha ihatoina na lau ese lai kahadia iboudiai baina ġiġidia rohoroho; bona idia muridiai dare na pauana amo baina veria lasi.

¹³Unu amo egu badu baine ore; egu badu ġaraġarana amo baina kara henidia ela bona lalogu baine keru. Bena idia na bae diba lau Iehova na egu vageġe ai vada na hereva, egu badu garagarana na latadiai baina ha-orea negana ai. ¹⁴Ina danu: lau ese baina hadoemui, bona hesivarai ġauna ai baina halaomui, e ġeġemui ahumu besedia bogaragidiai bona raka-hanai taudia iboudiai vairadiai. ¹⁵Umui na hesivarai bona heġonaġonalai bona sisiba bona hahegari ġauna ai baola, e ġeġemui ahumu besedia ediai, lau ese baina hahemaoro henimui mai badugu bona mai lalo-siahugu bona mai headadaba aukadia ida negana ai. Lau Iehova vada na hereva. ¹⁶Una negana ai egu doe dibadia amo baina tarakimui mamase, hahebua-tari dibadia, umui ihabua-tarimui totona baina kinodia; doe na baina habadaia loulou emui ai, emui mauri anianina na baina abia oho. ¹⁷Lau ese doe bona uda boromadia baina siaidia vasi, umui ihadikamui totona; idia ese natumui na emui amo bae dadidia oho; dai-hanai gorereana bona rara ese bae daemui, bena dare na latamui ai baina siaia. Lau Iehova vada na hereva.

Peroveta herevadia Israel ororodia latadiai

6 ¹Iehova ena hereva na egu ai e kau, eto ²Taunimanima natuna e, Israel ororodia ba raraidia tao, latadiai ba peroveta, ³baoto, Israel ororodia e, Gaubada Iehova ena hereva a kamoni! Gaubada Iehova ese ororo badadia bona maraġidia, koura dobudobudia bona koura-koura na ini e gwau henidia tomamu: A itaia, lau ese dare na latamui ai baina hadihoa, bona emui atai gabudia helaġadia baina habuadia tari. ⁴Emui ihaboulaina patadia bae vahu, emui muramura mai bonadia patadia bae heġiġi dobi, emui mase taudia na emui kaivakuku vairadiai baina tahodia dobi. ⁵Israel taudia na masedia ai baina hahekidadia diho, edia kaivakuku vairadiai; bona turiamui baina ġiġidia rohoroho, emui ihaboulaina patadia hegegemadai ai. ⁶Emui noho gabudia iboudiai lalodiai emui hanua bae vahu bona emui atai gabudia helaġadia bae heġiġi dobi; emui ih-aboulaina paladia bae vahu bona bae heġiġi dobi; emui kaivakuku bae makohi bona

bae hebua tari; emui muramura mai bonadia patadia bae heḡiḡi dobi bona emui ḡaukara anidia bae boio. ⁷E aldiamu taudia na bogaragimui ai bae hekida diho; bena ba diba lau na Iehova.

⁸A umui haida na maurimui ai baina rakatanimui. Dare amo bae roho mauri taudia haida na bese idau-idau bogaragidiai bae noho, bona tano idau-idau ai ba karohe rohoroho negana ai, ⁹umui roho-mauri taumui hahidaosi ese lau ba lalogu tao, iguimui ai bae laohaimui besedia bogaragidiai. Bona mai lebulebudia ida vada e rakatangu taudia na lalodia baina gugubadia, bona mai lebulebudia ida edia kaivakuku e gavdiamu taudia na matadia baina hakepuludia negana ai, idia na sibodia bae hedadarai, edia kara havara bona edia kara dika-rohorohodia iboudiai daidiai. ¹⁰Bena idia na bae diba lau na Iehova; ini baina karadia toma nato negana ai na asina hereva kava.

¹¹Ḡaubada Iehova na ini e gwau tomamu: Imamui ba pata bona aemui ba pana dagu, baoto, Madi ihabaida! Israel besena ena kara dika-rohorohodia iboudiai daidiai; badina be dare bona doe bona dai-hanai gorereña amo bae mase. ¹²Gabu daudau ai e nohomu tauna na dai-hanai gorereña amo baine mase; bona gabu kahikahina ai e nohomu tauna na dare amo baine mase; bona do noho maurina tauna na doe amo baine mase. Unuhetomana egu badu-ḡaraḡara baina ha-orea idia latadiai. ¹³Bena edia mase taudia na edia kaivakuku bogaragidiai bae hekida diho, edia ihaboulaina patadia heḡeḡemadai ai, bona ororo latalatadia iboudiai latadiai, bona ororo badadia iboudiai doridia ai, bona au mauridia iboudiai bona oak audia urumo-urumodia iboudiai henudia, muramura mai bonadia edia kaivakuku e gabu henidia gabudia iboudiai lalodiai; una negana ai ba diba, lau na Iehova. ¹⁴Lau ese imagu baina toia roro, idia ihadikadia totona, tano baina habuaia tari bona baina havahua, edia noho gabudia iboudiai lalodiai, tano ḡaḡaena amo ela bona Ribla. Bena bae diba lau na Iehova.

Nega dokona

7 ¹Iehova ena hereva na egu ai e kau, eto, ²Taunimanima natuna e, Ḡaubada Iehova ese Israel tanona na ini e hamaorolaia tomamu: Dokona binai! Dokona vada e kau, tano daigunina haniosi latadiai. ³Harihari dokona na oi latamu ai vada e kau, egu badu na oiemu ai baina hulalaia, bona emu kara heḡereḡeredia ai baina hahemaoro henimu, emu kara dika-rohorohodia iboudiai davadia do baina henimu. ⁴Lau ese basina hageremu bona basina bogamu hisi; a emu kara davadia baina henimu, emu kara dika-rohorohodia na doini bogaragimu ai mimia negana ai. Bena ba diba, lau na Iehova.

⁵Ḡaubada Iehova na ini e gwau tomamu: Dikadika ta murinai na dikadika ma ta! A itaia, ia na vada e maimu. ⁶Dokona vada e kau,

dokona korikori vada e kau; anina na emu ai vada hedinarai. A itaia, ia na e maimu!

⁷Tano inoholaina taumu e, emu ai baine kau ġauna vada e kau; negana vada eme kau; heloġo-ahuahu dinana vada eme kahikahi, dia moale lolodia dinana ororo latadiai. ⁸Asi vanahana egu badu ġaraġara na latamu ai baina bubua, egu badu na emu ai baina ha-orea, bona emu kara heġereġeredia ai baina hahemaoro henimu; bena emu kara dika-rohorohodia iboudiai davadia baina henimu. ⁹Basina hageremu bona basina bogamu hisi; emu kara davadia baina henimu, emu kara dika-rohorohodia na doini bogaragimu ai mimia negana ai. Bena ba diba, lau na Iehova, herahu-mase Diravana.

¹⁰A itaia, dinana binai! A itaia, ia na e maimu! Emu ai baine kau ġauna na vada e kau; kara gageva-gageva vada e papa, hekokoroku vada e gara kau; ¹¹daġedaġe vada e tubu, kara dika vada e tubu kau. Idia ta basine noho; edia kohu-momo bona edia taġa basie mia; bona idia bogaragidiai ta basine herea. ¹²Negana vada e kau, dinana vada eme kahikahi. E hoihoimu tauna basine moale, bona kohu e hoihoilaimu tauna lalona basine hisihisi, badina be badu ġaraġara na edia-hotuhotu iboudiai latadiai. ¹³Badina be kohu e hoihoilaimu tauna ese e hoilaia kohuna basine lou henia, edia mauri dinadia iboudiai. Badina be badu ġaraġara na edia hotuhotu iboudiai latadiai, bona basine heabi oho. Ena kara havara dainai tau ta ese sibona ena mauri basine rauaia diba.

¹⁴Kibi vada e hiriria, ġau iboudiai vada e hegaegaelai; a ta na tuari se laomu, badina be egu badu na edia hotuhotu iboudiai latadiai.

¹⁵Murimuri ai na dare; laloma ai na dai-hanai gorereña bona doe. Tano paka ai e nohomu tauna na dare ai e masemu; hanua ai e nohomu tauna na doe bona dai-hanai gorereña ese e hamaseamu. ¹⁶Haida bema roho mauri, idia na ororo ai bema noho, koura punedia na heheto; iboudiai na bae ġanaġana, ta ta ena kara havara ena kara havara daidiai. ¹⁷Ima iboudiai na e mamanomu; tui iboudiai na e heroġe-herogemu, ranu na heto. ¹⁸Puse dabuadia e riomu, gari ese e hahonudiamu; iboudiai vairadia e hemaraimu, iboudiai kwaradia e naudiamu. ¹⁹Edia *silver* na ariara ai e negeamu, bona edia *gold* na ġau mirona na heto. Iehova ena badu-ġaraġara dinana ai, edia *silver* bona edia *gold* ese basie hamauridia diba; edia hitolo basie ha-orelai diba, bona bogadia basie hakunulai diba. Badina be una na ihahekwakwanailaidia ġauna edia kara havara ai. ²⁰Edia herahera mai hairaidia e heagilai, bona edia kaivakuku dika-rohorohodia bona edia ġau dika-hereadia na unu amo e karadia; taunabunai lau ese ġau mirona ai baina halaoa idia ediai. ²¹Lau ese idau taudia imadia ai baina atoa, idia damudia ai bainela, bona tanobada ena taunimanima dikadia baina henidia, idia dinadia ai bainela; bena idia ese bae hamiroa. ²²Bena idia edia amo baina mede daudau, egu gabu ġoeva-

daena na bae hamiroa totona; dadidadi taudia ese ia lalonai bae raka vareai, bae hamiroa, ²³bona bae havahua.

Badina be tano na rara-hebubu kara dikadia ai e honumu, bona hanua na ala-ala ai e honumu. ²⁴Bese dika-hereadia baina mailaidia, edia ruma bae ġaunaidia; edia goada, e heaġilaiamu ġauna, baina ha-orea; edia gabu helaġadia bae hamirodia. ²⁵Lalo-hisihisi bada baine kau negana ai, idia ese maino bae tahua, to basie davaria. ²⁶Dikadika na dikadika latanai e kaumu; hari lahulahuna ta na hari lahulahuna ta murinai e maimu. Mata-hanai na peroveta tauna enai e tahuamu; a taratvatu na hahelaġa tauna enai e boiomu, bona hahealo na hanua tau-badadia ediai e oremu. ²⁷Hanua pavapavana e taitaimu; hanua lohiana darana e dokomu; bona tano taudia imadia na e hedabarai, gari dainai. Idia edia kara heġereġerena ai baina kara henidia, bona idia edia hanemaoro herevadia heġereġeredia ai baina hahemaoro henidia; bena bae diba, lau na Iehova.

Ierusalem ena kara dika-rohorohodia

8 ¹Laġani ihatauratoina huana ihatauratoina dinana iha-imana lalonai, lau ese egu ruma ai na helaiva; bena Iuda tau-badadia na lau vairagu ai e helaiva ai na Ġaubada Iehova ese imana na lau latagu ai e ato kau. ²Bena na roha isi, ġau ta na itaia, ita-itana taunimanima na heto; ia koekoena hetomana ġauna henunai na lahi, bona koekoena daenai na diari-diari hetomana, auri laboralabora hurwu-hururuna na heto. ³Ima hetomana ġauna ta e toia lasi, doborāġigu ai e abigu; bena Lauma ese e abigu isi, tanobada bona guba padadiai, bena Dirava imatahanailaina ai Ierusalem e laohaigu, ela bona laloma maguna ikoukouna raka-vareaina, mirigini kahana e vaira henia ġauna; unuseni ai vaġeġe kaivakukuna, vaġeġe e havaraiamu ġauna, ena gini gabuna e miava. ⁴Na itaia danu, Israel Diravana hairaina na unuseni ai, taora ai mata-hanai ai na itaia heġereġerena.

⁵Bena ia ese e hamaorogu, eto, Taunimanima natuna e, a gaga isi, mirigini kahana ba roha henia. Bena na gaga isi, mirigini kahana na roha henia, na itaia, ihaboulaina patana ikoukouna mirigini kahana ai, raka-vareaina ai, hari vaġeġe kaivakukuna na mia. ⁶Bena ia ese ma e hamaorogu, eto, Taunimanima natuna e, idia na ede e kara tomamu o itaiamu a? Kara dika-rohoroho bada-hereadia, Israel besena ese egu gabu helaġana amo bae lulugu oho helaoreana ai e karamu ġaudia, o itadiamu a? A kara dikarohorohodia haida, ini kara e herediamu ġaudia, na do ba itadia.

⁷Bena ma e laohaigu, maġu ikoukouna badibadinai, bena na gaga isi, mauru ta magu ai na itaia. ⁸Bena ia ese e hamaorogu, eto, Taunimanima natuna e, maġu ba hamaurua. Magu na hamaurua, bena iduara ta na

itaia. ⁹Bena ia ese e hamaorogu, eto, A raka vareai, kara dika-rohoroho badahereadia unuseni ai e karamu na ba itadia. ¹⁰Bena na raka vareai, na roharoha; unuseni ai e raumu ġaudia idau-idau bona boroma dika-rohoroho-lia bona Israel taudia edia kaivakuku iboudiai laulaudia na haba ai vada e tore. ¹¹Unu laulau vairadialai Israel tau-badadia hitu-ahui e gini, bona Iaasania Safana na bogaragidialai e gini. Idia ta ta mai edia gida keberedia imadia ai, bona muramura mai bonana, e gabua ġauna, kwalahuna e daeva, ori na heto. ¹²Bena ia ese e hamaorogu, eto, Taunimanima natuna e, Israel tau-badadia na dibura ai ede e kara tomamu, ta ta ena laulau daiutuna ena laulau daiutuna lalodialai, vada o itaia a? Badina be idia na e tomu “Iehova ese se itadamu; Iehova ese tano vada e rakatania”. ¹³Ia ese ma e hamaorogu, eto, Kara dika-rohorohodia haida, ini kara e hereadiamu ġaudia, idia ese e karamu na do ba itadia.

¹⁴Bena ia ese Iehova ena dubu mirigini kahana ikoukouna raka-vareaina e laohaigu; unuseni ai hahine haida na itadia, e helaiva, Tamusu^e taina e taiva. ¹⁵Bena ia ese e hamaorogu, eto, Taunimanima natuna e, ina na vada o itaia a? Kara dika-rohorohodia haida, ini kara e hereadiamu ġaudia, na do ba itadia.

¹⁶Bena ia ese Iehova ena dubu ena laloma maġuna lalonai e laohaigu. Iehova ena dubu helaġana vairanai, dehe toi-lasi rumana bona ihaboulaina patana padadialai, taunimanima ruahui-ima sisivana e gini; Iehova ena dubu helaġana e muri henia bona mairiveina kahana e vaira henia, dina e toma henia dihova mairiveina italaina ai. ¹⁷Bena ia ese e hamaorogu, eto Taunimanima natuna e, ina na vada o itaia a? Iuda besena taudia ese hari kara dika-rohorohodia iniseni ai e karamu na ġau pipikina a, una dainai idia ese tano na daġedaġe amo e hahonuamu, bona e habadugu hereamu? A itaia, idia ese ududia mukurodia e kara. ¹⁸Taunabunai, lau ese badu ġaraġara karadia baina kara; basina haġeredia bona basina bogadia hisi; ena be taiagu ai bae tai mai gao badadia ida, to basina kamona henidia.

Kara dika taudia iala-masedia

9 ¹Bena ia ese taiagu ai e lolo, mai gao badana ida, eto, Hanua ihabua-tarina taumui e, a raka kahira, ta ta mai emui ala-ala ġaudia imamui ai. ²Bena na itaia, tatau tauratoi na atai ikoukouna, mirigini kahana e vaira heniamu ġauna, kahana amo ema, ta ta mai edia ala-ala ġaudia imadia ai. Ma tau ta danu idia ida ema; ia na dabua aukana e hahedokilaia, toretore ġaudia vainana danu e daharaia. Bena idia na e

^e 8.14 Tamusu na bese gunadia haida edia dirava; e laloe ia na laġani ta ta amo keru negana ai e mase bena siahu negana ai ma e mauri lou, edia taitai bona edia ġuriġuri daidai.

raka vareai, ihaboulaina patana, auri labora-labora ġauna, badibadinai e gini.

³Una negana ai Israel Diravana hairaina na kerubi daedia, vaia e miava gabuna, amo e dae, dubu raka-vareaina e lao henia; bena ia ese hari dabua aukana e hahedokilaia bona toretore ġaudia vainana e daharaia tauna na e boi henia. ⁴Iehova ese e hamaoraa, eto, Ierusalem hanuana ba rakaia hanai, kara dika-rohorohodia iboudiai, hanua lalonai e karamu, na e taitailaidiamu bona e ġanaġanalaidiamu taudia bagudia ai toa ba kara. ⁵Bena na kamoni, ia ese unu haida e hamaorodia, eto, Ia murinai hanua ba rakaia hanai, bavala-ala; basio haġeredia bona basio bogadia hisi; ⁶iahu bavaladia mase, bona uhau, ulato, memero, kekeni, bona hahine danu; a baguna mai toana tauna ta basio daua toho. Egu gabu helaġana amo ba matamaia. Taunabunai idia ese unu hanua tau-badadia dubu vairanai nohodia ediai e matamaia.

⁷Bena ia ese ma e hamaorodia, eto, Dubu ba hamiroa, bona maġudia na mase tau-anidia amo ba hahonudia. A raka lasi! Taunabunai, idia na e raka lasi, hanua na e daea. ⁸Idia e daea negana ai, lau na sibogu na nohova, bena na goru diho, na tai, nato, Ġaubada Iehova e, emu badu ġaraġara Ierusalem latanai iseina ai na Israel orena idoinai ba habuadia tari a?

⁹Bena ia ese e hamaorogu, eto, Israel bona Iuda besedia edia kerere na bada herea; tano na rara ai e honumu, bona hanua na hahemaoro karadia gageva-gagevadia ai e honumu. Badina be idia na e tomu “Iehova ese tano vada e rakatania; Iehova na se heitamu”. ¹⁰A lau be basina haġeredia bona basina bogadia hisi, a edia kara heġereġeredia ai na tubuadia ai baina kara.

¹¹Bena hari dabua aukana e hahedokilaia bona toretore ġaudia vainana e daharaia tauna ese hereva ma e loulaia, eto, O haġanilaigu heġereġerena ai vada na karaia.

Iehova hairaina ese ena dubu e rakatania

10 ¹Bena na roha lao, na itaia, kerubi daediai, unu kerubi daedia gubana ai, ġau ta e hedinarai, sapairo^f nadina na heto, oromana na terono ta hetomana. ²Bena ia ese hari dabua aukana e hahedokilaia tauna e hamaoraa, eto, Hari e hegiro-hegiromu ava-keikeidia bogaragidiai baola, kerubi henudiai, imamu ruaosi na gida hururu-hururudia amo ba hahonudia, kerubi bogaragidiai; bena hanua latanai ba petadia rohoroho.

Bena ia na lau vairagu ai e raka vareai. ³Hari kerubi na dubu diho kahana ai e giniva, una tau e raka vareai negana ai; bona ori ta ese

^f 10.1 Sapairo na herahera nadina ta ladana.

laloma maḡuna e hahonuava. ⁴Bena Iehova hairaina na kerubi edia amo e dae lao, dubu raka-vareaina e lao henia; ori ese dubu e hahonua, bona Iehova hauaina diaridiarina ese maḡu e hahonua. ⁵Kerubi hanidia hudia na murimuri maḡuna ai e kamona; unu hu na Sياهو-idoinai Diravana gadona, e herevamu negadia ai, na heto.

⁶Bena ia ese hari dabua aukana e hahedokilaia tauna e hagiania eto “Lahi na e hegiro-hegiromu ava-keikeidia padadia amo bavabia, kerubi bogaragidiai” negana ai, ia na ela, ava-keikei ta badibadinai e gini. ⁷Bena kerubi ta ese imana e toia roro, hari kerubi bogaragidiai e arava lahina amo gida e abi, una dabua aukana e hahedokilaia tauna imana ai e ato; bena una tau ese e abi, e raka lasi. ⁸Hari kerubi hanidia henudia na ḡau ta, ita-itana na taunimanima imana hetomana.

⁹Bena na roha lao, ava-keikei hani na itadia unu kerubi badibadidiai; ava-keikei ta ta kerubi ta ta badibadidiai. Hari ava-keikei ita-itadia na krusolito⁸ nadidia kiama-hamadia na heheto. ¹⁰Haniosi ita-itadia na heḡereḡere; oromadia na tamona, ava-keikei ta ava-keikei ta lalonai na heto. ¹¹E hekei laova negana ai, ena be asie hegiro to kaha haniosi ilao-henidia mai dibadia, a edena kaha ai vaira ava-keikeina ese e vaira henia, murina kahana ḡaudia na ia murina ela, bona laodia ai asie hegiro. ¹²Isedia auridia kuborodia bona ito'o-tao auridia bona ava-keikei na mata ai e honu, kerubi hahaniosi ava-keikeidia bunu. ¹³Na kamona, unu ava-keikei na e gwauraidia “E hegiro-hegiromu ava-keikeidia”. ¹⁴Idia ta ta vairadia na hani: vaira gini-gunana na kerubi vairana; vaira iharuana na tau vairana; vaira ihatoina na leona vairana, bona vaira ihanina na ugava vairana.

¹⁵Hari kerubi na e dae ela; idia na unu mauri ḡaudia, Kebara sinavaina isena ai na itadia ḡaudia. ¹⁶Bena kerubi e laova negadia ai na hari ava-keikei danu idia badibadidiai e laova; bena kerubi ese hanidia e idi roro, tano amo bae roho isi totona, negadia ai, hari ava-keikei na idia badibadidia amo asie hekei oho. ¹⁷Idia na e gini negadia ai, unu danu e gini; bona idia na e dae negadia ai, unu danu e dae; badina be unu mauri ḡaudia laumadia na idia lalodiai.

¹⁸Bena Iehova hairaina na dubu raka-vareaina amo e raka lasi, kerubi daediai e miava. ¹⁹Bena kerubi ese hanidia e idi roro bona raka lasidia ai tanobada amo e dae ela, lau vairagu ai; bona ava-keikeidia na idia badibadidiai. Bena idia na Iehova ena dubu mairiveina kahana ikoukouna iduarana enai e gini; bona Israel Diravana hairaina na idia daediai.

²⁰Unu mauri ḡaudia Israel Diravana henunai na itadia ḡaudia, Kebara sinavaina isena ai; bena na diba idia na kerubi. ²¹Idia ta ta vairadia na hani hani amo, bona hanidia danu na hani hani amo, bona hanidia

⁸ 10.9 Krusolito na herahera nadina ta ladana.

henudiai na ġau haida, ita-itadia na taunimanima imadia hetomadia. ²²Vairadia ita-itadia na Kebara sinavaina isena ai na itadia ġaudia vairadia ita-itadia heġereġeredia. Idia na ta ta e lao vaira.

Israel lohiadia igwau-henidia

11 ¹Bena Lauma ese e haheabigu isi, Iehova ena dubu mairiveina kahana ikoukouna, mairiveina kahana e vaira henia ġauna, e laohaigu. Hari ikoukou iduarana ai tatau ruahui-ima na itadia, bona idia bogaragidiai laasania Asuru bona Pelatia Benaia, bese lohiadia, na itadia. ²Bena ia ese e hamaorogu, eto, Taunimanima natuna e, kara havara e lalo hatamu, bena hahealo herevadia dikadia ina hanua lalonai taunimanima e hamaorolaidiamu taudia bini. ³Idia na e tomu, Ruma ihaginidia negana na do se kahikahi; ina hanua na vamu inadulaina urona, bona vamu na ita. ⁴Taunabunai, idia latadiai ba peroveta; taunimanimanatuna e, ba peroveta.

⁵Bena Iehova ena Lauma ese e rohegu; bena ia ese e hamaorogu, eto, A hereva, agowa, Iehova ini e gwau tomamu: Israel besena e, umui na ene o laloa tomamu; badina be lalo-hadai dahaka dahaka lalomui ai e varamu na dibagu. ⁶Emui mase taudia vada o hahutumadia ina hanua ai, bona ariarana na vada e aladia taudia ai vada o hahonudia. ⁷Taunabunai, Ġaubada Iehova na ini e gwau tomamu: Emui mase taudia, hanua bogaraginai vada o atodia, idia na vamu, bona ina hanua na inadulaidia urona; a umui na bogaragina amo bae hakaumui lasi.

⁸Ġaubada Iehova na e tomu, Dare garina vada o gari; bena lau ese dare na latamui ai baine mailaia. ⁹Ia bogaragina amo baina hakaumui lasi, bona idau taudia imadia ai baina atomui, bona hahemaoro karadia baina kara henimui. ¹⁰Dare ese baine alamui, bona lau ese Israel tanona hetoana ai baina hahemaoro henimui; bena ba diba lau na Iehova. ¹¹Ina hanua na emui uro ai basinela, bona umui na vamu ai basiola ia lalonai. Israel tanona hetoana ai baina hahemaoro henimui, ¹²beno ba diba lau na Iehova; badina be egu taravatu daladia ai asio raka, bona egu hahedua herevadia asio badinadia, a e ġeġemui dae besedia edia hahedua herevadia heġereġeredia ai vada o kara.

¹³Bena lau na perovetava lalonai Pelatia Benaia e mase. Bena na goru diho, na lolo badabada, nato, Ġaubada Iehova e, Israel kwabukwabudia ba ha-oredia vaitani a?

Nega matamatana do bainema

¹⁴Iehova ena hereva na egu ai e kau, eto: ¹⁵Taunimanima natuna e, tadikakamu, tadikakamu korikori, oi ida gabu daudau ai vada e hanohodia taudia, Israel besena idoinai, ena taunimanima iboudiai, na Ierusalem inoholaina taudia ese vada e herevalaidia, eto, Idia ese Iehova

vada e rakatania, dauha vada ela; ina tano na ita vada e henida, baita ġaunaia totona. ¹⁶Taunabunai oi na baoto, Ġaubada Iehova na ini e gwau tomamu: Ena be dauha na laohaidia, bese idau-idau bogaragidiai, ena be tano idau-idau lalodiai na hakarohodia rohoroho, to vada ela tanodia lalodiai lau na edia gabu helaġana ina nega hekada hanai. ¹⁷Taunabunai baoto, Ġaubada Iehova na ini e gwau tomamu: Bese idau-idau bogaragidia, amo baina hahegogomui, bona tano idau-idau, lalodiai vada e hakarohomui tanodia, amo baina haheboumui, Israel tanona na baina henimui. ¹⁸Bena unu baela negana ai, idia ese ġau dika-hereadia iboudiai bona ena kara dika-rohorohodia iboudiai na iena amo bae abidia oho. ¹⁹Bena lalodia na baina hatamonadia, bona lauma matamatana na idia lalodiai baina atoa; lalo-auka na idia lalodia amo baina abia oho, Ialo-manada baina henidia. ²⁰Bena egu taravatu daladia ai bae raka bona egu hahedua herevadia bae badinadia bona karadia bae kara, idia na lauegu bese taudia ai baela, bona lau na edia Dirava ai bainala. ²¹A lalodia ese edia ġau dika-hereadia bona edia kara dika-rohorohodia e ura henidiamu taudia be lau ese edia kara davadia na tubuadia ai baina haloudia. Ġaubada Iehova na e herevamu.

²²Bena kerubi ese hanidia e idi roro, mai ava-keikeidia idia badibadidiai, bona Israel Diravana hairaina na idia daediai. ²³Bena Iehova hairaina na hanua bogaragina amo e dae, hanua mairiveina kahana ororona ai e miava. ²⁴Bena Lauma ese e haheabigu isi, bona Dirava ena Lauma mata-hanaina lalonai Kaldea e laohaigu, unuseni ai vada e hanohodia taudia dekediai. Bena hari mata-hanai, na itaia ġauna, ese e rakatanigu. ²⁵Bena Iehova ese vada e haheitalaigu ġaudia iboudiai na lau ese unuseni ai vada e hanohodia taudia na hamaorolaidia.

Esekiel ese Israel iabi-mauridia e haheġereġerea

12 ¹Iehova ena hereva na egu ai e kau, eto: ²Taunimanima natuna e, oi ese gwau-edeede besena bogaraginai o nohomu. Idia na mai matadia, ġau bema ita, to ġau ta asie itaiamu, bona mai taiadia, hereva bema kamoni, to hereva ta asie kamonaimu; ³badina be idia na gwauedeede besena. Taunabunai, taunimanima natuna e, dauhai bae hanohoa tauna ena laolao kohuna heġereġerena ai bavabia heġaeġae, bona dina ai dauhai bae hanohoa tauna heġereġerena ai ba raka lasi idia vairadiai; dauhai bae hanohoa launa na heto emu gabu amo baola, ela bona ma gabu ta, idia vairadiai. Ena be idia na gwau-edeede besena, to readia lalodia bae parara. ⁴Dina ai emu laolao kohuna ba lasilaia idia vairadiai, dauhai bae hanohoa tauna ena laolao kohuna na heto, bona adorahi ai idia vairadiai ba raka lasi, dauhai bae hanohodia taudia na heheto. ⁵Idia vairadiai ruma habana ba hamaurua, bona mauruna amo ba rau lasi. ⁶Idia vairadiai laolao kohuna na bavabia isi paġamu ai, bona

dibura ai ba huaia lasi; vairamu ba ḡovaia, tano basio itaia helaoreana; badina be lau ese toa ta ai vada na halaomu, Israel besena enai.

⁷Bena e haḡanigu heḡereḡerena ai na karaia. Dina ai egu laolao kohuna na lasilaia, dauhai bae hanohoa tauna ena kohu na heto; bona adorahi ai lau sibogu imagu amo ruma habana na hamaurua, dibura ai na rau lasi, egu laolao kohuna na paḡagu ai na huaia lao, idia vairadiai.

⁸Daba ai Iehova ena hereva na egu ai e kau, eto: ⁹Taunimanima natuna e, Israel besena, gwau-edeede besena, e nanadaimu, eto “Dahaka o karamu?”, ani? ¹⁰Ba hamaorodia, baoto, Ḡaubada Iehova na ini e gwau tomamu: Ina hereva Inetauna na Ierusalem lohiana dainai, bona Israel besena taudia ia lalonai e nohomu iboudiai daidiai. ¹¹Ma baoto, Lau na toa ta emui ai; lau vada na karaia heḡereḡerena ai, unu bae kara henidia toma; idia na dauhai bae hanohodia mai iḡuidia ida. ¹²Bena lohia tauna idia bogaragidiai ese ena laolao kohuna na pagana ai baine abia isi, dibura lalonai, bena baine huaia lao. Ia ese ruma habana baine hamaurua, bena mauruna amo baine rau lasi; ia ese vairana baine ḡovaia, ia matana amo tano basine itaia helaoreana. ¹³Egu huo baina otoa ia iabina, bona egu idoa ai baina idoaia; Babulono, Kaldea tanona ai, baina laohaia; ḡau tamona, ia ese basine itaia, ia na unuseni ai baine mase. ¹⁴Ia bamona iboudiai, iduruna taudia bona ena tuari taudia iboudiai, na lau ese baina hakarohodia, lai kahadia iboudiai baela; bona dare na iudalaina ḡauna amo baina veria lasi, idia muridia amo. ¹⁵Bena bese idau-idau bogaragidiai baina luludia lao, bona tano idau-idau lalodiai baina hakarohodia negana ai, idia na bae diba, lau na Iehova. ¹⁶A idia kwabukwabudia haida na dare bona dai-hanai gorerena bona doe amo baina harohodia mauri, bena bae lao heni besedia bogaragidiai edia kara dikarohorohodia iboudiai na bae gwaurai hedinara, bona bae diba lau na Iehova.

¹⁷Iehova ena hereva na egu ai ma e kau, eto: ¹⁸Taunimanima natuna e, amu bavania mai kudou-hetahamu ida, bona ranu ba inua mai heudeheudemu bona mai garimu ida, ¹⁹bona tano taudia na ba hamaorodia, baoto, Ḡaubada Iehova ese Ierusalem inoholaina taudia Israel tanona lalonai na ini e herevalaidia tomamu: Adia bae ani mai garidia ida, bona ranu bae inu mai kudou-hetahadia ida, badina be edia tano anina idoinai baine heabi oho vaitani, e noholaiamu taudia iboudiai edia daḡedaḡe dainai. ²⁰E noholaidiamu hanuadia na bae vahu, bona tano na tano ḡaḡaena ai baine hahelao; bena ba diba, lau na Iehova.

²¹Bena Iehova ena hereva na egu ai e kau, eto: ²²Taunimanima natuna e, emui hereva lada-isina be dahaka? Israel tanona o herevalaiamu, o tomu “Nega na e daudaumu bona mata-hanai iboudiai anidia asie varamu”, ani? ²³Taunabunai ba hamaorodia, baoto, Ḡaubada Iehova na ini e gwau tomamu: Ina hereva lada-isina na baina hadokoa; basie

gwauraia lou Israel ai. A ba hamaorodia, baoto, Nega na vada e kahikahi, mata-hanai iboudiai anidia ihaḡuḡurudia danu vada e kahikahi. ²⁴Badina be mata-hanai koikoidia bona bagu-haoro koikoidia na bae doko, Israel besena ai. ²⁵A lau Jehova ese baina gwauraia herevana vada baina gwauraia, bona karana baina karaia. Basine halahe, a oiemu nega ai, gwau-edeede besena e, hereva baina gwauraia bona karana baina karaia. Ġaubada Jehova na e herevamu.

²⁶Jehova ena hereva na egu ai ma e kau, eto: ²⁷Taunimanima natuna e, a itaia, Israel besena taudia na e tomu “Ena mata-hanai na dina momo vairai ḡauna, bona ena peroveta herevadia na nega daudau bainya herevadia”. ²⁸Taunabunai ba hamaorodia, baoto, Ġaubada Jehova na ini e gwau tomamu: Egu hereva iboudiai na ta basine halahe, a na gwauraiamu herevana anina do baine vara. Ġaubada Jehova na e herevamu.

Peroveta taudia koikoidia irevadia

13 ¹Jehova ena hereva na egu ai e kau, eto, ²Taunimanima natuna e, Israel ena peroveta taudia latadai ba peroveta; sibodia edia lalo-hadai e perovetalaimu taudia na ba peroveta henidia, baoto, Jehova ena hereva ba kamoni. ³Ġaubada Jehova na ini e gwau tomamu: Peroveta taudia kavakavadia, sibodia lalodia e badinamu a ḡau ta asie itaia taudia, madi ihabaidia! ⁴Israel e, emu peroveta taudia na uda sisiadia na heheto, e heḡiḡi dobi rumadia ai e nohomu. ⁵Magu vada e gwadadia mauru gabudia asio lao henidia, Israel besena maḡuna asio larebaia, Jehova ena dina ai tuari ai baine auka totona. ⁶Vada e hereva koikoi bona vada e bagu haoro koikoi. Jehova ese se siaidia negadia al, idia na eto “Jehova ini e gwau tomamu”, bena idia banava eto ia ese edia hereva baine hamomokania. ⁷Ena be lau asina hereva to umui oto “Jehova ini e gwau tomamu” negadia iboudiai na o mata hanai koikoi bona o bagu haoro koikoi ani?

⁸Taunabunai, Ġaubada Jehova na ini e gwau tomamu: Hereva asi anidia vada o gwaurai bona mata-hanai koikoidia vada o ita dainai, Ġaubada Jehova na e tomu, A itaia, lau ese na inai henimuimu. ⁹E mata hanai koikoimu bona e bagu haoro koikoimu peroveta taudia na lau imagu ese baine laodia ahu; egu ore a taudia ida basie henega bou, bona Israel besena taudia ladadia itoredia ai idia ladadia basie hetore, bona Israel tanona ai basie raka vareai; bena umui na ba diba lau na Ġaubada Jehova. ¹⁰Oibe, badina be egu ore a taudia vada e koidia, eto “Maino”, maino na lasi negadia ai; bona badina be taunimanima ese haba e haginiamu negadia ai, ini peroveta taudia ese ahu amo e dahuamu; ¹¹una dainai ahu amo haba e dahuamu taudia na ba hamaorodia, una haba na baine heḡiḡi dobi. Medu bada-herea baine diho, medu-hetari badadia

bae moru, lai-gubana baine toa; ¹²bena haba baine hegigi dobi negana ai, haida ese bae nanadaimu, baeto “O dahulaia ahuna be edeseni ai?” ani? ¹³Taunabunai Gaubada Iehova na ini e gwau tomamu: Lau ese egu badu garagara ai lai-gubana baina hatoaia; bona egu badu ai medu badahereana baina hadiho, bona medu-hetari badadia baina hamorudia, badu garagara ai bae habuadia tari. ¹⁴Umui ese ahu amo o dahua habana na lau ese baina gigia dobi tano ai, bena ia badina bae hedinarai. Baine hegigi dobi negana ai, umui ese ia bogaraginai ba mase; bena ba diba lau na Iehova. ¹⁵Egu badu garagara na unu baina bubua ore toma, haba latanai, bona ahu amo e dahua taudia latadai; bena baina hamaoromu, bainato, Haba na lasihia, ahu amo e dahua taudia danu lasihidia; ¹⁶Israel ena peroveta taudia bunu, Jerusalem latanai e peroveta bona mata-hanai ai maino e itaia, maino na lasi negana ai. Gaubada Iehova na e herevamu.

¹⁷Taunimanima natuna e, oi danu vairamu ba ha-aukaia emu bese taudia natudia hahinedia, sibodia edia lalo-hadai e perovetalaimu hahinedia, ediai. Idia latadai ba peroveta, ¹⁸baoto, Gaubada Iehova na ini e gwau tomamu: Taunimanima laumadia idoadia totona mea ganadia na ima ganaganadia iboudiai ai e turidia, bona hegoa-ahu mukodia, taunimanima kikina-badana kwaradia igovalaidia, e karamu, hahinedia madi ihabaidia! gu orea taudia laumadia ba idoadia bona ma haida danu laumadia ba hamauridia, umui sibomui emui namo ihabadana a? ¹⁹Egu orea taudia bogaragidiai lau ladagu vada o hamiroa, bali taidia bona flaoa atagadia iabidia ai, basiema mase taudia na o aladia masemu, bona basiema mauri taudia na o hamauridiamu, emui koikoi amo; egu orea taudia, koikoi e abi daemu taudia, na o koidia.

²⁰Taunabunai, Gaubada Iehova na ini e gwau tomamu: A itaia, emui mea ganadia, taunimanima laumadia o idoalaidiamu gaudia, na na inai henidiamu; imamui amo baina daredia oho, bona o idoadiamu laumadia na baina kahudia nege, manu na heheto. ²¹Emui hegoa ahu mukodia danu baina daredia oho, bona egu bese taudia na imamui amo baina rauadia, bena egu orea taudia na imamui ai basie noho, umui damumui ai basiela. Bena ba diba lau na Iehova. ²²Badina be emui koikoi amo kara maoromaoro tauna lalona vada o hamanokaia, ena be lau ese lalona asina hamanokaia; bona kara dika tauna lalona vada o hagoadaia, ena dala dikana amo basine raka siri, ena mauri basine rauaia; ²³taunabunai, ina murinai umui na basio mata hanai koikoi lou, bona bagu haoro karadia basio kara lou; egu orea taudia na umui imamui amo baina harohodia mauri. Bena vada ba diba lau na Iehova.

Kaivakuku e toma henidia dihomu taudia

14 ¹A Bena Israel tau-badadia haida na dekegu ema, lau vairagu ai e helai. ²Bena Iehova ena hereva na egu ai e kau, eto,

³Taunimanimata natuna e, ini tatau ese edia kaivakuku na lalodia ai vada e abidia dae, bona edia kara havara na hekwakwanai ġauna ai vada e halaoa vairadiai; bae nanadailaigu herevadia baina kamoniaidia eiava lasi? ⁴Taunabunai ba hereva henidia, baoto, Ġaubada Iehova na ini e gwau tomamu: Israel besena tauna ta ese kaivakuku na lalona ai baine abidia dae, bona ena kara havara na hekwakwanai ġauna ai baine halaoa vairanai, bena peroveta tauna dekena bainema, lau Iehova sibogu ese baina haere henia, ena kaivakuku na momo dainai; ⁵unu amo Israel besena taudia, edia kaivakuku daidiai vada e rakatanigu taudia, na lalodia baina abidia lou.

⁶Taunabunai Israel besena taudia ba hamaorodia, baoto, Ġaubada Iehova na ini e gwau tomamu: A helalo kerehai, emui kaivakuku bona emui kara dika-rohorohodia iboudiai amo ba mede daudau. ⁷Badina be Israel besena tauna ta, eiava idau tauna Israel ai e noho hedoamu ta, ese baine rakatanigu, ena kaivakuku na lalona ai baine abidia dae, bona ena kara havara na hekwakwanai ġauna ai baine halaoa vairanai, bena peroveta tauna dekena bainema, peroveta tauna ese ia dainai baine nanadailaigu totona, lau Iehova sibogu ese baina haere henia. ⁸Lau ese vairagu baina ha-aukaia una tau enai; toa bona udu gwaurai-gwaurai herevana ai baina halaoa, bona egu bese taudia bogaragidia amo baina negea daure; bena umui na ba diba, lau na Iehova. ⁹A peroveta tauna lalona bema hekwakwanai bena hereva ta bema gwaurai, anina be lau Iehova ese vada na koia; bena lau ese imagu baina toia roro ia ihadikana, bona egu bese Israel bogaragina amo baina habuaia tari. ¹⁰Bena davadia bae hua; peroveta tauna davana bona henanadai tauna davana bae heġereġere; ¹¹unu amo Israel taudia na egu amo basie raka oho lou, bona edia kara havara iboudiai amo sibodia basie hahemiro lou, a egu bese ai baela, bona lau na edia Dirava ai bainala. Ġaubada Iehova na e herevamu.

Dirava ena hahemaoro Ierusalem latanai

¹²Iehova ena hereva na egu ai e kau, eto, ¹³Taunimanimata natuna e, tano ta ese ena hebeatai karadia amo baine kara dika henigu, bena lau ese imagu na ia ihadikana totona baina toia roro bona ena mauri anianina baina abia oho, bona doe na ia latanai baina siaia, bona taunimanimata bona ubu-ubu ġaudia ia lalonai baina hamasedia, negana ai, ¹⁴ena be ini tatau tatoiosi, Noa bona Daniel bona Iobu, na ia lalonai bema noho, to edia kara maoromaoro amo idia sibodia mo edia mauri bema heraua. Ġaubada Iehova na e herevamu. ¹⁵Eiava uda boromadia na una tano ai bama harakadia hanai, bena idia ese bema havahua, ela bona tano ġaġaena ai bema hahelao, bena tau ta basinema rakaia hanai diba unu uda boromadia daidiai, negana ai, ¹⁶ena be unu tatau tatoiosi na ia

lalonai bema noho, to, lau na maurimu hegeregerena (Ĝaubada Iehova na e gwaumu), idia tatoiosi ese natudia mamaruanedia eiava hahinedia basiema hamauridia diba; idia tatoiosi sibodia mo edia mauri bema heraua, a tano na bema ġaġae. ¹⁷Eiava dare na una tano latanai bama mailaia, bama toma “Dare na tano amo baine hanai”, bena taunimanima bona ubu-ubu ġaudia ia lalonai bama hamasedia, negana ai, ¹⁸ena be unu tatau tatoiosi na ia lalonai bema noho, to, lau na maurimu hegeregerena (Ĝaubada Iehova na e gwaumu), idia tatoiosi ese natudia mamaruanedia eiava hahinedia basiema hamauridia diba, a idia tatoiosi sibodia mo bema heraua. ¹⁹Eiava dai-hanai gorere na una tano latanai bama siaia, bona egu badu ġaraġara na ia latanai bama bubua, rara ihahehubuna ai, taunimanima bona ubu-ubu ġaudia ihamasedia totona, negana ai, ²⁰ena be Noa bona Daniel bona Iobu na ia lalonai bema noho, to, lau na maurimu hegeregerena (Ĝaubada Iehova na e gwaumu), idia tatoiosi ese natudia mamaruanedia eiava hahinedia basiema hamauridia diba, a idia tatoiosi sibodia mo edia mauri bema heraua, edia kara maoromaoro daidiai.

²¹Badina be Ĝaubada Iehova na ini e gwau tomamu: Matona, Ierusalem baina hahemaoro henja, egu hahehisi karadia haniosi, dare bona doe bona uda boromadia dikadia bona dai-hanai goreredia, na ia latanai baina siaidia taunimanima bona mauri ġaudia ihamasedia totona, negana ai, ia na ede baine heto! ²²Ĝau tamona, ia lalonai haida na bema mauri, bena natudia mamaruanedia bona hahinedia bema hakaudia lasi, idia na dekemu ai bae raka lasi, bena edia dala bona edia kara ba ita negana ai taumu na baine lo, dika na Ierusalem latanai vada na mailaia dainai; oibe, kara iboudiai ia latanai vada na mailai daidiai. ²³Idia ese taumu bae haloa, edia dala bona edia kara ba ita negana ai; bona ba diba Ierusalem lalonai na kara karadia iboudiai na dia asi badina asina karadia. Ĝaubada Iehova na e herevamu.

Ierusalem na vine auna dikana na heto

15 ¹Iehova ena hereva na egu ai e kau, eto, ²Taunimanima natuna e, vine auna ese au haida ede e hereadia tomamu; vine rigina ese uda audia rigidia ede e hereadia tomamu? ³Ĝau ta ikaralaina auna na iena amo e abiamu a? Iena amo ikoko ta e karaiamu bena una ikoko ai ġau ta e taua daemu a? ⁴A itaia, lahi auna ai e halaoamu; bena lahi ese duduna duduna e aradia oremu bona bogaragina na gida ai e laomu murinai ia na mai ena ġaukara a? ⁵A itaia, au tutuana miana ai na asi ena ġaukara; matona lahi ese vada e araia bona gida ai vada ela negana ai ena ġaukara be dahaka?

⁶Taunabunai, Ĝaubada Iehova na ini e gwau tomamu: Uda audia bogaragidiai vine auna na lahi auna ai vada e halaoa hegeregerena ai,

Ierusalem inoholaina taudia na unu baina kara henidia toma. ⁷Lau ese vairagu na ediai baina ha-aukaia; ena be lahi amo bae roho mauri, to lahi ese do baine aradia ore; bena lau ese vairagu na ediai baina ha-aukaia negana ai na ba diba lau na Iehova. ⁸Tano danu baina havahua, badina be e kara hebeatai. Ġaubada Iehova na e herevamu.

Ierusalem ena kara hebeatai

16 ¹Iehova ena hereva na egu ai ma e kau, eto, ²Taunimanim natuna e, Ierusalem na ena kara dika-rohorohodia ba hedaraunelai henia, ³baoto, Ġaubada Iehova ese Ierusalem na ini e hamaoroa tomamu: Senemu bona emu vara na Kanaan taudia edia tano ai, tamamu na Amoro tauna, sinamu na Hiti hahinena. ⁴Emu vara na iniheto: emu vara dinana ai hudomu varona asie utua, ranu ai asie hurimu, ba ġoevaġoeva totona, damena amo asie dahumu, dabua amo asie tarumu. ⁵E itamu tauna ta ese se bogamu hisi, ini kara ta se kara henimu ena hebogahisi dainai; a tano paka ai e negemu; badina be o vara dinana ai e dadaraimu herea.

⁶Bena na rakamu hanai negana ai na itamu, rara ai o hekure, bena rara ai hekuremu ai na hereva henimu, nato, Ba mauri, ⁷tano paka avana na heto ba tubu. Bena o bada oho bada oho, taumu e lata, hane-ulato ai ola; ratamu e hekara, huimu e lata; ġau tamona gagaemu ai o nohova, asi dabuamu.

⁸Ma na rakamu hanai negana ai na itamu, oi na vada o ulato; bena egu dabua amo na tarumu, taumu na govalaia; oibe, maohenimu na karaia, bona oi ida ta hegwau hamata heheni, bena adavagu ai ola. Ġaubada Iehova na e herevamu. ⁹Bena ranu ai na hadigumu, raramu na huria oho, bona dehoru amo na dahumu. ¹⁰Dabua mai heraheradia amo na hahedokilaimu, bona boromakau kopina tamakadia na aemu ai na kara. Dabua aukana ġoeva-daena amo na hariolaimu, bona dabua manoka-manokana amo na hahedokilaimu. ¹¹Herahera ġaudia amo na haheralaimu; vagivagi na imamu ai na ato, bona ageva na ha-inulaimu.

¹²Gadei ta na udu-baubaumu ai na atoa, bona haida danu taiamu ai; bona havava ġauna ta mai hairaina na kwaramu na havavalaia. ¹³*Gold* bona *silver* amo unu na haheralaimu toma; emu dabua na dabua aukadia ġoeva-daedia bona dabua manoka-manokadia bona dabua mai heraheradia; amu aniani na flaoa namo-hereana bona bada-ranuna bona dehoru. Hairaimu e bada e laova, ela bona oromamu na pavapava hahinena na heto. ¹⁴Sivaraimu danu e hehari piu, bese idau-idau bogaragidiai, hairaimu na bada herea dainai; badina be hairaimu na ġoeva-dae, lau ese na hahairaimu dainai. Ġaubada Iehova na e herevamu.

¹⁵A oi ese hairaimu o abidadama henia, bena ariara hahinena ai ola harimu badana dainai, raka-hanai taudia ida o lebulebu. ¹⁶Emu dabua

haida o abi, pata helaḡadia o haheralai, bena latadiai ariara karadia o kara; kara unuhetomana na nega gunadia ta ai se vara, bona nega gabedia ta ai basine vara Iou. ¹⁷Emu herahera ḡaudia danu, lauegu *gold* bona *silver* amo e kara bona lau ese na henimu ḡaudia, na o abidia, tatau laulaudia o karalai, bena o lebulebulai. ¹⁸Emu dabua mai heraheradia danu o abidia, unu ḡau o govalaidia, bona egu dehoru bona egu muramura mai bonana na vairadiai o atodia. ¹⁹Egu flaoa igabudia danu, na henimu ḡauna, (badina be lau ese flaoa namo-hereana bona dehoru bona bada-ranuna amo na ubumu) na idia vairadiai o atodia, bonadia bae moalelai totona. Ḡaubada Iehova na e herevamu. ²⁰Bena natumu mamaruanedia bona hahinedia, o havaradia egu, na o abidia, boubou ḡaudia ai o halaodia, idia adia. Emu ariara karadia na ḡau pipikidia a? ²¹Una dainai lau natugu o aladia mase, bona ḡole-oho boubou ḡaudia ai o halaodia, idia edia, a? ²²Emu kara dika-rohorohodia bona emu ariara karadia iboudiai lalodiai, maragimu negana, asi dabuamu ḡagaemu ai o nohova negana, rara ai o hekure, so laloa tao.

²³Bena emu kara dika iboudiai muridiai, (Ḡaubada Iehova na e tomu, Madi, ihabaimu!), ²⁴oi ese emu kalaga o haginidia bona emu pata helaḡadia o kara, ruma ariaradia iboudiai lalodiai. ²⁵Hanua ariarana iboudiai dokodia ai emu pata helaḡadia o haginidia; hairaimu vada o lebulebulaia, raka-hanai tataudia ediai sibomu o hehoihoilai, emu ariara karadia o habada. ²⁶Aigupto taudia, dekemu taudia mai edia mata-bodaga, ida danu vada o lebulebu, emu ariara karadia vada o habada, lau ihabadugu. ²⁷Taunabunai a itaia, lau imagu na toia roro oi ihadikamu, oi ahumu, e gwaurai henimu guna ḡauna, na hamaraḡia, oi inaimu Filistia hahinedia, mata-ganigani hahinedia, imadia ai na atomu; idia ese emu lebulebu karadia hemaraidia e hemaraiva. ²⁸Asuria taudia ida danu ariara karadia o kara, badina be emu mata-bodaga na bada herea; oibe, idia ida ariara karadia o kara, a lalomu do se heḡereḡere. ²⁹Emu ariara karadia o habada danu, Kaldea tanona ena hoihoi gabudia ai; a lalomu na dounu se heḡereḡere.

³⁰Ḡaubada Iehova na e tomu: Emu mata-bodaga na bada herea; una dainai ini kara iboudiai o kara, ariara hahinena se hemaraimu ena kara; ³¹hanua ariaradia iboudiai dokodia ai emu kalaga o haginidia, bona ruma ariaradia iboudiai lalodiai emu pata helaḡadia o kara. Ḡau tamona oi na dia ariara hahinena heḡereḡerena, badina be henitaomu o dadaraiamu. ³²Oi na heuda-hanai hahinemu, idau taudia o abidia daemu adavamu gabuna ai. ³³Tatau ese ariara hahinedia iboudiai na harihari ḡaudia e henidiamu; a oi ese emu harihari gsudia na e ura henimuva taudia iboudiai o henidiava, henitaodia o henidiava, kaha idau-idau iboudiai amo emu ariara karadia ikaradia bae vasi totona. ³⁴Taunabunai, emu ariara karadia lalodiai oi na idau, dia hahine haida heḡereḡeredia.

Ta se noimu ia ida ba eno bou; oi ese henitaona o henia, a haida ese henitaomu se henimu. Una dainai oi na idau.

³⁵Taunabunai, ariara hahinemu e, Iehova ena hereva ba kamonai. ³⁶Ġaubada Iehova na ini e gwau tomamu: Badina be e ura henimu taudia ida emu ariara karadia o kara lalodiai, oi ihahemaraimu na e hehulala bona gagaemu ai na o hedinarai dainai, bona emu kaivakuku iboudiai daidiai, bona natumu, idia o henidia memerodia, raradia daidiai, ³⁷a itaia, e ura henimu taudia iboudiai, olebulebulaidia taudia, o ura henidia taudia bona o dadaraidia taudia iboudiai, na lau ese baina haboudia; oi ihadikamu totona kaha iboudiai amo baina haboudia, bena gagaemu ai baina haheitalaidia; taumu idoinai ġaġaena ai bae itaia. ³⁸Bena lau ese baina hahemaoro henimu, adavadia e dihotanidiamu bona rara e hahebubuamu hahinedia e hahemaoro henidiamu heġereġerena.

³⁹E ura henimu taudia imadia ai baina atomu; bena idia ese emu kalaga bae ġiġia dobi, bona emu pata helaġadia bae hamakohidia, emu dabua bae dokidia oho, emu herahera nadidia namo-hereadia na bae abidia, gagaemu ai asi dabuamu bae rakatanimu. ⁴⁰Tuari oreana ta bae mailaia, oi ihadikamu; nadi amo bae hodomu, bona edia dare amo bae dapamu rohoroho. ⁴¹Emu ruma bae doudia; hahemaoro karadia oi latamu ai bae kara, hahine momo vairadiai; emu ariara karadia ai baina hadokomu, bona henitao basio heni lou. ⁴²Unu amo egu badu ġaraġara baina haġuġurua latamu ai, bona egu vaġeġe ese baine rakatanimu; lalogu na baine keru, basina badu lou. ⁴³Badina be eregabemu negana so laloa taomu; to ini ġau iboudiai amo vada o habadugu. Taunabunai, a itaia, emu kara davadia na tubuamu ai baina kara. Ġaubada Iehova na e herevamu.

Emu kara dika-rohorohodia iboudiai latadiai mata-bodaga karadia ma vada o ato kau, ani? ⁴⁴A itaia, hereva lada-isidia e gwauraimu taudia iboudiai ese ina hereva lada-isina ai bae herevalaimu, baeto “Sinana hetomana, natuna hahinena danu unuheto”. ⁴⁵Sinamu ese adavana bona natuna e dadaraidia, bona oi na ia natuna hahinena; tadikakamu ese adavadia bona natudia e dadaraidia, bona oi na idia tadikakadia. Sinamu na Hiti hahinena; tamamu na Amoro tauna. ⁴⁶Kakamu na Samaria; ia na natuna hahinedia ida e nohova, oi miriginimu kahana ai; bona tadimu na Sodoma; ia na natuna hahinedia ida e nohova, oi dihomu kahana ai. ⁴⁷Ġau tamona, oi lalomu na se heġereġere idia edia dala ai ba raka, eiava idia edia kara dika-rohorohodia heġereġeredia ai ba kara; asi vanahana oiemu kara mirodia ese idia edia kara mirodia e hereadia, emu dala iboudiai lalodiai.

⁴⁸Ġaubada Iehova na e tomu: Lau na maurimu heġereġerena, tadimu Sodoma bona natuna hahinena edia kara na oi bona natumu hahinedia edia kara ida asie heġereġere. ⁴⁹A itaia, tadimu Sodoma ena kerere

binai: ia mai natuna ida e hekokorokuva, e aniani boga-kunuva, e noho namonamova mai tagadia ida; a ogoḡami taudia bona e dabuva taudia na asie durudia. ⁵⁰Idia na e hekokorokuva, kara dika-rohorohodia na lau vairagu ai e karava; taunabunai edia kara na itaia negana ai na na abidia oho. ⁵¹Samaria ena kara dika na taina bada, a oiemu na bada herea; oiemu kara dika-rohorohodia ese idia edia vada e hereadia; oiemu kara dika-rohorohodia iboudiai daidiai tadikakamu ita-itadia na kara maoromaoro hahinedia ita-itadia na heheto. ⁵²Oi danu ihahemaraimu na ba huaia, badina be tadikakamu ihahemaorohenidia metauna vada o haragaia; badina be emu kara dika ai emu kara dika-rohorohodia ese idia edia e hereadia dainai, idia na taidia mamaoro, a oi na dika vaitani. Taunabunai, oi danu ba hemarai, ihahemaraimu ba huaia, badina be tadikakamu oromadia na kara maoromaoro hahinedia oromadia heḡereḡeredia ai vada o halaodia.

⁵³Edia noho-namo baina henidia lou, Sodoma mai natuna hahinedia ida edia noho-namo bona Samaria mai natuna hahinedia ida edia noho-namo, bona oiemu noho-namo baina henimu lou idia bogaragidiai; ⁵⁴bena ihahemaraimu ba huaia bona emu kara iboudiai daidiai ba hemarai, bona idia taudia ihalodia hahinemu ai baola. ⁵⁵A tadimu Sodoma bona natuna hahinedia ese edia noho dalana Kunana bae lou henia; bona kakamu Samaria bona natuna hahinedia ese edia noho dalana gunana bae lou henia; bona oi bona natumu hahinedia ese emui noho dalana gunana ba lou henia. ⁵⁶Emu hekokoroku dinana ai oi tadimu Sodoma na udu gwaurai-gwawai herevana oi udumu ai, ani, ⁵⁷emu kara dika do se hedinarai negana ai? Harihari oi na ia heḡereḡerena, duni-dae ḡauna ai vada ola Edom natuna hahinedia ediai, bona ia dekena hahinedia iboudiai ediai, bona Filistia taudia natudia hahinedia ediai, e ḡeḡemu daemu bona e dadaraimumu hahinedia iboudiai ediai. ⁵⁸Emu lebulebu bona emu kara dika-rohorohodia davadia metauna o huaiamu. Iehova na e herevamu.

⁵⁹Oibe, Gaubada Iehova na ini e gwau tomamu: Oiemu kara heḡereḡerena ai baina kara henimu. Oi ese hereva helaḡana vada o dadaraia, gwauhamata itata-utuna; ⁶⁰ḡau tamona, egu gwauhamata, eregabemu negana ai oi ida ta hegwau hamata heheni ḡauna, baina laloe toa, bona oi ida mia-hanaihanai gwauhamatana ta baita haginia tutuka-tutuka. ⁶¹Bena emu kara ba lalodia tao, bona emu hane-guna bona emu hane-murитай baina abidia, natumu ai baina halaodia, negana ai vada ba hemarai, a dia eda gwauhamata dainai. ⁶²Eda gwauhamata baina haginia tutuka-tutuka, bona ba diba lau na Iehova; ⁶³ba laloe tao, bona ba baia, bona udumu basio kehoa lou, emu hemarai dainai, lau ese emu kara iboudiai baina lalodia nege negana ai. Ḡaubada Iehova na e herevamu.

Hereva hegeregeredia: Ugava bona Vine

17 ¹Iehova ena hereva na egu ai e kau, eto: ²Taunimanima natuna e, henanadai hepuina ba gwaurai, bona hereva hegeregerena ta na Israel besena ba gwaurai henia. ³Baoto, Ġaubada Iehova na ini e gwau tomamu: Ugava badana ta mai hanina badadia bona hape latadia, huina oromadia danu idau-idau, na Lebanon ema, sida auna ta dorina e bitua. ⁴Ia ese dorina rigirigina e bitua kwaidu, hoihoi tanona e laohaia, hoihoi taudia edia hanua lalonai e hadoa. ⁵Bena tano uhena e abia, tano namona ai e hadoa, ranu momo gabuna ai. E hadoa arabimi^h rigirigina na heto, ⁶benia ia na e tubu, vine auna ai ela, e raga rohoroho; bena gavena na ia e tubu henia, a ramuna na ena gini gabuna ai e mia. Taunabunai, ia na vine auna ai ela, gavena e tubu bona rauna e urumo-urumo.

⁷A ugava ma ta ema; hanina na babada, bona huina na momo. A itaia, hari vine ramuna ese ia e hata hema bona gavena danu e tubu henia, baine hapariparidia totona. Bena e hadoa tanona amo ⁸ma e hadoa hanai, tano namona ai, ranu momo gabuna ai, gavena bae tubu bona hu huana bae dobi bona vine auna herea-daena ai bainela totona. ⁹Baoto, Ġaubada Iehova na ini e gwau tomamu; Baine tubu namonamo a? Ramuna basine raġadia bona gavena basine utudia, rauna matamatadia iboudiai bae marai totona, a? Dia ima mai goadana mo, eiava taunimanima hutuma mo, bae hegeregere ramuna amo bae raġaia, ani? ¹⁰A itaia, bae hadoa hanai negana ai, baine tubu namonamo a? Laurabada baine toa henia negana ai, ia na basine marai a? E tubu gabuna ai baine marai ani?

¹¹Bena Iehova ena hereva na egu ai e kau, eto, ¹²Harihari ene daġedaġe besena taudia ba hamaorodia, baoto: Ini ġau anidia na asi dibamui a? Bena ba hamaorodia, baoto, A itaia, Babulono pavapavana na Ierusalem ela, hanua pavapavana bona lohiana verina Babulono e hakaudia mai. ¹³Bena ia ese hanua pavapavana natuna maruanena ta e abia, ia taravana e atua, bona gwauhamata helaġana henunai e hanohoa. (Tano lohiadia na ia ese vada e abidia oho, ¹⁴basileia na baine manau, basine hekokoroku, bona iena taravatu ibadinana ai baine gini helaorearia.) ¹⁵A ia ese e daġedaġe henia, gwaukau taudia na Aigupto e siaidia lao, idia ese hosi haida bona tuari oreana badana ta bae henia helaoreana. Baine kwalimu a? Kara unuhetomadia e karamu tauna na baine roho mauri diba a? Taravatu baine tataia utu, bena baine roho mauri diba a? ¹⁶Ġaubada Iehova na e tomu: Lau na maurimu hegeregerena, momokani hanua pavapavana ta ese tau ta na pavapava tauna ai e halaoa, bena una pavapava ai e halaoa tauna ese

^h 17.5 Arabimi na sinavai isena ai e varamu auna ta ladana.

dagi na e henia tauna ena gwauhamata helaḡana e dadaraia, bona e atua taravatuna e tataia utu; benaini, una tau na dagina e henia pavapavana ena noho gabuna ai baine mase, oibe, Babulono ai baine mase. ¹⁷Farao bona ena tuari oreana mai goadana bona ena ore badana idoinai ese basie durua tuari ai, hutuma iala-masedia totona tano bae larebaia bona hanua bae magua heḡeḡe negana ai. ¹⁸Badina be gwauhamata helaḡana e dadaraia bona taravatu e tataia utu, bona imana e dudui heni to ini kara iboudiai e kara, dainai ia na basine roho mauri. ¹⁹Taunabunai, Ḡaubada Iehova na ini e gwau tomamu: Lau na maurimu heḡereḡerena, momokani egu gwauhamata helaḡana, e dadaraia ḡauna, bona egu taravatu, e tataia utu ḡauna, davadia na ia tubuana ai baina kara. ²⁰Egu huo baina otoa, ia iabina, bona egu idoa ai baina idoaia; bena Babulono baina laohaia, unusenai ai baina hahemaoro henia, ena koikoi karadia egu ai e kara na baina hahemaorolai. ²¹Ena abi-hidi tuari taudia na dare ai bae mase, bona roho-mauri taudia na lai kahadia iboudiai bae pere rohoroho; bena ba diba, lau Iehova vada na hereva.

Hereva heḡereḡerena: Sida auna

²²Ḡaubada Iehova na ini e gwau tomamu: Lau sibogu ese sida auna dorina amo rigirigi ta baina abia, bena baina hadoa; dorina rigirigidia ediai manoka-manokana ta baina gadaia oho, bena lau sibogu ese baina hadoa, ororo bada-hereana bona lata-hereana dorina ai. ²³Israel ororona dorina ai baina hadoa, riginai bae tubu bona huahuana bae dobi bona sida auna herea-daena ai bainela totona; bena ia henunai mauri ḡaudia idau-idau bae noho; bona ia riginai ikerukerudia ai manu idau-idau ese edia ruma bae kara. ²⁴Bena tano paka audia iboudiai na bae diba lau Iehova ese au latana na hakwadogiamu bona au kwadogina na halataiamu, au maurina na hakakoroamu bona au masena na hatubuamu. Lau Iehova vada na hereva, bona karana baina karaia.

Kara dika tauna laumana baine mase

18 ¹Iehova ena hereva egu ai ma e kau, eto: ²Badina be dahaka ina hereva lada-isina o gwauraia louloumu, o tomu

“Tama ese vine huahuadia kasiridia vada e ani,
bona natudia isedia e urimu”?

³Ḡaubada Iehova na e tomu: Lau na maurimu heḡereḡerena, ina hereva lada-isina na basio gwauraia lou Israel ai. ⁴A itaia, lauma iboudiai na lauegu, tama laumana bona natuna laumana danu; kara dika tauna laumana na baine mase.

⁵Tau ta ena kara bema maoromaoro, taravatu ibadinana ai bona kara maoromaoro ikaradia ai bema noho, ⁶ororo ai basinema aniani eiava Israel besena kaivakukudia basinema gaga dae henidia; dekena

tauna adavana basinema kara miro henia eiava hahine ta na ena rara-kara dinadia ai basinema raka kahi henia; 7ta na basinema hahisia, a abitorehai tauna ena abitorehai toana bema henia lou; kohu basinema dadi; hitolo taudia bema ubudia bona asi dabuadia taudia bema hadabualaidia; 8moni basinema heni torehai mai heatokauna eiava heatokau monidia haida basinema abi; imana na kara havara amo bema rua; taunimanima padadai hahemaoro goeva goevana bema karaia; 9egu taravatu daladia ai bema raka bona egu hahedua herevadia bema badinadia goeva goeva: una tau na kara maoromaoro tauna; momokani ia na do baine mauri. Ġaubada Iehova na e herevamu.

¹⁰Natuna maruanena ta bema havaraia, bena una mero na dadidadi bona rara ihahebubuna tauna ai bema hahelao, ¹¹bona ini ġaukara iboudiai basiema kara, a ororo ai bema aniani, dekena tauna adavana bema kara miro henia, ¹²ogogami taudia bona e dabumu taudia bema hahisidia, kohu bema dadi, abitorehai toana basinema heni lou, kaivakuku bema gaga dae henidia, kara dika-rohorohodia bema kara, ¹³moni bema heni torehai mai heatokauna, bona heatokau monidia haida bema abi: una tau be baine mauri a? Ia na basine mauri. Ini ġau dika-rohorohodia iboudiai vada e kara; momokani, ia na baine mase; ia rarana na ia sibona latanai.

¹⁴A ina tau ese natuna maruanena ta bema havaraia; bena natuna ese tamana ena kara dika iboudiai bema itadia, bena bema gari, bona unu kara hegeregere dia ai basinema kara, ¹⁵ororo ai basinema aniani, eiava Israel besena kaivakukudia basinema gaga dae henidia, dekena tauna adavana basinema kara miro henia, ¹⁶tau ta basinema kara dika henia, abitorehai toana basinema abia, kohu basinema dadi, a hitolo taudia bema ubudia bona asi dabuadia taudia bema hadabualaidia, ¹⁷imana na kara havara amo bema rua, abitorehai heatokauna eiava heatokau monidia haida basinema abi, egu hahedua herevadia bema badinadia bona egu taravatu daladia ai bema raka: una tau na tamana ena kara havara dainai basine mase; momokani ia na do baine mauri. ¹⁸A tamana, badina be moni na gwaurai-lagau amo e abiva, bona tadikakana ena kohu e dadiva, bona ena bese taudia bogaragidiai kara dia nanamo e karava, ia na ena kara havara dainai do baine mase.

¹⁹Ġau tamona, umui na o tomu “Dahaka dainai natuna basine hisihisi tamana ena kara havara dainai?” Natuna na taravatu lalonai baine ġaukara bona baine kara maoromaoro, bona egu taravatu iboudiai baine badinadia namonamo, negana ai, momokani ia na do baine mauri. ²⁰Kara dika tauna laumana na baine mase. Natuna basine hisihisi tamana ena kara havara dainai, bona tamana basine hisihisi natuna ena kara havara dainai; kara maoromaoro tauna ena kara maoromaoro na ia sibona latanai, bona kara dika tauna ena kara dika na ia sibona latanai.

Dirava ena kara na maoromaoro

²¹A kara dika tauna na ena kara dika iboudiai amo bema raka oho, bona egu taravatu iboudiai bema badinadia, bona taravatu lalodiai bema ġaukara bona bema kara maoromaoro, ia na momokani do baine mauri; ia na basine mase. ²²Kerere iboudiai, ia ese e kara ġaudia, na ta basie lalao tao ia latanai; ena kara maoromaoro dainai ia na baine mauri. ²³Ġaubada Iehova na e tomu: Edena na moalelaiamu, kara dika tauna baine mase, eiava ena dala baine rakatania bena baine mauri, a? ²⁴A kara maoromaoro tauna ese ena kara maoromaoro e rakataniamu bona kara havara e karaiamu, bona kara dika-rohorohodia e karamu, kara dika tauna heġereġerena, negana ai, ia na baine mauri, a? Ena kara maoromaorodia ta basie Lalao tao; ena koikoi karadia bona ena kara dika daidiai, ia na baine mase.

²⁵Ġau tamona umui na o tomu “Ġaubada ena dala na dia maoro”. Israel besena e, a kamonai! Egu dala na dia maoro a? Lasi, umui emui dala hari dia mamaoro ani? ²⁶Kara maoromaoro tauna ese ena kara maoromaoro baine rakatania bena baine kara havara negana ai, ia na una kara havara dainai baine mase; ena kara havara dainai do baine mase. ²⁷Ina danu, kara dika tauna ese ena kara dika baine rakatania bena taravatu lalonai baine ġaukara bona baine kara maoromaoro, ia ese ena mauri baine rauaia. ²⁸E helalo bena ena kara kerere iboudiai amo e raka oho dainai, ia na momokani do baine mauri; ia na basine mase. ²⁹Ġau tamona, Israel besena na e tomu “Ġaubada ena dala na dia maoro”. Israel besena e, egu dala na dia maoro a? Lasi, umui emui dala hari dia mamaoro ani?

³⁰Ġaubada Iehova na e tomu: Taunabunai, Israel besena e, lau ese baina hahemaoro henimui, ta ta ena dala ena dala heġereġeredia. Ba helalo kerehai, emui kerere iboudiai amo ba raka siri, kara havara ese baine hadikamui vaitani na garina. ³¹Emui kerere iboudiai, lau o kara henigu karadia, na ba negedia daure, lalo matamatadia bona lauma matamatadia bavabi. Israel besena e, ba mase anina be dahaka? ³²Badina be lau ese ta ena mase asina moalelaiamu; taunabunai, ba helalo kerehai, bena ba mauri. Ġaubada Iehova na e herevamu.

Rohe-ahu

19 ¹Israel lohiadia irohe-ahudia ba ladaia ist, ²baoto: Sinamu na daka leona hahinena, leona bogaragidiai; leona natudia bogaragidiai e goru, natuna e ubudia.

³Natuna ta e reġua,
ia na e bada oho bada oho,
damuna iabina daladia vada e diba,

- taunimanima na e anidia.
- 4 Bese idau-idau ia dainai e ko,
 edia guri ai e abia,
 igau amo e hakaua lao,
 Aigupto tanona e laohaia.
- 5 Leona hahinena e diba vada e baia,
 bona ena helaro vada e boio negana ai,
 ia ese natuna ta ma e abia,
 e reġua; bena ia na e bada oho bada oho.
- 6 Leona bogaragidiai e loa eva-eva;
 e bada oho bada oho,
 damuna iabina daladia vada e diba,
 taunimanima na e anidia.
- 7 Edia gabu aukadia na e habuadia tari,
 edia hanua na e havahudia;
 gari ese tano na e butua tao,
 bona lalonai e nohova taudia iboudiai danu,
 ena ġou reġena dainai.
- 8 Bena bese idau-idau ese ia iabina idoadia e oto hegeġe;
 edia huo ai e abia,
 edia guri ai e abia.
- 9 Mai igauna ida maua ai e udaia,
 Babulono pavapavana dekena e laohaia, e koua ahu;
 bena ia gadona na basie kamoni lou,
 Israel ororodia ai.
- 10 Sinamu na vine auna na heto,
 vine imeana lalonai,
 ranu gabuna badibadinai vada e hadoa hanai;
 huahuana momo e dobi, rigina danu momo,
 badina be ranu momo dainai.
- 11 Ia badina auka-hereana na
 pavapava ena dagi auna ai ela;
 e tubu dae,
 rigi badadia bogaragidiai;
 ia sibona atai ai e noke tao,
 mai rigina momo ida.
- 12 A hari vine auna na badu ai e raġaia oho,
 tano ai e taho dobi,
 lai mairiveina ese e hakakoroa,
 huahuana vada e huhu;
 ia badina aukana e kakoro,

lahi ese e araia ore.

¹³ Harihari ia na tano ġaġaena ai vada e hehado hanai,
tano kaukauna ai, ranu mase gabuna ai.

¹⁴ Lahi na ia badina amo vada e dae,
rigi bona huahua vada e aradia ore,
bena ia lalonai asi badi aukana ta mia,
asi dagi auna ta, pavapava ena.

Rohe-ahu bunai, e ladaia isi louloumu ġauna.

Dirava ena kara Israel ena

20 ¹Laġani ihahituna huana iha-imana dinana ihagwautana ai,
Israel tau-badadia haida na ema, Iehova enai bae henanadai
totona; bena idia na lau vairagu ai e helai.

²Bena Iehova ena hereva na egu ai e kau, eto: ³Taunimanimata natuna
e, Israel tau-badadia ba hamaorodia, baoto, Ġaubada Iehova na ini e
gwau tomamu: Lau inanadaigu oma a? Ġaubada Iehova na e tomu, Lau
na maurimu heġereġerena, umui ese lau basio nanadaigu. ⁴Oi ese ba
hahemaoro henidia a? Taunimanimata natuna e, oi ese ba hahemaoro
henidia a? Benaini, senedia edia kara dika-rohorohodia ba hadibalaidia,
⁵ba hamaorodia, baoto, Ġaubada Iehova na ini e gwau tomamu: Israel
na abia hidi dinana ai, Iakob vevena na gwau henidia hamata. Aigupto
tanona ai na hahedinarai henidia, bena na gwau henidia hamata, nato,
Lau na Iehova, emui Dirava. ⁶Una dina ai na gwau henidia hamata, nato,
Aigupto tanona amo baina hakaudia lasi, idia daidiai vada na lalo davari
tanona ta, rata bona bada-ranuna e arumu tanona, tano herea-daena,
tano iboudiai e hereadiamu ġauna, lalonai baina hakaudia vareai. ⁷Bena
na hamaorodia, nato, Ibouboumui ai, ġau dika-rohorohodia, matamui
ese e moalelaimu ġaudia, na ba negedia daure, Aigupto kaivakukudia
ediai basio hahemiro. Lau na Iehova, emui Dirava. ⁸A idia ese e daġedaġe
henigu, asie kamona henigu; ġau dika-rohorohodia, matadia ese e
moalelaiva ġaudia, na dia iboudiai ese asie negedia daure, bona Aigupto
kaivakukudia asie rakatanidia.

Bena na laloa, nato, egu badu ġaraġara na latadiai baina bubua dobi
bona egu badu na idia ihadikadia ai baina ha-orea, Aigupto tanona
ai. ⁹A lau ladagu bagunai na ġaukarava, bogaragidiai e nohova bona
vairadiai Aigupto tanona amo ihakau-lasidia ai na hahedinarai henidia
besedia vairadiai lau ladagu na basine miro totona. ¹⁰Taunabunai, lau
ese Aigupto tanona amo na hakaudia lasi, bena tano ġaġaena ai na
hakaudia vareai. ¹¹Egu taravatu na henidia, bona egu hahedua herevadia
ibadinadia ai taunimanimata bae mauri ġaudia na na hamaorolaidia. ¹²Ina
danu, egu dina helaġadia na henidia, toa ai baela, lau bona Idia padamai

ai, idia na bae diba lau Iehova ese na hahelagadiamu helaoreana. ¹³A Israel besena ese e daġedaġe henigu, tano ġaġaena ai; egu taravatu lalodiai asie raka, a egu hahedua herevadia, ibadinadia ai taunimanima bae mauri ġaudia, na e dadaraidia, bona egu dina helaġadia na e hamirodia herea.

Bena na laloa, nato, egu badu ġaraġara na latadiai baina bubua dobi, tano ġaġaena ai, bona baina ha-orea vaitani. ¹⁴A lau ladagu bagunai na ġaukarava, vairadiai na hakaudia lasi besedia vairadiai lau ladagu basine miro helaoreana. ¹⁵Ina danu, tano ġaġaena ai na gwau henidia hamata, baina henidia nato tanona, rata bona bada-ranuna e arumu tanona, tano herea-daena, tano iboudiai e herediamu ġauna, lalonai basina hakaudia vareai; ¹⁶badina be egu hahedua herevadia e dadaraidia, bona egu taravatu lalodiai asie raka, bona egu dina helaġadia e hamirodia; badina be lalodia ese edia kaivakuku e lalo tao. ¹⁷Ġau tamona, matagu ese e bogadia hisi; asina habuadia tari eiava asina ha-oredia vaitani, tano ġaġaena ai.

¹⁸Bena tano ġaġaena ai idia natudia na hamaorodia, nato, Tamamui edia taravatu lalodiai basio raka, eiava edia hahedua herevadia basio badinadia, eiava edia kaivakuku itomadiho-henidia ai sibomui basio hahemiro. ¹⁹Lau Iehova na emui Dirava; lauegu taravatu lalodiai ba raka, bona egu hahedua herevadia ba badinadia namonamo; ²⁰bona egu dina helaġadia ba matauraidia, bena toa ai baela, lau bona umui padadai, bona ba diba lau Iehova na emui Dirava. ²¹A idia natudia ese e daġedaġe henigu; egu taravatu lalodiai asie raka, bona egu hahedua herevadia; ibadinadia ai taunimanima bae mauri ġaudia, asie badinadia namonamo, egu dina helaġadia danu e hamirodia.

Bena na laloa nato, egu badu ġaraġara na latadiai baina bubua dobi, bona egu badu na idia ihadikadia ai baina ha-orea, tano ġaġaena ai. ²²A imagu na na rua, bona ladagu bagunai na ġaukara, vairadiai na hakaudia lasi besedia vairadiai lau ladagu basine miro helaoreana. ²³Ina danu, tano ġaġaena ai na gwau henidia hamata, nato, bese idau-idau bogaragidiai baina hakarohodia bona tano idau-idau ai baina hakarohodia rohoroho; ²⁴badina be idia ese egu hahedua herevadia asie badinadia, bona egu taravatu e dadaraidia, bona egu dina helaġadia e hamirodia, bona tamadia edia kaivakuku e haġeredia. ²⁵Ina danu, taravatu dikadia bona hahedua herevadia, ibadinadia ai mauri basie davaria ġaudia, na henidia; ²⁶bona sibodia edia herahia ġaudia amo na hamirodia; badina be na koidia, natudia roboadia iboudiai na ġole-oho boubou ġaudia ai bae halaodia, baina hagaridia totona. Unu na kara toma, idia na bae diba lau na Iehova helaoreana.

²⁷Taunabunai, taunimanima natuna e, Israel besena taudia ba hereva henidia, baoto, Ġaubada Iehova na ini e gwau tomamu: Ina

kara ai danu senemui ese e uduguirai, e kara koikoi henigu dainai. ²⁸Badina be na gwau hamatalaia baina henidia nato tanona lalonai na hakaudia vareai negana ai, idia ese ororo latana ta eiava rauna urumona auna e itaia negadia iboudiai na edia boubou ġaudia na unuseni ai e hahelaġadia, bona edia herahia karadia amo danu e habadugu. Unuseni ai taunimanima lalodia ihanamodia bonadia e hadaedia, bona unuseni ai danu edia inuinu bouboudia uduhia ahudia e bubu nege. ²⁹(Na hamaorodia, nato, Atai gabuna o lao heniamu be edena? Taunabunai, ia ladana e hatoamu Bama,ⁱ ema bona ina dina.) ³⁰Taunabunai, Israel besena ba hamaoroa, baoto, Ġaubada Iehova na ini e gwau tomamu: Senemui heġereġeredia ai ba hahemiro, bona edia ġau dika-rohorohodia igavadia ai ba raka siri, a? ³¹Emui herahia ġaudia o henimu, bona natumui mamaruanedia na ġole-oho boubou ġaudia ai o halaodiamu, negadia ai na umui na sibomui o hahemiromu, emui kaivakuku iboudiai ida, ema bona ina dina. Israel besena e, ba nanadaigu a? Ġaubada Iehova na e tomu: Lau na maurimu heġereġerena, umui na basio nanadaigu.

³²Emui lalo-hadai anina na nega ta ai basine vara; o laloamu, o tomu “Bese idau-idau, tano idau-idau besedia, heġereġeredia ai baia hahelao, au bona nadi baia toma henidia diho”.

³³Ġaubada Iehova na e tomu: Lau na maurimu heġereġerena, momokani mai imagu goadana bona mai imagu itoi-rorona bona mai badu-hebubugu ida baina pavapavamui. ³⁴Bese idau-idau bogaragidia amo baina hakaumui lasit bona lalodiai vada o karo ho rohoroho tanodia amo baina gogomui, mai imagu goadana bona mai imagu itoi-rorona bona mai badu-hebubugu ida. ³⁵Bena bese idau-idau edia tano ġaġaena ai baina hakaumui vareai; unuseni ai hevaira-hehenida ai baina hahemaoro henimui. ³⁶Aigupto tano-ġaġaena ai senemui na hahemaoro henidia heġereġerena ai umui danu baina hahemaoro henimui. Ġaubada Iehova na e herevamu. ³⁷Itotohi henuna amo baina harakamui hanai, bona ta ta amo baina harakamui vareai. ³⁸Daġedaġe taudia bona egu taravatu e tata utumu taudia na umui bogaragimui amo baina negedia daure, e noholaiamu tanona amo baina hakaud a lasi, a Israel tanona lalonai basie raka vareai. Bena ba diba lau na Iehova.

³⁹A oi, Israel besena e, Ġaubada Iehova na ini e gwau tomamu: Bema basio kamoni henigu, vada baola, ta ta ena kaivakuku ena kaivakuku isiadia ba lao heni, harihati bona nega gabedia ai danu; a lau ladagu helaġana na emui herahia ġaudia eiava emui kaivakuku amo nega ta ai basio hamua lou.

⁴⁰Ġaubada Iehova na e tomu: Badina be egu ororo helaġana ai, Israel ororona dorina ai, unuseni ai Israel besena idoinai, ena taunimanima

ⁱ 20.29 “Bama” anina na “atai gabuna”.

iboudiai, ese lau isiaigu bae lao heni una tano ai. Unuseni ai baina abidia dae; unuseni ai emui harihari g̃audia bona emui herahia g̃audia herea-daedia na emui ai baina gwaurai, bona emui boubou g̃audia helaḡadia danu. ⁴¹Bese idau-idau bogaragidia amo baina hakaumui lasi bona lalodiai o karoho rohoroho tanodia amo baina gogomui negana ai, lau ese baina abimui dae, bonana namo g̃auna na heto. Itelaḡagu na umui bogaragimui ai baina hahedinarai, bese idau-idau vairadiai. ⁴²Bena Israel tanona, senemui na gwau henidia hamata baina henidia nato tanona, Ialonai baina hakaumui vareai negana ai, umui na ba diba lau na Iehova. ⁴³Unuseni ai emui dala bona sibomui o hahemirolai karadia iboudiai na ba lalodia une; bena sibomui ba hedadarai, emui kara dika iboudiai daidiai. ⁴⁴Bena lau ladagu bagunai baina kara henimui, dia emui dala dikadia eiava emui kara bodagadia heḡereḡeredia, negana ai umui ba diba lau na Iehova. Israel besena e, G̃aubada Iehova na e herevamu.

⁴⁵Iehova ena hereva na egu ai e kau, eto, ⁴⁶Taunimanima natuna e, talaimu na diho kahana ba henia, diho kahana latanai ba haroro, bona diho kahana uda-tanona latanai ba peroveta. ⁴⁷Hari diho kahana udana ba hamaoroa, baoto, Iehova ena hereva ba kamoni. G̃aubada Iehova na ini e gwau tomamu: A itaia, oi lalomu ai lahi ta baina ha-araia; bena una lahi ese au mauridia iboudiai bona au masedia iboudiai na baine aradia ore; ta ese lahi hururu-hururuna basine habodoa, bona vaira iboudiai, diho kahana amo ela bona mirigini kahana, na baine hodaridia. ⁴⁸Taunimanima iboudiai na bae diba lau Iehova ese na ha-araia; bena ta ese basine habodoa. ⁴⁹Bena lau nato, G̃aubada Iehova e, idia ese e herevalaigumu, e tomu “Ia na sivarai heḡereḡeredia igwauraidia tauna ani?”

Iehova ena dare

21 ¹Iehova ena hereva na egu ai e kau, eto, ²Taunimanima natuna e, talaimu na Ierusalem ba henia, bona gabu helaḡadia latadiai ba haroro. Israel tanona latanai ba peroveta; ³Israel tanona ba hereva henia, baoto, Iehova ini e gwau tomamu: Lau ese oi na inai henimumu; egu dare na iudalaina pauana amo baina veria lasi, bena kara maoromaoro taudia bona kara dika taudia na oiemu amo baina utudia oho. ⁴Badina be kara maoromaoro taudia bona kara dika taudia na oiemu amo baina utudia oho dainai, egu dare na iudalaina pauana amo baine lasi, taunimanima iboudiai, diho kahana amo ela bona mirigini kahana, ihadikadia totona. ⁵Bena taunimanima iboudiai bae diba, lau Iehova ese egu dare na iudalaina pauana amo vada na veria lasi; g̃auna na basine hetoi vareai lou. ⁶Taunabunai, taunimanima natuna e, ba ganaḡana, mai dara-dokomu bona mai lalo-hisihisimu iditana ida ba ganaḡana, idia

vairadiai. ⁷Bena idia ese bae hereva henimu, baeto “Dahaka dainai o ḡanaḡanamu?” negana ai, baeto “Ini hari daidiai. Baine kau negana ai, dara iboudiai bae doko, bona ima iboudiai bae manoka, lauma iboudiai bae daure, bona tui iboudiai bae manoka-manoka ranu na heto. A ilaia, ia na e maimu, bona karana na baine ḡuḡuru”. Ḡaubada Iehova na e herevamu.

⁸Bena Iehova ena hereva na egu ai e kau, eto, ⁹Taunimanima natuna e, a peroveta, baoto, Iehova ini e gwau tomamu: Baoto

Dare ta, dare ta vada e segea,
vada e hakimore-kimorea danu;

¹⁰vada e segea, ala-ala totona,
vada e hakimore-kimorea, kevaru na heto baine kevaru-kevaru totona.

Eiava baita moale hebou a? Natugu e, hekwadi auna vada o dadaraia, bona au amo e kara ḡaudia iboudiai danu. ¹¹Taunabunai, dare na vada e heni lao, bae hakimore-kimorea, bona imadia ai bae abia kau totona; vada e segea bona vada e hakimore-kimorea, ala-ala tauna iunana ai bae atoa totona. ¹²Taunimanima natuna e, a tai, a tai lolololo. Badina be ia na egu bese ihadikana bona Israel lohiadia iboudiai ihadikadia ḡauna; idia na egu bese taudia ida vada e heni, dare ena. Taunabunai, mamumu ba pata. ¹³Badina be ia na dia hahetoho. Hekwadi auna boma dadaraia, ia ese dahaka bema havaraia diba? Ḡaubada Iehova na e herevamu.

¹⁴Taunabunai, taunimanima natuna e, ba peroveta; imamu ba pata dagu, bena dare na baine dapadapa nega harua, oibe nega hatoi, taunimanima iala-masedia darena, ia na heala-ala badana darena, e ḡeḡedia ahumu ḡauna. ¹⁵Bena daradia na bae doko bona hutuma na edia ikoukou iboudiai lalodiai bae hekida diho totona, lau ese dare kimore-kimorena vada na heni; ia na kevaru na heto e kevaru-kevarumu; vada e hakimore-kimorea, ala-ala totona. ¹⁶Idibamu ai bona launmu ai ba lapalapa, emu dare isena e lapa henimu gabudia. ¹⁷Lau ese danu imagu baina pata dagu, egu badu ḡaraḡarana baina ha-orea. Lau Iehova vada na hereva.

¹⁸Bena Iehova ena hereva na egu ai ma e kau, eto, ¹⁹Taunimanuna natuna e, Babulono pavapavana ena dare daladia rua toadia ba kara; ruaosi na tano tamona amo baema. Bona toa auna ba haginia, hanua dalana badi-tanona ai. ²⁰Dare ena mai dalana toana ba karaia; Raba, Amono taudia edia hanua, bona Iuda, bona Ierusalem, hanua mai maguna, baine mai henidia. ²¹Badina be Babulono pavapavana na dala katakata ai e ginimu, dala ruaosi badi-tanodia baine bagu haoro totona; diba e rubediamu, ena dirava laulaudia e nanadaidiamu, ase ai toa e tahudiamu. ²²Ia imana idibana ai Ierusalem hanua e hedinaraimu, lolo-dagu ihavarana, hanua iduaradia igwadadia vaḡomadia iato-hatadia,

tano ilarebana, bona hanua iġegelaina kohorodia ihaginidia. ²³A idia ese mamina bae abia, bagu-haoro koikoina na heto; idia ese gwauhamata helaġadia vada e gwaurai; a ia ese edia kerere e hahelalolaidia une, bae heabi mauri totona.

²⁴Taunabunai, Ġaubada Iehova na ini e gwau tomamu: Badina be emui kerere ihelalolaidia na taunimanima lalodiai vada o havaraia, bona emui kara kerere vada o hulalalaidia, bena emui kara iboudiai lalodiai emui dika e hedinaraimu, bona badina be umui na sibomui o helalo unemu, una dainai emui kara dika lalodiai bae abimui. ²⁵Oi danu, Israel pavapavana, tau dikana, o hahemiro taumu, emu dina vada e kau, davamu bavabia vaitani negana vada e kau. ²⁶Ġaubada Iehova na ini e gwau tomamu: Kwara dabuana ba ruhaia oho, kwara ivavalaina ġauna ba kokia oho; harihari e miamu ġaudia na basie mia; henu ai e miamu ġauna na ba hadaea, atai ai e miamu ġauna na ba hadihoa. ²⁷Baina havahua, baina havahua, sisina taina basine mia, ela bona ia biaguna korikorina bainema; bena ia baina henia.

Hahemaoro Amono taudia latadiai

²⁸Taunimanima natuna e, ba peroveta, baoto, Ġaubada Iehova ese Amono taudia mai edia heġonaġonalai herevadia ida ini e herevalaidia tomamu. Baoto: Dare ta, dare ta vada e veria lasi, ala-ala totona. Vada e hakimorekimorea, baine hururu-hururu bona baine kevaru-kevaru. ²⁹Idia ese oi daimu ai e mata hanai koikoimu bona e bagu haoro koikoimu lalonai, una dare na kara dika taudia, e hahemiro taudia, aiodia ai baine heato; edia dina vada e kau, davadia bae abi vaitani. ³⁰Iudalaina pauana lalonai ba udaia lou. E havaramu gabuna ai, emu vara tanona korikorina ai, lau ese baina hahemaoro henimu. ³¹Egu badu na latamu ai baina bubua dobi; egu badu-ġaraġara lahina amo baina pururumu; daġedaġe taudia, hahebua-tari mai dibadia taudia, imadia ai baina atomu. ³²Oi na lahi auna ai baina halaomu; oi raramu na tano bogaraginai baine mia; badina be lau Iehova vada na hereva.

Ierusalem ena kara dika

22 ¹Iehova ena hereva na egu ai ma e kau, eto, ²Oi danu, taunimanima natuna, ba hahemaoro heni a? Ina hanua mai rarana ba hahemaoro henia a? Benaini, ena kara dika-rohorohodia iboudiai ba gwaurai henia. ³Oi na baoto, Ġaubada Iehova na ini e gwau tomamu: Hanuana binai, bogaraginai rara e hahebubuamu, ena nega baine kau helaoreana, bona kaivakuku e karamu, ia sibona ihamirolaina. ⁴Oi na vada o kerere, vada o hahebubua rarana dainai; bona vada o miro, vada o kara kaivakukudia daidiai; emu nega vada o hakwadogia, vada e gwaurai henimu laġanidia vada e ore. Taunabunai, hedunirai

gāuna ai vada na halaomu, bese idau-idau ediai, bona hegonaḡonalai gāuna, tano iboudiai ediai. ⁵Harimu dika-rohoroho gāuna, heloḡo-ahuahū hānuana, e noho hetabiramū taudia bona daudaudia ai e nohomū taudia ese bae ḡonaḡonalaimū.

⁶A itaia, oi lalomū ai Israel lohiadia, ta ta ena siahū ena siahū heḡereḡeredia ai, lalodia na rara ihaheubuna vada e uralai bada. ⁷Oi lalomū ai tama bona sina na e hahemataidiamū; oi bogaragimū ai noho hedoa tauna na gwaurai-lagau karadia amo e hahisiamū; oi lalomū ai ihareha bona vabu e kara dika henidiamū. ⁸Egū ḡau helaḡadia vada o dadaraidia; egū dina helaḡadia vada o hamirodia. ⁹Oi lalomū ai haida ese e hahebademū, rara ihaheubuna totona; oi lalomū ai haida ese ororo ai e ani rahimū; oi bogaragimū ai haida ese lebulebu karadia e karamū. ¹⁰Oi lalomū ai haida ese tamadia edia gedā e hamirodiamū; oi lalomū ai hahine na edia rara-kara dinadia ai e hahemaraidiamū. ¹¹Ta na dekena tauna adavana ida e heuda hanaimū; ma ta na rava-maragi hahinena ida e eno boumū; ma ta oi lalomū ai na ia taihuna korikorina ida e eno boumū. ¹²Oi lalomū ai haida ese dava e abimū, rara ihaheubuna totona; heatokau monidia o abimū, bona gwaurai-lagau karadia ai dekemū taudia o dadihaidia; vada o lalogu boio. Gaubada Iehova na e herevamu.

¹³Taunabunai, a itaia, lau ese imagu ruaosi na tutu hekapumū, moni vada o abi koikoi bona rara na bogaragimū ai vada e hebubu daidiai. ¹⁴Baina kara henimū dinadia ai na emū haheauka baine hesiriu eiava imamū bae goada a? Lau Iehova vada na hereva, bona karana do baina karaia. ¹⁵Baina hakarohomū, bese idau-idau bogaragidiai, bona tano idau-idau ai baina hakarohomū rohoroho; bona emū miro na bogaragimū amo baina ha-orea. ¹⁶Bena oi daimū ai lau ladagu baine miro bese idau-idau vairadiai; bena ba diba lau na Iehova.

¹⁷Bena Iehova ena hereva na egū ai e kau, eto: ¹⁸Taunimanima natuna e, Israel besena na momo ai vada ela lauegū ai; iboudiai na *silver* bona auri labora-laborana bona auri hururu-hururuna bona auri bona auri metauna lahi lalonai na heheto. Momo ai vada ela. ¹⁹Taunabunai, Gaubada Iehova na ini e gwau tomamū: Umū iboumū ai na momo ai vada o hahelao dainai, taunabunai, a itaia, lau ese Ierusalem bogaraginai baina haboumū. ²⁰Taunimanima ese *silver* bona auri labora-laborana bona auri bona auri metauna bona auri hururu-hururuna na lahi ai e haboumū, bena lahi e hahururuhururuamū idia ihavevedia totona, unuheto lau ese egū badū ai bona egū badū ḡaraḡara ai baina haboumū, lahi lalonai baina atomū vareai, baina havevemū. ²¹Baina haboumū, egū badū ḡaraḡara lahina ai baina pururumū, bena ia bogaraginai ba veve oho. ²²*Silver* na lahi ai e haveveamū na heto, lau ese egū badū ai baina havevemū; bena ba diba lau Iehova ese egū badū na latamū ai vada na bubua dobi.

²³Bena Iehova ena hereva na egu ai e kau, eto, ²⁴Taunimanima natuna e, ba hamaoroa, baoto, Oi na asie haḡoevaia tanona, eiava latana badu dinana ai medu se diho tanona. ²⁵Ia bogaraginai ena lohia verina na e goumu bona damuna e dareamu leonana na heto; idia ese taunimanima edia mauri vada e ha-oredia; kohu namo-hereadia bona dava bada ḡaudia vada e dadidia, hahine momo vada e havabudia ia bogaraginai. ²⁶Ena hahelaḡa taudia ese egu taravatu vada e tataia utu, bona egu ḡau helaḡadia vada e hamirodia; ḡau helaḡadia bona ḡau asi helaḡadia asie ha-idaudia, bona ḡau mirodia bona ḡau ḡoevaḡoevadia vada e hatamonadia; bona egu dina helaḡadia asie badinadia; unu amo idia ese lau ladagu vada e hamiroa. ²⁷Ena lohia verina ia bogaraginai na uda sisiadia na heheto; damudia e daremu, rara e hahebubuamu, bona taunimanima edia mauri e ha orediamu, unu amo kohu e ḡaunai.

²⁸Ena peroveta taudia danu ahu ai e hedahu, vada e mata hanai koikoi bona vada e bagu haoro koikoi idia daidiai; vada eto “Ḡaubada Iehova na ini e gwau tomamu”, a ḡau be Iehova se gwa. ²⁹Tano taudia ese dava vada e gwaurai lagau, bona dadidadi karadia vada e kara; ogoḡami tauna bona e dabumu tauna vada e hahisia, bona noho-hedoa tauna enai dava vada e gwaurai lagau, ena ḡau na asi iabi-louna dalana.

³⁰Bena idia bogaragidiai tau ta na tahua, maḡu baine hagina, bona e mauru gabuna ai lau vairagu ai baine gini, tano igimana totona baina habuaia tari na garina; a tau ta asina davaria. ³¹Taunabunai, egu badu na idia latadiai vada na bubua dobi; egu badu-ḡaraḡara lahina ai vada na ha-aradia; edia kara davana vada na haloua, idia kwaradia ai. Ḡaubada Iehova na e herevamu.

Sivarai heḡereḡere: Tadikaka rarua

23 ¹Iehova ena hereva na egu ai e kau, eto, ²Taunimanima natuna e, hahine rarua e nohova, hahine tamona natuna. ³Idia ese ariara karadia e karava, Aigupto ai; ulatodia ai ariara karadia e karava. Unuseni ai tatau haida ese kemedi e rosidia; bona ulato rami-heboudia ai ratadia e ḡiḡidia. ⁴Hane guna ladana na Ohola; ia tadina ladana na Oholiba. Lau ese na adavadia; bona idia ese natudia mamaruanedia bona hahinedia e havaradia. Ladadia anidia na iniheto: Ohola na Samaria, bona Oholiba na Ierusalem.

⁵Ohola na lau adavagu negana ai, ia ese ariara karadia e karava; e ura heniava taudia, Asuria taudia, na e mata dika heniava. ⁶Idia na tuari taudia, dabua kakakakadia e hahedokilaiva; idia na hekwara taudia bona tuari lohiadia; iboudiai na eregabe taudia namo-hereadia, hosi ai e guiva taudia. ⁷Ia ese e kara lebulebu henidia; iboudiai na Asuria taudia ḡoevadaedia; bona e mata dika henidia taudia iboudiai edia kaivakuku iboudiai ediai e hahemiro. ⁸Ena ariara karadia, Aigupto ai e nohova dinadia amo

vada e kara, na se hadokodia; badina be ulatona ai tatau na ia ida e eno bou, bona ulato rami-hebouna ai idia ese ratana e g̃ig̃idia; bona e kara lebulebu henia. ⁹Taunabunai, e ura heniava taudia, hari Asuria taudia, ia ese e mata dika henidia taudia, imadia ai na atoa. ¹⁰Idia ese ena gEDA e hamiroa; ia natuna mamaruanedia bona hahinedia na e dabaidia tao, a ia be dare amo e alaia mase; hahemaoro na ia latanai vada e haḡuḡurua negana ai, ia na gwaurai-gwaurai herevana ai ela hahine bogaragidiai.

¹¹Ina kara na ia tadina Oholiba ese e itaia, ḡau tamona ia ese kakana e hereaia, ena mata dika ai bona ena ariara karadia ai; unu kara ai kakana na dika, a ia be dika herea. ¹²Ia ese Asuria taudia e mata dika henidia; hekwara taudia bona tuari lohiadia, edia auri dabuadia e hahedokilaiva taudia, edia hosi ai e guiva taudia, iboudiai na eregabe taudia namo-hereadia. ¹³Bena na itaia, vada e miro vaitani; idia raruosi na dala tamona ai vada e raka. ¹⁴A ia ese ena ariara karadia ma e habada; ia ese tatau laulaudia haba ai e raraidia, Kaldea taudia laulaudia, muramura kakakakana amo vada e tore ḡaudia, ¹⁵mai edia gaba ḡaudia koekoedia ai bona edia kwara dabuadia kwaradia ai, iboudiai ita-itadia na lohia taudia, Kaldea taudia, Babulono tanona ai e nohomu taudia, laulaudia. ¹⁶E itadia negana ai na e mata dika henidia; bena gwaukau taudia na dekedia e siaidia lao Kaldea ai. ¹⁷Bena Babulono taudia na ia dekena ela, ia ida e eno bou, ela bona edia lebulebu karadia amo e hamiroa. E hamiroa murinai, ia ese e rakatanidia mai hedadaraina ida. ¹⁸Ena ariara karadia e kara hedinarai bona tau-anina e heaḡilaia negana ai na na rakatania mai hedadaraigu ida, kakana na rakatania heḡereḡerena. ¹⁹To, ia ese ena ariara karadia e habada, hane-ulatona negana e laloa tao; una negana ai ia ese ariara karadia e karava Aigupto tanona ai; ²⁰unuseni ai ia e ura heniava taudia, taudia reḡedia na doniki reḡedia na heheto bona natudia na hosi natudia na heheto taudia, na ia ese e mata dika henidia. ²¹Unuheto hane-ulato ai Aigupto taudia ese kememu e rosia bona ratamu e g̃igi negana ai lebulebu karadia o karava na oi ese o lalodia tao, mai lalo-hekisehekisemu ida.

²²Taunabunai, Oholiba e, Ḡaubada Iehova na ini e gwau tomamu: A itaia, e ura henimumu taudia, mai hedadaraimu ida o rakatanidia taudia, na baina hatoredia isi, kaha iboudiai amo baina haboudia, oi ihadikamu totona: ²³Babulono taudia bona Kaldea taudia iboudiai, Pekodo bona Soa bona Koa taudia, bona Asuria taudia iboudiai idia ida, iboudiai na eregabe taudia namo-hereadia bona hekwara taudia bona tuari biagudia, lohia taudia bona tuari taudia, iboudiai danu hosi gui taudia. ²⁴Idia na oi ihadikamu totona mirigini kahana amo baema, mai edia kariota bona edia rerue bona edia ore a taudia hutuma ida. Idia ese bae koumu heḡeḡe, mai edia keme auridia bona edia kesi bona edia kwara ḡaudia, bona sياهو baina henidia bae hanemaoro, bena edia hahemaoro herevadia

amo bae hahemaoro henimu. ²⁵Bena egu badu na baina siai henimu, edia badu ġaraġara ai bae kara henimu totona. Idia ese udu-baubaumu bona taïamu bae utudia oho, bona emu roho-mauri taudia na dare ai bae mase. Idia ese natumu mamaruanedia bona hahinedia bae dabaidia tao, bona emu roho mauri taudia na lahi ese baine aradia ore. ²⁶Idia ese danu emu dabua bae hadokidia oho, bona emu herahera nadidia namo-hereadia bae abidia oho. ²⁷Unuhetomana lau ese emu lebulebu bona emu ariara karadia, Aigupto amo o mailai, na baina hadokodia; una dainai, Aigupto taudia na basio gaga dae henidia lou, bona basio lalodia tao lou. ²⁸Badina be Ġaubada Iehova na ini e gwau tomamu: A itaia, lau ese o inai henidiamu taudia, mai hedadaraimu ida o rakatanidia taudia, imadia ai baina atomu; ²⁹bena daġedaġe ai bae kara henimu, emu hekwarahi anina idoinai bae abia oho, gagaemu ai bae rakatanimu, bena emu ariara karadia anidia korikori bae hedinarai. Emu lebulebu bona emu ariara karadia ese ³⁰ina kara na latamu ai vada e hadihoa, badina be bese idau idau ida ariara karadia o kara, bona edia kaivakuku ediai o hahemiro. ³¹Kakamu ena dala ai vada o raka; taunabunai iena kehere na oi imamu ai baina atoa. ³²Ġaubada Iehova na ini e gwau tomamu:

Kakamu ena kehere amo ba inu,

ia na bada bona dobu;

bae kirikirilaimu, bae ġonaġonalaimu,

badina be anina na bada;

³³kekero bona lalo-hisihisi ese

bae hahonumu.

Kakamu Samaria ena kehere na

gari-bada bona lauma-daure keherena;

³⁴ba inua, anina ba ha-orea;

huimu ba tapusia bona kememu ba kakasia.

Badina be Ġaubada Iehova na e tomu, Lau vada na hereva. ³⁵Taunabunai, Ġaubada Iehova na ini e gwau tomamu: Badina be vada o lalogu boio bona murimu ai vada o negegu, una dainai emu lebulebu bona emu ariara karadia davadia bavabi.

³⁶Iehova ese e hamaorogu, eto, Taunimanima natuna e, Ohola bona Oholiba ba hahemaoro henidia a? Benaini, edia kara dika-rohorohodia ba gwaurai henidia. ³⁷Badina be idia na vada e heuda hanai, bona rara na imadia ai; edia kaivakuku ida vada e heuda hanai; bona natudia mamaruanedia, lauegu amo e abidia memerodia, na boubou karana ai idia e henidia, adia. ³⁸Ina danu vada e kara henigu: dina tamona ai egu gabu helaġana bona egu dina helaġadia vada e hamirodia. ³⁹Badina be natudia e aladia mase, edia kaivakuku iboulaidia ġaudia ai e halaodia, dinana lalonai idia ese egu gabu helaġana lalonai e didi vareai, bae hamiroa totona. A itaia, egu dubu ai unu e kara toma. ⁴⁰Idia ese danu

gwaukau tauna ta e siaia lao, dauha amo tatau haida baema; bena vada ema. Idia daidiai o digu, matamu o ouden, bona taumu o haheraia; ⁴¹ege-diho patana namo-hereana ai o helai; ia vairanai pata ta o atoa, bona egu muramura mai bonana bona egu deho na pata latanai o atodia. ⁴²Hutuma edia moale regedia na taiana ai; bona gunika taudia na tano gaagaena amo e hakaudia mai, kekero taudia; bena vaqivaqi na hahine imadia ai e atodia, bona havava gaudia mai hairaidia na kwaradia e havavalaidia.

⁴³Bena lau nato, Tatau na ia ida e eno boumu negadia ai, idia na asie heuda hanaimu a? ⁴⁴Badina be idia na ia dekenai vada e raka vareai, haida ese ariara hahinena dekenai e raka vareaimu na heto. Ohola bona Oholiba dekediai unu e raka vareai toma, bae kara lebulebu totona.

⁴⁵A ka a maoromaoro taudia ese bae hahemaoro henidia, heuda-hanai hahinedia bona rara ihahebubuna hahinedia davadia bae henidia; badina be idia na heudahanai hahinedia, bona rara na imadia ai.

⁴⁶Badina be Gaubada Iehova na ini e gwau tomamu: Tuari oreana ba hakaua mai, gari ihavarana gauna ai bona dadidadi gauna ai ba halaodia. ⁴⁷Bena hari tuari oreana taudia ese nadi amo bae hododia bona edia date amo bae aladia mase; natudia mamaruanedia bona hahinedia danu bae aladia mase, bona edia ruma bae doudia. ⁴⁸Unu amo lebulebu karadia na tano ai baina hadokodia, hahine ese nahuadia bae toho totona, bena lebulebu karadia basie kara, umui vada o kara hegeregeredia. ⁴⁹Bena emui lebulebu davana do bavabia, bona emui kara dika ai kaivakuku o toma henidia diho na davadia bavabi; bena vada ba diba lau na Gaubada Iehova.

Hereva hegeregerena: Uro mai deqideqina

24 ¹Laqani ihataurahani-tana huana ihagwautana dinana ihagwautana lalonai, Iehova ena hereva na egu ai e kau, eto, ²Taunimanima natuna e, Ina dina, hari ina dina, ladana ba torea; Babulono pavapavana ese Ierusalem vada e koua hegeqe, hari ina dina ai. ³Hereva hegeregerena na ina gwau-edeede besena ba gwaurai henia, baoto, Gaubada Iehova na ini e gwau tomamu:

Uro ba laia kau, ba laia kau;
ranu na ia lalonai ba seia danu.

⁴Hidio taidia ba uda dobi,
namodia, koekoe bona paqa;
turia namo-hereadia amo ba hahonua.

⁵Mamoe goeva-daena ta bavabia,
lahi audia ba rakudia,
hidio taidia ba nadudia,
mai turiana ida ba nadua.

⁶Taunabunai, Ġaubada Iehova na ini e gwau tomamu: Hanua mai rarana madi ihabaina! Uro mai deġideġina, deġideġina do asie negea ġauna, madi ihabaina! Hidio taidia taidia na ia lalona amo ba vai dae, namodia bona dikadia basio hididia. ⁷Badina be rarana, vada e hebubua ġauna, na dounu ia bogaraginai; nadi latanai e atoa, tano ai se bubua bena ġahu ese se tahunia. ⁸Egu badu ihavarana bona dava iabina totona, ia ese e hahebbubua rarana na lau ese nadi latanai vada na atoa, basine hetahuni helaoreana. ⁹Taunabunai, Ġaubada Iehova na ini e gwau tomamu: Hanua mai rarana madi ihabaina! Lau ese danu senu baina habadaia. ¹⁰Lahi audia momo ba raku, Iahi ba ha-araia, hidio ba nadua namonamo, vasiahu ba seia oho, turia ba haġoledia oho. ¹¹Bena asi anina ai gida latadai bavatoa kau, baine siahu totona, bena aurina labora-laborana na baine kiama-kiama; bena mirona na baine veve ia lalonai, bona deġideġina na baine ara ore. ¹²Vada na hekwarahi kava; ia deġideġina udunanana lahi ai se oremu. ¹³Deġideġina na oiemu lebulu miro-hereana. Badina be bama haġoevamu, to emu miro badana amo asio goeva; basio ġoevaġoeva lou ela bona egu badu na baina hagugurua latamu ai. ¹⁴Lau Iehova vada na hereva; ina na baine vara, lau ese baina karaia; lau na basina helalo lou, basina hebogahisi, basina helalo kerehai. Emu dala bona emu kara heġereġeredia ai baina hahemaoro henimu. Ġaubada Iehova na e herevamu.

Esekiel adavana e mase

¹⁵Iehova ena hereva na egu ai ma e kau, eto, ¹⁶Taunimanima natuna e, mata-kunumai tamona ai oi matamu ihamoalena baina abia oho, ġau tamona lalomu basine hisihisi bona basio tai, bona iruru-matamu basie diho. ¹⁷Ba hahodi, to basio ġanaġana; mase taina basio tai. Dabua na kwaramu ba kumilaia, bona tamaka na aemu ai ba kara; udumu basio ġovaia, bona basio ani helaġa. ¹⁸Taunabunai, daba ai lau ese taunimanima na hereva henidia, bena adorahi ai adavagu na e mase. Bena daba rerenai, e haġanigu heġereġerena ai na kara.

¹⁹Bena taunimanima ese e nanadaigu, eto, Ini ġau anidia emai ai, bona ini o kara karadia anidia, basio hamaoromai a? ²⁰Bena na haere henidia, nato, Iehova ena hereva na egu ai e kau, eto, ²¹Israel besena ba hamaoroa, baoto, Ġaubada Iehova na ini e gwau tomamu: A itaia, egu gabu helaġana baina hamiroa, emui siahu iheaġilaina toana, matamui ese e moalelaimu ġauna, laumamui ese e uralaiamu ġauna; bena natumui mamaruanedia bona hahinedia unusenai ai o rakatanidia na dare amo bae mase. ²²Bena-lauegu kara heġereġerena ai do ba kara; udumui basio ġovadia bona basio ani helaġa. ²³Kwaramui dabuadia na kwaramui ai bae mia, bona emui tamaka na aemui ai bae mia; lalomui basie hisihisi bona basio taitai, a emui kara havara ai ba varoda-varoda, bona ba heġanaġana heheni. ²⁴Unuhetomana, Esekiel na

toa ta ai baina emui ai, ia ese e kara karadia iboudiai hegeregeredia, umui ese ba kara. Ina na baine kau negana ai, ba diba lau na Ġaubada Iehova.

²⁵iBona oi, taunimanima natuna e, edia gabu aukana, edia moale bona edia hairai, matadia ese e moalelaimu bona lalodia ese e uralaiamu ġauna, bona natudia mamaruanedia bona hahinedia danu, na edia amo baina abidia oho dinana ai, ²⁶una dina ai heau tauna ta na dekemu baina, hari baine hamaorolaimu. ²⁷Una dina ai, udumu baine hekeho una heau tauna enai; vada ba hereva, basio mu lou. Unu amo oi na toa ta ai baola, idia ediai; bena bae diba lau na Iehova.

Peroveta herevana Amono taudia latadiai

25 ¹Iehova ena hereva na egu ai e kau, eto, ²Taunimanima natuna e, talaimu na Amono taudia ba henidia, bona idia latadiai ba peroveta. ³Amono taudia ba hamaorodia, baoto, Ġaubada Iehova ena hereva ba kamoni. Ġaubada Iehova na ini e gwau tomamu: Badina be umui oto “Aha” egu gabu helaġana latanai, bona Israel tanona latanai, e havahua negana ai, bona Iuda besena latanai, dauhai e hanohoa negana ai; ⁴una dainai lau ese mairiveina kahana taudia imadia ai na atomuimu, idia ese edia ai bae halaomui, bona bogaragimui ai bae taruha bona bae noho; idia ese emui auhahua bae ani bona emui rata bae inu. ⁵Raba na kamelo edia rei gabuna ai baina halaoa, bona Amono taudia edia hanua na mamoe seridia edia maġu ai baina halaoa. Bena ba diba, lau na Iehova. ⁶Badina be Ġaubada Iehova na ini e gwau tomamu: Badina be imamui vada o tutu bona aemui vada o pana, bona emui badu lalonai Israel tanona ihadikana o moalelaia, ⁷una dainai, a itaia, imagu na vada na toia roro, umui ihadikamui, bona bese idau-idau imadia ai baina atomui, edia ai bae halaomui; bena bese idau-idau edia amo baina negemui daure, bona tano idau-idau lalodia amo baina hamasemui, baina habuamui tari. Bena ba diba, lau na Iehova.

Peroveta herevana Moab latanai

⁸Ġaubada Iehova na ini e gwau tomamu: Badina be Moab eto “A itaia, Iuda besena na bese idau-idau iboudiai hegeregeredia”, ⁹una dainai lau ese Moab igimana na kaha ta amo baina abia oho, ena tano hetoana hanuadia amo baina abia oho; unu na tano hairaina, Bet-iesimoto, Baal-meono, Kiriataimi. ¹⁰Una tano, Amono taudia ida, na mairiveina kahana taudia baina henidia, edia ai bae halaoa, bena bese idau-idau bogaragidiai ta ese basine laloa tao lou; ¹¹bona Moab na baina hahemaoro henia. Bena idia na bae diba lau na Iehova.

Peroveta herevana Edom latanai

¹²Ġaubada Iehova na ini e gwau tomamu: Badina be Edom ese Iuda besena taudia edia daġedaġe e hadava henidia, bona e kerere

dikadika idia ihadava-henidia ai, ¹³una dainai Ġaubada Iehova na ini e gwau tomamu: Lau ese imagu na baina toia roro, Edom ihadikana, taunimanima bona ubu-ubu ġaudia na iena amo baina negedia daure. Baina havahua; bena Teman amo ela bona Dedan idia na dare ai bae mase. ¹⁴Egu hahedava-heni na Edom latanai baina atoa kau, egu bese Israel taudia imadia ai; Edom ai bae ġaukara, egu badu bona egu badu-ġaraġara heġereġeredia ai; bona egu hahedava-heni bae diba. Ġaubada Iehova na e herevamu.

Peroveta herevana Filistia taudia latadiai

¹⁵Ġaubada Iehova na ini e gwau tomamu: Badina be Filistia taudia na e hahedava heni, bona edia badu ai hahedava-heni karadia e kara, miahanaihanai heinai-hehenina ai bae hahebua tari totona; ¹⁶una dinai Ġaubada Iehova na ini e gwau tomamu: A itaia, lau ese imagu na baina toia roro Filistia taudia ihadikadia, bona Kerete taudia baina negedia daure, bona kone kahana orena na baina habuaia tari. ¹⁷Lau ese hahedava-heni badana baina karaia idia latadiai; mai badugu ida davadia baina henidia. Bena egu hahedava-heni na latadiai baina atoa negana ai, idia na bae diba lau na Iehova.

Peroveta herevana Turo latanai

26 ¹Laġani ihagwauta-tana lalonai, hua dinana gini-gunana ai, Iehova ena hereva na egu ai e kau, eto, ²Taunimanima natuna e, badina be Turo ese Ierusalem e herevalaia, eto “Aha, taunimanima edia ikoukou vada e makohi, egu ai vada e hekeho; ia vada e vahu dainai lau baina namo lou”; ³una dainai Ġaubada Iehova na ini e gwau tomamu: Turo e, a itaia, lau ese na inai henimumu. Bese momo baina mailaidia oi ihadikamu, davara ese hurehurena na e mailaidiamu na heto. ⁴Idia ese Turo maġudia bae ġiġidia dobi, bena kohorodia bae haheġiġidia tari, bena lau ese tanona baina tahia oho, nadina mo baine kikiri. ⁵Ia na davara bogaraginai baine mia, reke itoredia gabuna ai bainela. Lau, Ġaubada Iehova, vada na hereva. Bena ia na bese idau-idau damudia ai bainela; ⁶bona ia natuna hahinedia tanobada ai na dare ese baine aladia mase. Bena bae diba lau na Iehova.

⁷Badina be Ġaubada Iehova na ini e gwau tomamu: A itaia, mirigini kahana amo Nebukadresara, Babulono pavapavana, pavapava edia pavapava, mai ena hosi bona ena kariota bona ena hosi-gui taudia bona ena tuari taudia hutuma herea ida, baina mailaidia, Turo latanai. ⁸Ia ese natumu hahinedia tanobada ai na dare amo baine aladia mase. Ia ese maġu ta amo baine koumu heġeġe, bona tano baine larebaia bona kesi momo bae duduia isi oi ihadikamu. ⁹Ena vaġoma amo maġumu baine hamakohidia, bona ena ira amo kohoromu baine hagaridia. ¹⁰Ena

hosi bae hutuma herea dainai, aedia kahudia ese bae govamu. Ia na ikoukoumu amo baine raka vareai, ta ese maḡuna e hamauria hanuana ai bema raka vareai heḡereḡerena; una negana ai hosi-gui taudia bona rerue bona kariota reḡedia ese maḡumu bae haheude-heuedia. ¹¹Ena hosi aedia amo ia ese ariaramu iboudiai baine moimoilaidia; emu taunimanima iboudiai ia ese baine aladia mase, emu au-tubua auka-heredia na tano ai bae moru. ¹²Idia ese emui taḡa na bae dadidia oho, bona emui hoihoi kohudia na damudia ai bae halaodia; maḡumu bae gigi dobi, bona emui ruma namo-heredia bae habuadia tari; emui nadi bona emui au bona emui uma tanodia na davara lalonai bae negedia dobi. ¹³Emui ane reḡedia baina hadoko; emui gitara reḡedia na basie hekamonai lou. ¹⁴Nadi kikiri ai baina halaomu; reke itoredia gabuna ai ba hahelao; nega ta ai basie haginimu lou; badina be lau Iehova vada na hereva. Ḡaubada Iehova na e herevamu.

¹⁵Ḡaubada Iehova ese Turo na ini e hereva henia tomamu: Ba moru negana ai na bae bero taudia bae ganaḡana, bona ala-ala na baine bada bogaragimu ai; una negana ai kone tanodia na basie heude-heude a?

¹⁶Bena davara lohiadia iboudiai na edia terono amo bae diho, edia hahedoki badadia bae atodia tabe bona edia hahedoki mai heraheradia bae dokidia oho. Mai heude-heuedia ida edia dabua bae hahedokilai; tano ai bae helai; nega idoinai bae heude-heude bona oi daimu ai bae gari. ¹⁷Bena oi latamu ai bae rohe ahu, bae hamaoromu, baeto:

Mai harimu hanuana e,
davara ai vada o boio, madi, ihabaimu!

Davara ai o auka herea,
oi bona inoholaimu taudia danu;
oi ese tanobada tanodia iboudiai
o hagaridia dikadika.

¹⁸Harihari, emu moru dinana ai,
motumotu na e heude-heudemu;
oibe, davara motumotudia na e garimu,
oi vada o boio dainai.

¹⁹Badina be Ḡaubada Iehova na ini e gwau tomamu: Hanua ahutuna ai baina halaomu, asie noholaidiamu hanuadia heḡereḡeredia, bona gadobada ai baina hamutumumu bena ranu badadia ese bae habubunimu; ²⁰una negana ai baina dorimu dobi, Guri Badana ai e dihomu taudia ida, sene taudia dekediai; bona tanobada henuna gabuna ai baina hanohomu, idau nega ai e heḡiḡi dobi hanuadia bogaragidiai, Guri Badana ai e dihomu taudia ida. Taunabunai, ta ese basine noholaimu, bona mauri taudia edia tano ai basio mia. ²¹Dala dika-rohorohona amo baina hadokomu, bena ba puki oho; ena be bae tahumu, to nega ta ai basie davarimu lou. Ḡaubada Iehova na e herevamu.

Rohe-ahu Turo latanai

27 ¹Iehova ena hereva na egu ai e kau, eto, ²Taunimanima natuna e, harihari Turo latanai ba rohe ahu. ³Turo, davara raka-lasi ai e miamu hanuana, kone tanodia momo taudia edia hoihoi gabuna, ba hereva henia, baoto, Ġaubada Iehova na ini e gwau tomamu:

Turo e, vada o hereva, oto

“Hairaigu na ġoeva-dae”.

⁴Oi hetoamu na davara bogaragidiai,
oi ikaramu taudia ese hairaimu e haġuġurua.

⁵Aumu iboudiai na beroso audia,
Seniri ororona amo e abidia.
Sida auna ta Lebanon amo e abia,
au-tubuamu ikaralaina.

⁶ *Oak*^j audia Basan amo na
oi baramu e karalaidia.
Oi reireimu na teasuru audia amo e karadia,
Kupro kone-tanodia amo e abi ġaudia;
bena aivori^k amo e haheradia.

⁷Dabua aukana mai heraherana na
Aigupto amo e abia;
unu amo oi laramu e karaia,
bona pepemu danu.

Dabua vaiuridia bona kakakakadia Elisa kone-tartodia amo na
dina siahuna ilao-ahuna e karalaia.

⁸Sidono taudia bona Aravada taudia na emu bara taudia;
idibaka taudia Semere amo na oi lalomu ai,
idia na emu tari taudia.

⁹Gebala tau-badadia bona ena idibaka taudia na oi lalomu ai,
idia ese reireimu e demadia.
davara lagatoidia iboudiai na oi lalomu ai,
bona lagatoi taudia danu emu hoihoi kohudia e hoihoilai.

¹⁰Parasa bona Lud bona Put taudia na emu tuari taudia, emu tuari oreana lalonai; kesi bona auri kwara ġauna na oi lalomu ai e taudia dae; idia edia amo hairaimu o abia. ¹¹Aravada bona Heleke taudia na maġumu latadiai e gini heġeġe, bona Gamada taudia na kohoromu ai; idia ese oi maġumu heġege-madai ai edia kesi e taudia dae; oi hairaimu na vada e haġuġurua.

¹²Tarasisi taudia na emui ai e hoihoiva, emui kohu idau-idau momo herea daidiai; *silver* bona auri bona auri haraga-haragana bona auri

^j 27.6 Beroso bona teasuru na au ladadia, Heberu gado ai. “Oak” na au ta ladana English gado ai. ^k 27.6 Aivori na elefant doadia amo e abimu ġauna.

metauna na e henimui, emui hoihoi ġaudia davadia. ¹³Iavan bona Tubal bona Mesek taudia na emui ai e hoihoiva taunimanima bona auri labora-labora ġaudia na e henimui, emui hoihoi ġaudia davadia. ¹⁴Betogarama taudia ese hosi bona tuari hosidia bona doniki na e henimui, emui hoihoi ġaudia davadia.

¹⁵Rodo taudia na emui ai e hoihoiva; kone tanodia momo lalodiai emui hoihoi gabudia e miava; idia ese elefant doadia bona eboni audia e matlai, emui ġau davadia.^l ¹⁶Edom na emui ai e hoihoiva, emui kohu momo herea daidiai; idia ese samarago^m nadidia bona dabua kakakakadia bona dabua mai heraheradia bona dabua aukadia namo-hereadia bona ramoto bona kadokodo nadidia e henimui, emui hoihoi ġaudia davadia. ¹⁷Iuda bona Israel tanona taudia na emui ai e hoihoiva; idia ese uit, olive, suke huahuadia matamatadia, bada-ranuna, dehoru bona muramura mai bonana e henimui, emui hoihoi ġaudia davadia.

¹⁸Damasko taudia na emui ai e hoihoiva, emui kohu momo herea bona emui taġa bada-herea ġau idau-idau ai daidiai; idia ese Helebono ena vine ranuna, bona mamoe huina kurokuroⁿ ¹⁹bona vine ranuna Usala amo e henimui, emui hoihoi ġaudia davadia; o hoihoilai ġaudia haida na auri hururu-hururuna bona kida bona kane.ⁿ ²⁰Dedan taudia na emui ai e hoihoiva, edia hoihoi ġaudia na hosi dorudia dabuadia. ²¹Arabia bona Kedara lohiadia Iboudiai edia hoihoi ġaudia na o uralai bada: ġaudia na mamoe natudia bona mamoe mamaruanedia bona nani; ini ġau na emui ai e hoihoilaiva.

²²Sieba bona Raama edia hoihoi taudia na emui ai e hoihoiva; idia ese aniani mamidia ihanamolaidia muramuradia namo-hereadia idau-idau bona herahera nadidia idau-idau iboudiai bona *gold* e henimui, emui hoihoi ġaudia davadia. ²³Haran bona Kane bona Eden bona Asuru bona Kilimada taudia na emui ai e hoihoiva. ²⁴Idia ese hahedoki namo-hereadia, bona dabua vaiuridia, bona dabua mai heraheradia, bona dabua gedadia, oromadia idau-idau ġaudia, e loku ġoevaġoeva ġaudia, na emui ai e hoihoilai. ²⁵Tarasisi lagatoidia na o vatudia, emui hoihoi ġaudia bae loalai totona.

Taunabunai oi na o honu honu daeva, madunamu e metauva,
davara bogaragidiai;

²⁶emu bara taudia ese vada e baramu lao,
gadobada ai;

laurabada ese vada e hamutumu,
davara bogaragidiai.

^l 27.15 Eboni be au aukana namo hereana ta. ^m 27.16 Samarago bona ramoto bona kadakodo na herahera nadidia haida ladadia. ⁿ 27.19 Kida bona kane na Heberu taudia edia muramura ladadia.

- 27 Emu taḡa, emu kohu, emu hoihoi ḡaudia,
 emu neseriki taudia bona emu tari taudia,
 emu demadema taudia, emu hoihoi taudia,
 bona emu tuari taudia iboudiai lalomu ai,
 mai emu orea idoinai,
 bogaragimu ai e nohomu oreana, ida,
 ibouboudiai na davara bogaragidiai e mutumu,
 ihabua-tarimu dinana ai.
- 28 Emu tari taudia edia tai e hekamonaimu negana ai,
 tano idoinai e heude-heudemu;
- 29 bona bara taudia iboudiai na
 edia lagatoi amo e dihomu.
 Neseriki taudia bona tari taudia iboudiai na
 kone ai e ginimu;
- 30 idia ese oi taimu e taimu,
 e tai dikadikamu;
 ḡahu na kwaradia ai e peta kaumu,
 bona kahu ai e hekui-hekuimu.
- 31 Oi daimu ai huidia e naudiamu,
 bona puse dabuadia e riodiamu;
 oi taimu e taimu, mai lalo-idadia ida,
 mai lalo-hisihisi idita-hereadia ida.
- 32 Edia taitai ai e herohe-ahulaimumu;
 daimu ai e herohe ahumu, e tomu:
 Nega ta ai daika na e hebua tari davara bogaraginai,
 Turo na heto a?
- 33 Emu hoihoi kohudia na davara kahadia idau-idau amo ema negadiai
 na
 bese momo taudia lalodia o hamoaledia;
 emu kohu momo bona emu hoihoi ḡaudia amo
 tanobada pavapavadia o hataḡalaidia.
- 34 Harihari davara ese vada e hamutumu,
 dobu masemasedia ai;
 emu hoihoi kohudia bona emu neseriki taudia iboudiai na
 oi ida vada o mutu.
- 35 Kone tanodia taudia iboudiai na
 oi daimu ai kudoudia e hetahamu;
 edia pavapava na e gari dikadikamu,
 vairadia na e haroromu.
- 36 Bese idau-idau edia hoihoi taudia ese e nuku henimumu;
 mai garimu ida vada o baia,
 vada ba boio vaitani ela bona hanaihanai.

Peroveta herevana Turo pavapavana latanai

28 ¹Iehova ena hereva na egu ai e kau, eto, ²Taunimanima natuna e, Turo pavapavana ba hamaoroa, baoto, Ġaubada Iehova na ini e gwau tomamu:

Badina be lalomu na e hekokorokumu,
oto “Lau na dirava ta,
dirava edia helai gabudia ai na helaimu,
davara bogaragidiai”;
ġau tamona, ena be oi na o tomu
emu aonega na dirava ta ena aonega heġereġerena,
to oi na taunimanima mo, dia dirava.

³ (Momokani, emu aonega ese Daniel ena aonega na e hereaiamu,
ġau hehunina ta na emu ai se hehunimu;

⁴ emu aonega bona emu lalo-parara dainai,
oi ese emu taġa vada o davaria;
bona *gold* bona *silver* vada o haboudia,
emu habou-habou rumadia lalodiai;

⁵ emu aonega bada hoihoi karadia ai dainai,
oi ese emu taġa vada o habadaia;
bona lalomu na vada e hekokoroku,
emu taġa dainai.)

⁶ Una dainai, Ġaubada Iehova na ini e gwau tomamu:
Badina be o laloamu emu aonega na
dirava ta ena aonega heġereġerena,

⁷ una dainai, a itaia, idau taudia na
latamui ai baina mailaidia,
mai garidia besedia;
idia ese edia dare bae veridia lasi,
emu aonega hairaina ihadikana,
bena oi hairaimu bae hamiroa.

⁸ Idia ese guri ai bae dorimu dobi,
e aldiamu taudia edia mase ai ba mase,
davara bogaragidiai.

⁹ Ena be oi na taunimanima mo, dia dirava,
e haberomumu taudia imadia ai,
to bae alamu mase taudia vairadiai
dounu baoto “Lau na dirava ta” a?

¹⁰ Asie peritomeidia taudia edia mase ai ba mase,
idau taudia imadia ai.
Ġaubada Iehova na e tomu,
Lau vada na hereva.

Rohe-ahu Turo pavapavana lat 0 lai

¹¹Ihova ena hereva ma ta egu ai e kau, eto, ¹²Taunimanima natuna e, Turo pavapavana latanai ba rohe ahu. Ba hereva henia, baoto, Ġaubada Iehova na ini e gwau tomamu:

Oi na o ġoeva-dae vaitani,
aonega ai o honumu,
oi hairaimu na herea dae.

¹³Oi na Eden, Dirava ena imea, lalonai o nohova;
herahela nadidia idau-idau iboudiai ese e ġovamu:
sadio, topasio, iaspi,
krusolito, berulio, onuku,
sapairo, barekete, samarago;
iseisedia na *gold* amo e kara,
o koro ġaudia danu na *gold*.
Oi e karamu dinana lalonai
idia na e kara hata.

¹⁴Kerubi ta na horoa, oi igimamu kerubina ai bainela,
oi na Dirava ena ororo helaġana ai
amu nadidia padapadadia amo o raka.

¹⁵Oi na asi emu kerere, emu dala iboudiai lalodiai,
e karamu dinana amo
ela bona kara havara na lalomu ai e vara.

¹⁶Emu hoihoi karadia momo herea lalodiai
daġedaġe ese e hahonumu, bena o kara dika;
una dainai Dirava ena ororo amo na negemu dobi,
ġau mirona na heto;
bena hari hegima kerubina ese
amu nadidia padapadadia amo e lulumu lasi.

¹⁷Lalomu na e hekokorokuva, raho-namomu dainai;
emu aonega o hamiroava, hairaimu dainai.
Tano ai na tahomu dobi,
hanua pavapavadia vairadiai na hahemaraimu,
bae raraimu totona.

¹⁸Emu kara havara momo herea,
bona emu kara gageva-gageva,
emu hoihoi ai o karava karadia, amo
emu gabu helaġadia o hamirodia;
una dainai oi bogaragimu amo lahi na ha-araia,
bena e golemu oho;
kahu ai na halaomu tano ai,
e raraimuva taudia iboudiai vairadiai.

19 Bese idau-idau bogaragidiai e dibamu taudia iboudiai na oi daimu ai e gari takumu; mai garimu ida vada o ore, vada ba ore vaitani.

Peroveta herevana Sidono latanai

20 Iehova ena hereva na egu ai e kau, eto, 21 Taunimanima natuna e, talaimu na Sidono ba henia, ia latanai ba peroveta, 22 baoto, Ġaubada Iehova na ini e gwau tomamu:

Sidono e, a itaia, lau ese na inai henimumu; oi bogaragimu ai hairaigu baina hahedinaraia.

Bena ia lalonai hanemaoro karadia baina kara bona ia lalonai helaġagu baina hahedinaraia negana ai, idia bae diba lau na Iehova.

23 Badina be dai-hanai gorereña na ia lalonai baina siaia, bona rara danu, ia ariarana lalodiai; bena bae aladia mase taudia na ia bogaraginai bae hekida bou, e haheġeġea daemu daredia amo; bena idia na bae diba lau na Iehova.

24 A Israel besena taudia na ava ġiniġinina ta eiava au ġiniġinina ta ese basine hahisidia, idia dekedia taudia, vada e dadaraidia taudia, iboudiai bogaragidiai. Bena idia bae diba lau na Ġaubada Iehova.

25 Ġaubada Iehova na ini e gwau tomamu: Israel besena taudia na bogaragidiai vada e karoġo roġoroġo besedia lalodia amo ma baina gogodia bona egu helaġa idia lalodiai na bese idau-idau vairadiai baina hahedinaraia negana ai, idia na edia tano korikori, egu hesiai tauna Iakob na henia tanona, lalonai bae noġo. 26 Una tano lalonai bae noġo namonamo; ruma bae haginidia bona vine imeadia bae hado. Lau ese dekedia taudia, vada e dadaraidia taudia, iboudiai baina hahemaoro henidia negana ai, idia na bae noġo namonamo. Bena idia bae diba lau na Iehova, edia Dirava.

Peroveta herevana Aigupto latanai

29 1 Laġani ihagwautana huana ihagwautana dinana ihagwautaruana lalonai, Iehova ena hereva na egu ai e kau, eto, 2 Taunimanima natuna e, Farao, Aigupto pavapavana, na vairamu ba hua henia, bona ia latanai bona Aigupto idoinai latanai ba peroveta, 3 baoto, Ġaubada Iehova na ini e gwau tomamu
A itaia, lau ese na inai henimumu,
Aigupto pavapavana Farao e,
huala badana,

ena sinavai bogaragidiai e hekuremu,
e tomu “egu Nilo Sinavaina na lauegu,
lau ese na karaia”.

⁴ Lau ese hmai amo aukimu baina gaua,
bona emu sinavai gwarumedia na kopimu ai baina hakamodia
kau;
bena emu sinavai bogaragidia amo baina verimu lasi,
emu sinavai gwarumedia iboudiai, kopimu ai e hekamo kaumu
gāudia, ida.

⁵ Bena tano gāgaena ai baina negemui,
oi bona emu sinavai gwarumedia iboudiai;
tano paka ai ba moru,
ta ese basine gogomui, basine gurimui.
Tano boromadia bona atai manudia baina henidia,
adia ai baola.

⁶ Bena Aigupto inoholaina taudia iboudiai na bae diba, lau na Iehova.
Badina be oi na siriho itotohina, Israel enai; ⁷ imadia ai e dogomu tao
negana ai o kwaidu, pagadia iboudiai e helada oho; bona emu ai e tabe
kau negana ai o kwaidu, bona koekoedia iboudiai e herogi-herogi. ⁸ Una
dainai Gaubada Iehova na ini e gwau tomamu: A itaia, dare na latamu ai
baina mailaia, taunimanima bona ubu-ubu gāuna na oiemu amo baina
negedia daure; ⁹ bona Aigupto tanona na baine hebua tari bona baine
vahu. Bena idia na bae diba, lau na Iehova.

Badina be oi oto “Nilo sinavaina na lauegu, lau ese na karaia”, ¹⁰ una
dainai, a itaia, lau ese na inai henimumu, bona emu sinavai na inai
henidiamu, bona Aigupto tanona na baina havahua bona baina habuaia
tari, Migdol amo ela bona Suene, ela bona Etiopia tano-hetoana. ¹¹ Tau
ta aena ese basine rakaia hanai bona boroma ta aena ese basine rakaia
hanai: asi inoholaina ai baine mia laḡani hari-ahui lalodiai. ¹² Lau
ese Aigupto tanona baina habuaia tari, vada e hebua tari tanodia
bogaragidiai; bona hanuana iboudiai bae hebua tari, laḡani hari-ahui
lalodiai, e vahumu hanuadia bogaragidiai. Lau ese Aigupto taudia baina
hakarohodia rohoroho, tano idau-idau lalodiai.

¹³ Badina be Gaubada Iehova na ini e gwau tomamu: Laḡani hari-ahui
bae ore, bona Aigupto taudia na bogaragidiai vada e karohe besedia
lalodia amo ma baina gogodia; ¹⁴ bona Aigupto ena noho namo baina
havarai lou, bona Pataro tanona, edia sene tanona, Ialonai ma baina
hakaudia vareai lou; unuseni ai idia na basileia maragina ai baela.
¹⁵ Basileia iboudiai bogaragidiai ia na baine maraḡi herea; nega ta ai
basileia idau-idau daediai basine heaḡi lou; baina hamaragidia herea
dainai, idia ese nega ta ai basileia idau-idau na basie biagudia lou. ¹⁶ Bena
Israel besena taudia ese basie abidadama henidia lou, bona edia hekaha

iabina totona basie kara havara lou. Bena idia bae diba lau na Ġaubada Iehova.

¹⁷Laġani iharuahui-hituna huana gini-gunana dinana ginigunana lalonai, Iehova ena hereva na egu ai e kau, eto, ¹⁸Taunimanima natuna e, Nebukadresara, Babulono pavapavana, ese ena tuari oreana e siaia, Turo ituarihenina baine ha-aukaia totona; kwara iboudiai e haboha, bona paġa iboudiai e hatoto; ġau tamona ia bona ena tuari oreana ese ġau ta Turo amo asie abia, ituari-henina ai e hekwarahiva davana. ¹⁹Taunabunai, Ġaubada Iehova na ini e gwau tomamu: A itaia, lau ese Aigupto tanona na Nebukadresara, Babulono pavapavana, baina henia; ia ese kohuna namodia baine laohai, baine dadihaia, ia damuġana ai baine halaoa; unu amo ena tuari taudia davadia baine henidia. ²⁰Lau ese Aigupto tanona vada na henia, ena hekwarahi davana, badina be idia na lauegu ai e ġaukara. Ġaubada Iehova na e herevamu.

²¹Una dina ai lau ese doa ta baina hatubua Israel besena ena, bona oi udumu bibinadia baina hapapa, idia bogaragidiai. Bena idia bae diba lau na Iehova.

Aigupto ihabua-tarina

30 ¹Iehova ena hereva na egu ai e kau, eto, ²Taunimanima natuna e, a peroveta, baoto, Ġaubada Iehova ini e gwau tomamu:

A tai lolololo, aoto

“Dina madi ihabaina!”

³Badina be una dina vada e kahikahimu,
Iehova ena dina vada e kahikahimu;
ia na ori momo dinana,
bese idau-idau ihabua-taridia dinana.

⁴Dare ta na Aigupto latanai baine kau,
Ialo-hisihisi bada-herea na Etiopia ai baine vara,
bae aladia mase taudia na Aigupto ai bae hekida diho,
bona taġana bae huaia lao,
bona ena abdiholo bae heġiġi dobi, negana ai.

⁵Etiopia bona Put bona Lud bona Arabia idoinai bona Libia taudia,
bona idia ida e ġaukara heboumu taudia, na idia ida dare ai bae mase.

⁶Iehova na ini e gwau tomamu:
Aigupto e duruamu taudia na bae hekida diho,
bona ena hekokoroku taudia na bae moru;
Migdol amo ela bona Suene
idia na dare ai bae mase, ia lalonai,
Ġaubada Iehova na e herevamu.

⁷Ia na baine vahu, vada e vahu tanodia bogaragidiai,

ena hanua danu, vada e heḡiḡi dobi hanuadia bogaragidiai.

⁸ Bena Aigupto baina ha-araia

bona iduruna taudia iboudia bae darere negana ai,
idia na bae diba lau na Iehova.

⁹ Una dina ai gwaukau taudia na mai heaudia ida lauegu amo baela, Etiopia taudia bae hahebolorudia; bena lalo-hisihisi bada-herea na latadiai bae kau, Aigupto ihabua-tarina dinana ai; badina be, a itaia, dinana be e maimu.

¹⁰ Ḡaubada Iehova na ini e gwau tomamu:

Aigupto tagana baina ha-orea,
Nebukadresara, Babulono pavapavana, imana amo.

¹¹ Ia mai ena orea taudia, hahegari bada-herea oreana bese idau-idau bogaragidiai,

tano ihabua-tarina totona baina havareaidia;
bena edia dare bae veridia lasi, Aigupto ihadikana,
tano na hirua amo bae hahonudia.

¹² Lau ese Nilo sinavaina baina hakororoa,

tano na baina hoia, kara dika taudia ediai;
tano mai anina idoinai baina havahuradia,
idau taudia imadia amo.

Lau Iehova vada na hereva.

¹³ Ḡaubada Iehova na ini e gwau tomamu:

Kaivakuku baina habuadia tari
bona dirava laulaudia baina ha-oredia Memefisi ai;
Aigupto tanona ai pavapava ta basine noho lou,
unu amo gari baina havaraia Aigupto tanona ai.

¹⁴ Pataro na baina havahua,

Soan na baina doua,
bona hahemaoro karadia na
Tebe latanai baina kara.

¹⁵ Pelusio, Aigupto ena gabu aukana, latanai

egu badu ḡaraḡara na baina bubua dobi,
bona Tebe ena hutuma baina negedia daure.

¹⁶ Aigupto baina doua,

Pelusio na baine hisihisi bada herea;
Tebe na bae hamaurua,
maḡuna na bae heḡiḡi dobi.

¹⁷ Ono bona Pibesete edia eregabe taudia na dare ai bae mase,

bona hahinedia na iḡuidia ai bae laohaidia.

¹⁸ Tehafenehe ai dina na baine dibura,

Aigupto ena siahu unuseni ai baina hadarerea negana ai;

ena sياهو, e heaḡilaiamu ḡauna, na baine ore,
 ori ta ese baine ḡovaia ahu;
 bona natuna hahinedia na iḡuidia ai bae laohaidia.

¹⁹ Unuhetomana lau ese hahemaoro karadia baina kara Aigupto
 latanai,
 bena idia na bae diba lau na Iehova.

²⁰ Laḡani ihagwauta-tana huana gini gunana dinana ihahituna
 ai, Iehova ena hereva na egu ai e kau, eto, ²¹ Taunimanima natuna
 e, Farao, Aigupto pavapavana, imana vada na hakwaidua; a itaia,
 ihanamona totona ikumi dabuana amo bema kumia, bena bema auka,
 dare iḡaukaralaina heḡereḡerena, a ta ese se kumia. ²² Taunabunai
 Ḡaubada Iehova na ini e gwau tomamu: A itaia, lau ese Farao, Aigupto
 pavapavana, na inai heniamu, ia imana ruaosi baina hakwaidudia,
 mai goadana ḡauna bona e kwaidu guna ḡauna; bena dare na imana
 amo baina hamorua. ²³ Aigupto taudia baina hakarohodia bese idau-
 idau bogaragidiai, baina hakarohodia rohoroho tano idau-idau lalodiai.
²⁴ Babulono pavapavana imana baina ha-aukadia, bona egu dare na
 ia imana ai baina atoa; a Farao imana na baina hakwaidudia, bena ia
 na ia vairanai baine ḡanaḡana, mase berona e davaria tauna na heto.
²⁵ Babulono pavapavana imana baina hagoadadia, a Farao imana na bae
 hedabarai; bena idia na bae diba lau na Iehova. Egu dare na Babulono
 pavapavana imana ai baina atoa negana ai, ia ese Aigupto tanona baine
 dudui henia; ²⁶ bena Aigupto taudia baina hakarohodia bese idau-idau
 bogaragidiai, baina hakarohodia rohoroho tano idau-idau lalodiai. Bena
 idia na bae diba lau na Iehova.

Hereva heḡereḡerena: Sida auna badana

31 ¹ Laḡani ihagwauta-tana huana ihatoina dinana ginigunana ai,
 Iehova ena hereva na egu ai e kau, eto, ² Taunimanima natuna e,
 Farao, Aigupto pavapavana, mai ena hutuma ida, ba hamaorodia, baoto:
 Emu herea-dae ai
 oi na daika heḡereḡerena?
³ A itaia, lau ese Lebanon sida-auna ta ida baina haheḡereḡeremu,
 mai rigina namo-hereadia bona mai ikerukeruna ida;
 ia na ḡaulatalata,
 dorina na ori lalodiai.
⁴ Ranu ese e ubua,
 ranu dobudia ese e halataia,
 e hadoa gabuna na
 sinavaina ese e ha-arua heḡeḡe,
 sinavai-sinavaidia na e ha-arudia lao,
 uda audia iboudiai ediai.

- 5 Taunabunai ia na e tubu daga dae,
 uda audia iboudiai e lahedia tao,
 riginā na e tubu badabada,
 e tubu latalata,
 ranu momo na tuhutuhuna ai e dae dainai.
- 6 Atai manudia iboudiai ese
 edia ruma na ia riginā ai e kara;
 ia riginā henudiai tano paka boromadia iboudiai ese
 natudia e havaradia;
 ia ikerukeruna ai
 bese badadia iboudiai na e nohova.
- 7 Vada e bada herea bona riginā na lalata dainai
 ia hairaina na herea;
 badina be ramuna na e diho e laova,
 ranu momo gabudia ai.
- 8 Dirava ena imea sida-audia ese asie hereaia,
 bona beroso audia rigidia ese ia riginā asie hereadia;
 tidara^o audia rigidia na ġau pipikidia,
 ia riginā ida asie heġereġere.
 Dirava ena imea ai asi auna ta
 mai hairaina ia hairaina heġereġerena.
- 9 Lau ese riginā momo amo
 na hahairaia;
 Eden audia iboudiai,
 Dirava ena imea ai e varava ġaudia, ese
 ia e vaġeġe henia.

¹⁰Taunabunai, Gaubada Iehova na ini e gwau tomamu: Badina be ia na e tubu daga dae ela bona dorina na ori lalodiai, bona lalona ese ena lata e heaġilaia, ¹¹una dainai lau ese bese idau-idau edia siahu-herea tauna imana ai baina atoa; ia ese ena kara dika davana baine henia. Lau ese vada na negea daure. ¹²Idau taudia, hahegari herea besena, ese baine utua, bena baine rakatania. Ia riginā na ororo ai bona koura iboudiai lalodiai bae moru; riginā haida na kwaidudia ai bae mia, tano ena koupa iboudiai lalodiai; tanobada besedia iboudiai na ia ikerukeruna amo bae raka lasi, bae rakatania. ¹³Hegigi-dobina ai, atai manudia iboudiai na ia latanai bae noho, bona tano paka boromadia danu ia riginā latadiai. ¹⁴Ini kara anidia be sinavai isedia audia haida basie tubu daga dae ela bona doridia na ori lalodiai bona ranu e inumu audia haida edia lata na idia edia lata ida basie heġereġere helaoreana; badina be iboudiai na bae mase, taunimanima bogaragidiai baela, mase gabuna ai, guri ai e dihomu taudia ida.

^o 31.8 “Beroso” bona “tidara” na au rua ladadia, Heberu gado ai.

¹⁵ Ĝaubada Iehova na ini e gwau tomamu: Mase gabuna ai baine diho negana ai, lau ese ranu dobudia baina haĝanidia, bae tailaia; bona sinavaina baina laodia ahu, ranu momo danu bae helao ahu. Lebanon na baina havaburaia, ia dainai, bona tano paka audia iboudiai na ia dainai bae marai. ¹⁶ Mase gabuna ai baina negea dobi, guri ai e dihomu taudia ida, negana ai, lau ese bese idau-idau baina haheude-heuededia, ena moru guruna amo; bona Eden audia iboudiai, Lebanon audia namo-hereadia, ena abi-hidi audia, ranu e inumu ĝaudia iboudiai, na tauhalo bae davaria, mase gabuna ai. ¹⁷ Idia danu ia ida mase gabuna ai bae diho, dare ai e mase taudia ida; oibe, bese idau-idau bogaragidiai ia ikerukeruna ai e nohova taudia na bae mase. ¹⁸ Taunabunai, Eden audia bogaragidiai oi na edena heĝereĝerena, hairai ai bona herea-dae ai? Eden audia ida mase gabuna ai do ba diho; asie peritome dia taudia ida, dare ai e mase taudia ida, do ba hekure.

Ĝaubada Iehova na e tomu, Farao mai ena hutuma ida na unuheheto.

Herohe-ahu Farao latanai

32 ¹ Laĝani ihagwauta-ruana huana ihagvauta-ruana dinana gini-gunana ai Iehova ena hereva na egu ai e kau, eto, ² Taunimanima natuna e, Farao, Aigupto pavapavana, latanai ba rohe ahu, ba hereva henia, baoto:

Oi na o laloamu oi na leona ta, bese idau-idau bogaragidiai,
 a oi na davara hualana na heto;
 emu sinavai lalodiai o sese dae roha,
 aemu amo ranu o halamiriamu,
 bona edia sinavai ranudia o haduhudiamu.

³ Ĝaubada Iehova na ini e gwau tomamu:
 Egu ole na latamui ai baina taho kau,
 bese idau-idau hutuma bada edia amo,
 bena egu ole ai bae verimu vareai kone ai.

⁴ Tano ai baina tahomu dobi,
 tano paka ai baina negemu;
 atai manudia iboudiai baina siaidia,
 latamu ai bae roho roho kau;
 tanobada idoinai ena uda boromadia bogadia na
 oiemu amo baina hakunudia.

⁵ Oi hidiomu na ororo ai baina hapetapetalai, ai
 oi tau-animu amo koura baina hahonudia.

⁶ Oi raramu baina ha-arua,
 tano idoinai baine utua dae ela bona ororo,
 koupa na ba hahonudia.

⁷ Baina habuamu tari negana ai guba baina ĝovaia ahu,

bona hisiuna baina hadiburadia;
 dina na ori amo baina ḡovaia ahu,
 bona hua na basine diari.

⁸ Guba diaridia iboudiai na oi daemu ai baina hadiburadia,
 bona emu tano baina havaburaia.
 Ḡaubada Iehova na e herevamu.

⁹ Bese idau-idau bogaragidiai, asi dibamu tanodia lalodiai, mai iguimu ida baina laohaimu negana ai, bese momo taudia kudoudia baina hahetahadia. ¹⁰ Bese momo baina hagaridia taku oi bagumu ai, bona edia pavapava bae heude-heude oi daimu ai, egu dare baina hahelado henidia negana ai; bae heude-heude loulou, ta ta ena mauri ena mauri bagudiai, emu moru dinana ai. ¹¹ Badina be Ḡaubada Iehova na ini e gwau tomamu: Babulono pavapavana ena dare na oi latamu ai baine kau. ¹² Emu orea taudia hutuma na goada taudia edia dare amo baina hamasedia, bese idau-idau bogaragidiai e gari henidia badamu taudia iboudiai bunu.

Aigupto ena heaḡi bae ha-orea,
 ena orea taudia hutuma bae mase.

¹³ Ena ubu-ubu ḡaudia iboudiai baina habuadia tari,
 ranu gabudia momo badibadidiai;
 taunimanima aedia ese unu gabu basie moimoilaidia lou,
 ubu-ubu ḡaudia-aedia ese danu basie moidia tao.

¹⁴ Bena edia ranu gabudia baina hanegaridia,
 bona edia sinavai baina ha-arudia dehoru na heto,
 Ḡaubada Iehova na e helevamu.

¹⁵ Aigupto tanona baina havahua,
 bona tano anina idoinai baina abia oho,
 bona e noholaiamu taudia iboudiai baina rahudia mamase negana ai,
 idia bae diba lau na Iehova.

¹⁶ Unu bae rohe ahu toma; bese idau-idau hahinedia ese bae rohe ahu; Aigupto latanai bona ena taunimanima hutuma latadiiai bae rohe ahu. Ḡaubada Iehova na e herevamu.

¹⁷ Laḡani ihagwauta-ruana huana gini-gunana dinana ihagwauta-imana ai, Iehova ena hereva na egu ai e kau, eto: ¹⁸ Taunimanima natuna e, Aigupto ena orea taudia hutuma taidia ba tai, bona ba siaidia diho, idia bona bese herea-daedia hahinedia danu, mase gabuna ai bae diho, guri ai vada e diho taudia dekediai.

¹⁹ Daika na hairai ai o hereaiamu?

A diho lao, asie peritomea taudia ida bae hahekuremu.

²⁰ Idia na dare ese e aladia mase taudia bogaragidiai bae hekida diho, bona ena orea taudia hutuma iboudiai na ia ida bae hekure. ²¹ Lohia

herea-daedia ese idia bona idurudia taudia na mase gabuna bogaragina amo bae herevalaidia, baeto “Asie peritome dia taudia na vada e diho, e hekuremu, asie marere-mareremu; dare ese vada e aladia mase”.

²²Asuria na unuseni ai, ena orea idoinai danu; edia gara ese e gegea daemu, iboudiai na dare ai e mase taudia mo. ²³Edia gara na guri dobu-masemasena ai e miamu, bona ena orea ese ena gara e gegea daemu; iboudiai, gunaguna mauri taudia edia tano ai hahegari karadia e karava taudia, na dare ai vada e mase.

²⁴Elam na unuseni ai, bona ena orea taudia hutuma iboudiai ese iena gara e gegea daemu. Iboudiai na dare ai e mase; do se heperitome ai idia na mase gabuna ela. Gunaguna idia ese mauri taudia edia tano ai hahegari karadia e karava; harihari guri ai e dihomu taudia ida e hemarai heboumu. ²⁵Idia ese ena hekure gabuna vada e lailaia, e aladia mase taudia bogaragidiai, ia mai ena orea taudia hutuma iboudiai ida; edia gara ese e gegea daemu, iboudiai na do se heperitome taudia, dare ai e mase taudia mo. Badina be idia igari-henidia vada e hepiu rohoroho, mauri taudia edia tano ai; idia na guri ai e dihomu taudia ida e hemarai heboumu, e aladia mase taudia ida e atodiamu.

²⁶Mesek bona Tubal na unuseni ai, mai edia orea taudia hutuma ida; edia gara ese e gegea daemu. Iboudiai na do se heperitome taudia, dare ai e mase taudia mo. Badina be idia ese mauri taudia edia tano ai hahegari e havaraia rohoroho. ²⁷Idia na sene edia goada-herea taudia ida asie hekure heboumu. Unu na mai edia tuari gaudia ida mase gabuna ai e diho, edia dare ai e haheKwinadia bona edia kesi na turiadia latadiai heheato; badina be goada-herea taudia edia hahegari na mauri taudia edia tano ai e miava. ²⁸Taunabunai ba makohi, dare ese e aladia mase taudia ida ba hekida diho, do se haheperitome taudia bogaragidiai.

²⁹Edom na unuseni ai, ena pava-pava bona ena lohia iboudiai. Idia na goada dikadika, to dare ai e mase taudia ida vada e hahekure dia. Idia na se haheperitome taudia, guri ai e dihomu taudia, ida e hekuremu.

³⁰Mirigini kahana lohiadia iboudiai na unuseni ai, bona Sidono taudia iboudiai danu. Idia na e aladia mase taudia ida nda e hemarai heboumu, edia goada ese e havaraia hahegarina idoinai dainai. Idia na do se haheperitome ai e hekuremu, dare ai e mase taudia ida; idia na guri ai e dihomu taudia ida e hemarai heboumu.

³¹Ĝaubada Iehova na e tomu: Farao ese baine itadia negana ai, ia na sibona tauhalo baine davaria, ena orea taudia hutuma daidiai; oibe, Farao mai ena tuari oreana idoinai, dare ai e mase taudia, daidiai.

³²Badina be ia ese hahegari e piua rohoroho, mauri taudia edia tano ai; una dainai ia na do se haheperitome taudia bogaragidiai bae hahekurea, dare ai e mase taudia, Farao mai ena orea taudia hutuma iboudiai, ida. Ĝaubada Iehova na e herevamu.

Kito tauna ena ġaukara

33 ¹Iehova ena hereva na egu ai e kau, eto, ²Taunimanima natuna e, emu bese taudia ba hamaorodia, baoto, Dare na tano ta latanai bama mailaia, bena una tano taudia ese tau ta idia bogaragidia amo bema abia hidi, edia gima tauna ai bema halaoa; ³beno una tau ese dare na tano latanai e kaumu ai bema itaia negana ai, kibi bema hiriria, taunimanima ihadibadia: ⁴una negana ai ta ese kibi reġena bema kamoni to bema noho hedavauhe, bena dare na bema mai, ena maun bema abia oho; ia rarana na ia sibona kwarana ai baine mia. ⁵Kibi reġena e kamoni, to e noho hedavauhe; ia rarana na ia sibona latanai. A bema hedaraunelaia, bena ena mauri bema rauaia. ⁶A gima tauna ese dare ena mai bema itaia, to kibi basinema hiriria, bena taunimanima na basiema diba, bena dare na bema mai, idia ta bema alaia; una tau na ena dika ai baine mase, a ia rarana davana na gima tauna enai baina gwauraia.

⁷Taunibunai, taunimanima natuna e, lau ese Israel besena igimana tauna ai vada na halaomu; lau udugu herevana ta ba kamoni negadia iboudiai na lau ladagu ai do ba sisibalai henidia. ⁸Kara dika tauna bama hamaoroa, bama toma “Kara dika taumu e, oi na vada ba mase,” bena oi ese basioma hereva henia, basioma sisiba henia, ena dala amo baine raka siri totona; bena una kara dika tauna na ena dika ai baine mase, a ia rarana davana na oiemu ai baina gwauraia. ⁹A kara dika tauna boma sisiba henia, ena dala amo baine raka siri totona, bena ia na ena dala amo basinema raka oho, ia na ena dika ai baine mase, a oi na emu mauri do ba rauaia.

Dirava ena dala na maoromaoro

¹⁰Taunimanima natuna e, oi ese Israel besena taudia ba hamaorodia, baoto, Umui vada oto “Emai kerere bona emai kara dika na latamai ai, bena unu daidiai taumai e varoda-varodamu; ede baia mauri toma?”

¹¹Ba hamaorodia, baoto, Ġaubada Iehova na e herevamu, e tomu: Lau na maurimu heġereġerena, lau ese dika tauna ena mase asina moalelaiamu, a dika tauna na ena dala amo baine raka siri bena baine mauri, una na na moalelaiamu. A lou, emui dala dikadia amo a lou! Israel besena e, anina be dahaka ba mase? ¹²Taunimanima natuna e, oi ese emu bese taudia ba hamaorodia, baoto, Kara maoromaoro tauna ena kara maoromaoro ese basine hamauria, baine kerere negana ai; bona kara dika tauna ena kara dika ese basine haketoa, ena kara dika amo baine raka siri negana ai. Kara maoromaoro tauna na ena kara maoromaoro dainai basine mauri, baine kara dika negana ai. ¹³Ena be kara maoromaoro tauna na hamaoroamu ia na do baine mauri, to ena kara maoromaoro bema abidadama henia bena bema kara havara, bena

ena kara maoromaordia ta basine helalo tao, a ia na ena kara havara ai baine mase. ¹⁴Ina danu, ena be kara dika tauna na hamaoroamu, na tomu “Oi na do ba mase”, to ena kara dika amo bema raka oho, taravatu henunai bema noho bona kara maoromaordia bema kara; ¹⁵bema kara dika tauna ese gwauhamata davana ma bema haloua bona vada e dadi ġaudia bema heni lou, bona mauri haheganidia ai bema raka bona basinema kara havara, bena ia na do baine mauri; ia na basine mase. ¹⁶Ena kara dikadia ta basine helalo tao, ia ihadikana; ia na taravatu henunai vada e kara maoromaoro, ia na do baine mauri.

¹⁷Ġau tamona, emu bese taudia na e tomu “Ġaubada ena dala na dia maoro”; a ġau be idia sibodia edia dala na dia maoro. ¹⁸Kara maoromaoro tauna na ena kara maoromaoro amo baine raka oho, bena baine kara havara, ia na una kara dainai baine mase. ¹⁹Bona kara dika tauna na ena kara dika amo baine raka oho bona taravatu henunai baine kara maoromaoro, ia na una kara dainai baine mauri. ²⁰Ġau tamona umui na o tomu “Ġaubada ena dala na dia maoro”. Israel besena taumui e, lau ese baina hahemaoro henimui, ta ta ena kara ena kara heġereġeredia ai.

Ierusalem e darere harina

²¹Emai noho-hedoa laġanina ihagwauta-ruana huana ihagwautana dinana iha-imana lalonai, Ierusalem amo e heau mauri tauna ta na dekegu ema, eto, Hanua na vada e darere. ²²Heau mauri tauna na do se gini dae ai, adorahi ai Iehova imana na latagu ai e kau; bena daba ai, hari tau na dekegu ai e kau negana ai, Iehova ese udugu vada e kehoa guna; taunabunai, udugu vada e hekeho, egu mu negana vada e ore.

²³Bena Iehova ena hereva na egu ai e kau, eto, ²⁴Taunimanima natuna e, gabu ġaġaedia e noholaimu taudia Israel tanona lalonai na e hereva louloumu, e tomu, Abraham na tau tamona, to ia ese tano e ġaunaia; a ai na hutuma, matona, tano na bae henimai, vada baia ġaunaia. ²⁵Taunabunai ba hamaordia, baoto, Ġaubada Iehova na ini e gwau tomamu: Hidio na mai rarana ida o aniamu, bona emui kaivakuku o gaga dae henidiamu, bona rara o hahebubuamu, matona, tano ba ġaunaia a? ²⁶Dare amo o ala-alamu, kara dika-rohorohodia o karamu, bona umui iboumui ai na ta ta dekena tauna dekena tauna adavadia ida o heuda hanaimu; matona, tano ba ġaunaia a? ²⁷Ini ba hamaordia toma, baoto, Ġaubada. Iehova na ini e gwau tomamu: Lau na maurimu heġereġerena, gabu ġaġaedia ai e nohomu taudia na dare ai do bae mase; bona tano paka ai e nohomu tauna na uda boromadia baina henidia, idia ese bae ania; bona gabu aukadia ai bona kohua lalodiai e nohomu taudia na dai-hanai gorerena ese baine hamasedia. ²⁸Tano na baina havahua, tano ġaġaena ai bainela; ena siahu, e heaġilaiamu ġauna, na baine ore;

Israel orordia bae gāgae vaitani dainai ta ese basine rakadia hanai. ²⁹Bena edia kara dika-rohorohodia iboudiai daidiai lau ese tano na baina havahua, tano gāgaena ai baina halaoa, negana ai idiu na bae diba, lau na Iehova.

³⁰A, taunimanima natuna e, oiemu bese taudia ese ruma habadia badibadidiai bona ruma iduaradia ai oi e hereva heboulaimumu, e hereva hehenimu, ta ta ese tadikakana tadikakana e hamaorodiamu, e tomu, Aoma, Iehova ena amo e maimu herevana be dahaka vada ba kamoni. ³¹Idia na e vasimu, taunimanima na e hegogomu na heheto, bena oi vairamu ai e helaimu, lauegu ore na heto; bena oiemu hereva na e kamonaimu, to karana basie karaia; badina be ududia bibinadia amo lalokau herevadia momo e gwauraimu, to lalodia ai idia sibodia edia taḡa ihabadana daladia e haeromu. ³²A itaia, idia ediai oi na lalokau anedia e abimu tauna na heto, gadona na namo-herea, bona gitara e hataia goevāgoevamu; badina be emu hereva bae kamoni, to karana basie karaia. ³³Ina na bainema negana ai, (bona ia na momokani bainema), bena idia na bae diba peroveta tauna ta na bogaragidiai vada ema.

Peroveta herevana Israel ireḡuna taudia latadiai

34 ¹Iehova ena hereva na egu ai e kau, eto, ²Taunimanima natuna e, Israel ireḡuna taudia latadiai ba peroveta. Ba peroveta, ireḡuna taudia ba hereva henidia, baoto, Ḡaubada Iehova na ini e gwau tomamu: Israel ireḡuna taumui e, sibomui o heubumu taumui! Mamoe ireḡudia taudia na mamoe basie ubudia a? ³Umui ese digara o animu, bona mamoe huidia dabuadia o hahedokilaimu, bona ubu-ubu ḡaudia o aladiamu; a mamoe na asio ubudiamu. ⁴Manoka taudia asio hagoadadia, gorere taudia asio hanamodia, ae-hedairike taudia aedia asio kumidia, e raka oho taudia asio hakaudia lou, e boio taudia asio tahudia, a mai siahumui bona mai dagedagemui ida vada o biagudia. ⁵Taunabunai idia na e karohe rohoroho, badina be asi ireḡudia ta; bona uda boromadia iboudiai ediai e hahelao. ⁶Egu mamoe na e karohe rohoroho, oIoro badadia gabaedia ai bona ororo maraḡidia doridia ai e loa eva-eva; egu mamoe na tanobada kopina idoinai latanai e karohe rohoroho, bona ta ese se tahudia davari.

⁷Taunabunai, mamoe ireḡudia taumui e, Iehova ena hereva ba kamoni. ⁸Ḡaubada Iehova na e tomu: Lau na maurimu heḡereḡerena, badina be egu mamoe na uda boromadia iboudiai adia ai vada e hahelao, asi ireḡudia dainai; bona badina be egu mamoe ireḡudia taudia ese egu mamoe asie tahudia, a mamoe ireḡudia taudia na sibodia e heubu, egu mamoe asie ubudia; ⁹una dainai, mamoe ireḡudia taumui e, Iehova ena hereva ba kamoni. ¹⁰Ḡaubada Iehova na ini e gwau tomamu: A itaia, lau ese mamoe ireḡudia taudia na inai henidiamu; egu mamoe na ediai baina

gwaurai; mamoe iubudia ai baina hadokodia; mamoe ireḡudia taudia na sibodia basie heubu lou. Egu mamoe na ududia amo baina rauadia, adia aniani ai basie halaodia.

¹¹Badina be Ġaubada Iehova na ini e gwau tomamu: A itaia, lau sibogu ese egu mamoe baina tahudia ela bona baina davaridia. ¹²Mamoe ireḡudia tauna ese ena mamoe serina baine tahua davari, ena mamoe haida vada e karoho rohoroho negana ai, una heḡereḡerena ai lau ese egu mamoe baina tahudia davari; bona dagadaga bona dibura masemase dinana ai e karoho rohoroho gabudia iboudiai amo baina rauadia. ¹³Bese idau-idau bogaragidia amo baina hakaudia lasi, bona tano idau-idau lalodia amo baina gogodia, edia tano korikori lalonai baina hakaudia vareai. Bena Israel orordia ai baina ubudia, ranu-lohilohi gabudia badibadidiai, bona taunimanima ese tano ai e noholaimu gabudia iboudiai lalodiai danu. ¹⁴Rei namona gabudia ai baina ubudia; Israel orordia doridia ai rei bae ani; unuseni ai rei namona gabudia ai bae hekure, bona rei namo-hereana bae ania, Israel orordia ai. ¹⁵Ġaubada Iehova na e tomu: Lau sibogu ese egu mamoe baina reḡudia bona baina hahekuredia. ¹⁶Boio ḡaudia na baina tahudia davari, bona e raka eva-evamu ḡaudia baina hakaudia lou, bona ae-hedairike ḡaudia aedia baina kumidia; manoka ḡaudia baina hagoadadia, bona mai digaradia bona mai goadadia ḡaudia na baina gimadia, hahemaoro ḡoevaḡoeva ai baina ubudia.

¹⁷Ġaubada Iehova na e tomu: egu seri e, a itaia, lau na mamoe padadiai na hahemaoromu, bona mamoe mamaruanedia bona nani mamaruanedia padadiai. ¹⁸Rei namona o aniamu na dia heḡereḡere, una dainai emui rei orena na aemui amo o moia taomu a? Ranu negari-negarina o inuamu na dia heḡereḡere, bena orena na aemui amo o haduhuamu a? ¹⁹Lauegu mamoe ese aemui amo o moia tao reina bae ania bona aemui amo o haduhua ranuna bae inua a?

²⁰Taunabunai, Ġaubada Iehova na ini e gwau henidia tomamu: A itaia, lau sibogu na mamoe mai digaradia bona mamoe varodadia padadiai baina hahemaoro. ²¹Badina be ohemui bona paḡamui amo o hebibimu, bona manoka ḡaudia iboudiai na doamui amo o bibidia ohomu, ela bona o hakarohodia rohorohomu; ²²una dainai egu mamoe serina baina hamauria. Idia na damu ai basie hahelao lou; lau ese mamoe ta bona mamoe ta padadiai baina hahemaoro. ²³Lau ese mamoe ireḡudia tauna tamona, egu hesiai tauna David, na idia ireḡudia tauna ai baina halaoa; ia ese baine ubudia bona baine reḡudia. ²⁴A lau Iehova na edia Dirava ai bainala, bona egu hesiai tauna David ese baine lohiadia. Lau Iehova vada na hereva.

²⁵Lau idia ida baia herohemaino; uda boromadia na tano amo baina luludia lasi, bena tano ḡaḡaena ai bae noho namonamo bona uda ai bae

mahuta. ²⁶Bena egu ororo badi-tanodia ai baina hanohodia; bona medu batugudia baina hadihodia, negadia korikoridia ai; idia na hahenamo medudia ai baela. ²⁷Huahua audia huahuadia na bae dobi, tano anidia na bae habada, bona tano taudia na edia tano ai bae noho namonamo, bona edia gadea baina hamotudia bona e ġuidia taudia imadia amo baina hamauridia negana ai, idia bae diba lau na Iehova. ²⁸Idia na bese idau-idaudamudia ai basie hahelao lou, bona uda boromadia ese basie anidia lou; idia bae noho namonamo, bona tau ta ese basine hagaridia. ²⁹Lau ese imea namodia baina henidia, bona basie hitolodia lou edia tano ai, bona bese idau-idaudamudia ese basie ġonaġonalaidia lou. ³⁰Bena idia na bae diba, lau Iehova, edia Dirava, na idia ida bona idia, Israel besena taudia, na lauegu orea taudia. Ġaubada Iehova na e herevamu. ³¹Umui na lauegu mamoe, egu rei mamoesia, bona lau na emui Dirava. Ġaubada Iehova na e herevamu.

Peroveta herevana Seiri ororona latanai

35 ¹Iehova ena hereva na egu ai e kau, eto, ²Taunimanima natuna e, vairamu ba huaia Seiri ororona enai; bona ia latanai ba peroveta, ³baoto, Ġaubada Iehova na ini e gwau tomamu: Seiri ororona e, a itaia, lau ese na inai henimumu. Lau imagu baina toia roro, oi ihadikamu totona; baina habuamu tari bona baina havahumu. ⁴Emu hanua na baina habuadia tari; oi na gabu ġaġaena ai ba hahelao; bona ba diba lau na Iehova. ⁵Badina be o daġedāġe hanaihanaiva, bona Israel taudia na dare ena siahu ai o atodia kauva, edia hisi-ani negana ai, edia dava-abi orena ai; ⁶una dainai, (Ġaubada Iehova na e gwaumu), lau na maurimu heġereġerena ai lau ese baina haheġaġaemu rara ena, bona rara ese baine hahavamu; badina be rara vada o hahebubua, una dainai rara ese baine hahavamu. ⁷Seiri ororona na baina havahua bona baina habuaia tari; bona lao mai taudia iboudiai na iena amo baina hadokodia dae. ⁸Emu ororo iboudiai na e aladia mase taudia ai baina hahonudia; dare amo bae aladia mase taudia na emu ororo ai bona emu koura ai bona emu koura dobudobudia iboudiai lalodiai bae hekida diho. ⁹Baina habuamu tari hanaihanai, bona emu hanua na haida ese basie noholaidia. Bena vada ba diba lau na Iehova.

¹⁰Badina be oi oto “Ini bese ruaosi bona ini tano ruaosi na lau ese baina abidia, bona ai ese baia ġaunaidia”, (gau tamona Iehova na unuseni ai); ¹¹una dainai (Ġaubada Iehova na e gwaumu) lau na maurimu heġereġerena ai, oi ese o inai henidia dainai badu bona vaġeġe karadia o karalai henidia heġereġeredia ai lau ese baina kara henimu; bona bogaragimu ai baina hedinarai, baina hahemaoro henidia negana ai. ¹²Bena ba diba, lau Iehova ese emu hereva, Israel ororodia o gonaġonalaidia herevadia, iboudiai vada na kamoni; oto “Idia na vada e

habuadia tari; vada e henimai, baia ha-oredia”. ¹³Sibomu emu heaḡi vada o habadaia, lau ihadikagu herevadia vada o gwaurai; bona emu hereva vada o hahohodia, lau ihadikagu; lau vada na kamoni. ¹⁴Ḡaubada Iehova na ini e gwau tomamu: Tanobada idoinai ihamoalena totona lau ese baina habuamu tari. ¹⁵Israel ahuna latanai o moaleva, vada e hebua tari dainai, heḡereḡerena ai lau ese baina kara henimu; oi danu ba hebua tari, Seiri ororona bona Edom idoinai, oibe, idoinai. Bena idia bae diba lau na Iehova.

Israel ihamauri-louna

36 ¹Taunimanima natuna e, Israel ororodia ba peroveta henidia, baoto, Israel ororodia e, Iehova ena hereva ba kamoni. ²Ḡaubada Iehova na ini e gwau tomamu: Badina be inaimui ese e herevalaimui, eto ‘Aha”, bona “Ororo gunadia doridia vada a ḡaunaidia,” ³una dainai ba peroveta, baoto, Ḡaubada Iehova na ini e gwau tomamu: Oibe, badina be idia ese e habuamui tari, bona kaha iboudiai amo e taomui tari, bena bese oredia ese e ḡaunaimui, bona taunimanima ese e herevalaimui bona e hesivarailaimui. ⁴Taunabunai, Israel ororodia e, Ḡaubada Iehova ena hereva ba kamoni; ororo badadia bona maraḡidia, bona koura dobudobudia bona koura iboudiai, bona gabu gagaedia bona hanua ahutudia, bese oredia hegegmadai ai ese damudia ai vada e halaodia bona vada e kirikirilaidiamu ḡaudia na Ḡaubada Iehova ese ini e hereva henidia tomamu. ⁵Taunabunai, Ḡaubada Iehova na ini e gwau tomamu: Egu vaḡeḡe bada lalonai lau ese bese oredia bona Edom idoinai danu na gwau dika henidiamu; idia ese egu tano e ḡaunaia mai moale badana bona mai hedadarai bada-hereana ida, bae abia bona lalonai bae dadidadi totona. ⁶Taunabunai, Israel tanona ba perovetalaia, ororo badadia bona maraḡidia, bona koura dobudobudia bona koura iboudiai, ba hamaorodia, baoto, Ḡaubada Iehova na ini e gwau tomamu: A itaia, egu vaḡeḡe baduna ai na herevamu; badina be bese idau-idau edia hedunirai herevadia na umui latamui ai. ⁷Taunabunai, Ḡaubada Iehova na ini e gwau tomamu: Lau na gwau hamatamu, na tomu, e gegemui dae besedia latadiai hedunirai herevadia na bae kau.

⁸A umui, Israel ororodia e, emui au rigidia bae gara kau, bona emui au huahuadia bae dobi, egu bese Israel adia; badina be asi vanahana edia gabu korikori bae lou henia. ⁹Badina be, a itaia, lau na umui ida; lau ese baina hageremui, bena bae ruamui bena uhemui bae hado. ¹⁰Bena lau ese taunimanima baina hahutumadia latamui ai, Israel besena idoinai, oibe, idoinai; hanua bae noholaidia, bona e heḡiḡi dobi hanuadia ma bae haginidia lou. ¹¹Taunimanima bona ubu-ubu ḡaudia na baina hahohodia umui latamui ai; bae hutuma, bae vara rohoroho. Bae noholaimui taudia baina hahutumadia, nega gunadia heḡereḡeredia, bona baina hanamomui

badabada. Bena vada ba diba lau na Iehova. ¹²Oibe, baina gwau maoro, bena egu bese, Israel taudia, na latamui ai bae loaloa; bae ġaunaimui, ahudia ai bae halaomui; bona natudia na mase ai basio abidia oho lou. ¹³Ġaubada Iehova na ini e gwau tomamu: Badina be taunimanima ese e gwau henimuimu, e tomu “Umui ese taunimanima o ha-orediamu bona emui bese taudia natudia na mase ai o abidia ohomu”, ¹⁴una dainai umui ese taunimanina basio ha-oredia lou, bona emui bese taudia natudia na mase ai basio abidia oho lou. Ġaubada Iehova na e herevamu. ¹⁵Bena lau ese bese idau-idau baina gwaudia tubu, basie lodu henimui lou, bona taunimanima hemaraidia na basio hua lou, bona emui bese na basio hahekwakwanaia lou. Ġaubada Iehova na e herevamu.

¹⁶Iehova ena hereva na egu ai e kau, eto, ¹⁷Taunimanima natuna e, Israel besena taudia na edia tano korikori ai e nohova negana ai, idia ese edia dala bona edia kara amo e hamiroa; edia kara lau vairagu ai na mimiro, hahine ta ena rara-kara mirona na heto. ¹⁸Taunabunai egu badu na latadi ai na bubua, idia ese rara na tano ai vada e hahebubua bona tano na kaivakuku amo e hamiroa davana. ¹⁹Bese idau-idau bogaragidiai na hakarohodia, bena tano idau-idau lalodiai e karo ho rohoroho; edia noho bona edia kara heġereġeredia ai na hahemaoro henidia. ²⁰A bese idau-idau ediai e kau, bena e kau gabudia iboudiai lalodiai idia ese lau ladagu helaġana e hamiroa; badina be taunimanima ese e herevalaidia, eto, Ina na Iehova ena orea taudia, ġau tamona iena tano amo e harakadia lasi. ²¹A lau ladagu helaġana, Israel taudia ese ediai e kau besedia bogaragididi e hamiroa ġauna, na lau ese na helalolaia bada.

²²Taunabunai, Israel besena taudia ba hamaorodia, baoto, Ġaubada Iehova na ini e gwau tomamu: Israel besena e, lau ba ġaukaramu na dia umui daimui ai, to lau ladagu helaġana, ediai o kau besedia bogaragidiai o hamiroa ġauna, dainai. ²³Lau ladagu hereana ena helaġa, bese idau-idau bogaragidiai vada e miro badina be umui ese vada o hamiroa ġauna, na lau ese baina gwauraia maoro; bena umui emui amo egu helaġa na idia vairadi ai baina gwauraia maoro negana ai, bese idau-idau bae diba lau na Iehova. Ġaubada Iehova na e herevamu. ²⁴Badina be bese idau-idau bogaragidia amo baina abimui, bona tano iboudiai lalodia amo baina gogomui, bena emui tano korikori ai baina hakamui vareai. ²⁵Lau ese ranu negarinegarina amo baina sisirimui, bena emui miro idoinai amo ba ġoewa; bona emui kaivakuku iboudiai edia amo baina haġoewamui. ²⁶Lalo matamatana baina henimui, bona lauma matamatana na lalomui ai baina atoa; Ialo-auka na umui lalomui amo baina abia oho, Ialo-manada baina henimui. ²⁷Egu lauma na lalomui ai baina atoa; egu taravatu lalodiai baina harakamui; bona egu hahemaoro herevadia ibadinadia ai baina hamanadamui. ²⁸Senemui na henidia tanona ai ba noho; egu bese ai baola, lau danu emui Dirava ai bainala.

²⁹Emui miro iboudiai amo baina haḡoevamui; bona uma ḡaudia baina haḡanidia, bae vara momo; basina hahitolomui. ³⁰Au huahuadia bona uma anianidia baina hahohodia; bena bese idau-idau bogaragidiai basio hemarai lou, hitolo dainai. ³¹Bena emui dala dikadia bona emui kara dia nanamo ba lalodia tao, bena sibomui ba hedadarai, emui kara havara bona emui kara dika-rohorohodia daidiai. ³²Ḡaubada Iehova na e tomu, Baina ḡaukara, to dia umui daimui ai; una na ba diba. Israel besena taumui e, emui dala daidiai ba hemarai bona ba baia.

³³Ḡaubada Iehova na ini e gwau tomamu: Emui kara havara iboudiai amo baina haḡoevamui dinana ai, lau ese taunimanima na hanua lalodiai baina hanohodia, bona e heḡiḡi dobi hanuadia na bae haginidia lou. ³⁴E vahu tanona na bae biru henia, bena raka-hanai taudia iboudiai ese vahuna ai basie itaia lou. ³⁵Bena idia na baeto, Hari e vahu tanona na Ede imeana heḡereḡerena ai vada ela; bona e havahudia, e habuadia tari, e ḡiḡidia dobi hanuadia na haida ese e noholaidiamubona e maḡudiamu. ³⁶Bena doene e ḡeḡemui daemu besedia na bae diba lau Iehova ese e heḡiḡi dobi hanuadia vada na haginidia lou, bona e vahu tanodia ai vada na hadohado lou. Lau Iehova vada na hereva; bona karana do baina karaia.

³⁷Ḡaubada Iehova na ini e gwau tomamu: Israel besena taudia baina ha-uradia dainai, ina danu egu ai bae noia; edia taunimanima na baina hahutumadia, mamoe serina na heto. ³⁸Boubou mamoeserina na heto, e gwaurai hata negadia ariadia ai Ierusalem ai e habouamu serina na heto, vada e vahu hanuadia na taunimanima seridia ai bae honu. Bena idia bae diba lau na Iehova.

Turia kakorodia kourana

37 ¹Iehova imana na latagu ai, bena ia ese Iehova ena Lauma amo e abigu, e laohaigu, koura ta ai e atogu diho; una koura na turia ai e honu. ²Bena bogaragidiai e hakaugu eva-eva; na itadia, idia na momo herea una koura ai, bona idia na kakakoro. ³Bena ia ese e nanadaigu, eto, Taunimanima natuna e, ini turia na bae mauri diba a? Lau na haere, nato, Ḡaubada Iehova e, oi hari mai dibamu. ⁴Ma e hereva henigu, eto, Ini turia na ba peroveta henidia, baoto, Turia kakorodia e, Iehova ena hereva ba kamona. ⁵Ḡaubada Iehova ese ini turia na ini e hereva henidiatomamu: A itaia, baina hahoho henimui, bena ba mauri. ⁶Varovaro na latamui ai baina atodia, bona hidiomui baina hadudu, bona kopi amo baina govamui; bena baina hahoho henimui, bena ba mauri. Bena ba diba lau na Iehova.

⁷Taunabunai, lau na peroveta, vada e haḡanigu heḡereḡerena; bena na perovetava lalonai hesede-hesede reḡena e reḡedagu; bena turia na e hahebou, turia ta ta ena gabu ena gabu ai e hemudu-hemudu kau. ⁸Na

itadia negana ai, idia na mai varovarodia, bona hidio ese e hadududia ahu, bona kopi ese e ġovadia, a dounu asi laġadia. ⁹Bena ia ese e hamaorogu, eto, Taunimanima natuna e, laġa ba peroveta henia, laġa ba hamaoroa, baoto, Ġaubada Iehova na ini e gwau tomamu: Laġa e, lai haniosi kahadia amo baoma, ini vada e aladia mase taudia na ba hahoho henidia, bena bae mauri. ¹⁰Taunabunai, lau na peroveta, e haġanigu heġereġerena, bena laġa na idia lalodiai e vareai; bena e mauri, e tore isi, hutuma bada herea.

¹¹Bena ia ese e hamaorogu, eto, Taunimanima natuna e, ini turia na Israel besena idoinai. A itaia, idia na e tomu, Turiamai vada e kakoro, emai helaro vada e boio; vada e negemai daure. ¹²Taunabunai ba peroveta henidia, baoto, Ġaubada Iehova na ini e gwau tomamu: Egu bese e, a itaia, emui guri baina kehodia, emui guri amo baina hatoremui isi, bena baina hakaumui lou, Israel tanona ai. ¹³Egu bese e, emui guri baina kehodia bona emui guri amo baina hatoremui isi negana ai, vada ba diba lau na Iehova. ¹⁴Bena egu Lauma na lalomui ai baina atoa, bena ba mauri; bena emui tano korikori ai ma baina hanohomui. Bena ba diba, lau Iehova vada na hereva bona karana vada na karaia. Iehova na e herevamu.

Juda bona Israel bae tamona

¹⁵Iehova ena hereva na egu ai e kau, eto, ¹⁶Taunimanima natuna e, au ta bavabia bona ia latanai ba torea: “Juda, bona Israel taudia ia ida e heboumu, edia”. Bena au ma ta bavabia bona ia latanai ba torea: “Iosef (Efraim auna), bona Israel besena idoinai ia ida e heboumu, edia”. ¹⁷Bena au ruaosi ba hahesiriudia, au tamona ai baela oi imamu ai. ¹⁸Bena emu orea taudia ese bae nanadaimu, baoto “Ina kara anina basioma hamaorolaimai a?” negana ai ¹⁹ba haere henidia, baoto, Ġaubada Iehova na ini e gwau tomamu: A itaia, Iosef bona Israel iduhudia ia ida e heboumu edia au (Efraim imana ai e miamu ġauna) aina abia, Juda ena au ida baina hahesiriudia, au tamona ai baina halaodia lau imagu ai. ²⁰Hari latadiai revareva vada o tore audia na idia vairadiai ui imamu ai bae mia negana ai, ²¹ba hereva henidia, baoto, Ġaubada Iehova na ini e gwau tomamu: A itaia, lau ese Israel taudia na bogaragidiai vada ela besedia edia amo ma baina abidia, kaha iboudia amo baina haboudia, edia tano korikori lalonai baina hakaudia vareai. ²²Bena bese tamona ai baina halaodia una tano ai, Israel orordia ai; pavapava tamona ese iboudia baine pavapavadia. Idia na bese rua ai basie hahelao lou, bona basileia rua ai basie haheparara lou. ²³Edia kaivakuku eiava edia ġau dika-rohorohodia eiava edia kerere amo sibodia basie hahemiro lou; a edia raka muri ai e kara dika karadia iboudia amo baina hamauridia bona baina haġoevadia. Idia na lauegu bese ai baela, bona lau na edia Dirava ai bainala.

²⁴Egu hesiai tauna David ese baine pavapavadia; iboudiai na iregudia tauna tamona ese baine regudia. Egu hahemaoro herevadia na bae gavadia,

bona egu taravatu na bae badinadia namonamo. ²⁵Senemui ese e noholoia tanona, egu hesiai tauna Iakob na henia tanona, lalonai bae noho; idia bona natudia bona garadia na unuseni ai bae noho, ela bona hanaihanai; bona egu hesiai tauna David ese baine pavapavadia hanaihanai. ²⁶Lau na idia ida baia heroheimaino; emai heroheimaino baine hesiriu hanaihanai. Lau ese baina hanamodia bona baina hahutumadia; egu gabu helaḡana na idia bogaragidiai baina atoa, unuseni ai baine mia hanaihanai. ²⁷Idia ida baina noho; edia Dirava ai bainala, egu bese ai baela. ²⁸Bena egu gabu helaḡana na idia bogaragidiai e miamu ma baine mia hanaihanai dainai, bese idau-idau na bae diba lau Iehova ese Israel na hahelagaiamu.

Peroveta herevana Gog latanai

38 ¹Iehova ena hereva na egu ai e kau, eto, ²Taunimanima natuna e, Gog, Magog tanona tauna, Mesek bona Tubal lohiadia badana, ba vaira henia bona latanai ba peroveta, ³baoto, Ġaubada Iehova na ini e gwau tomamu: Gog e, Mesek bona Tubal lohiadia badana e, lau ese oi na inai henimumu; ⁴baina haginimu kerehai, igau na aukimu ai baina ḡau, bena baina verimu lasi; bona emu tuari oreana idoinai danu, hosi bona hosi-gui taudia, iboudiai na mai edia tuari dabuadia, tau-anidia iḡovalai-ḡuḡurudia ḡaudia, orea bada-hereana, iboudiai na mai edia keme auridia bona kesi, bona mai edia dare imadia ai. ⁵Parasa bona Kusu bona Put taudia na idia ida; iboudiai na mai edia kesi bona auri kwara-gaudia; ⁶Gomere mai ena hutuma idoinai ida; Bete-togarama danu mirigini kahana gabu daudaudia amo, mai ena hutuma idoinai ida; bese momo na oi ida.

⁷A hegaegae, bona ba heḡaeḡae noho, oi bona emu ai e heboumu oreadia badadia iboudiai, bona ba gimadia. ⁸Dina hoho muridiai bae haheboumui; bena laḡani gabedia ai tuari ena hahedika amo vada e hanamoa lou tanona, bese loḡora bogaragidia amo taunimanima na Israel orordia ai vada e haboudia tanona, vada e vahu loulou tanona, na umui ese do ba tuari henia. Ena taunimanima na bese idau-idau bogaragidia amo e hakaudia lasi, bona harihari idia iboudiai na e noho namonamomu. ⁹A ba ore aisi, baola, lai gubana na heto, dagadaga ese tano bema ḡovaia ahu na heto, oi bona emu hutuma idoinai bona bese momo oi ida.

¹⁰Ġaubada Iehova na ini e gwau tomamu: Una dina ai lalo-hadai haida na lalomu ai bae vara, bena kara dikana ta ba laloa hata, ¹¹baoto, Lau ese asi maḡudia hanuadia tanona baina tuari henia; unu asi reḡereḡedia

e noho namonamomu, edia ruma na asi maḡudia, asi auridia, asi ikoukoudia, taudia na baina daedia; ¹²edia kohu baina dadi, bona baina dadi ḡaudia na baina laohai; gunaguna e vahu a harihari taunimanima ese e noholaimu gabudia baina tuari henidia; bona bese idau-idau bogaragidia amo vada e hahebou edia boromakau bona edia kohu vada e habou taudia, tano bogaraginai e nohomu taudia, danu baina tuari henidia. ¹³Sieba bona Dedan, bona Tarasisi ena hoihoi taudia bona hanuana iboudiai, ese bae nanadaimu, baeto, Oi na kohu idadidia totona vada oma a? Emu hutuma vada o haheboudia, ba dadi kohudia bae hua lao, *silver* bona *gold* bae huadia lao bona boromakau bona kohu bae laohaidia, ḡau momo herea bae dadi totona a?

¹⁴Taunabunai, taunimanima natuna e, ba peroveta, Gog ba hamaorua, baeto, Ḡaubada Iehova na ini e gwau tomamu: Una dina ai egu bese Israel e noho namonamomu negana ai, oi na ba tore isi, ¹⁵emu gabu, mirigini kahana gabu daudaudia, amo baoma, oi bona bese momo oi ida, iboudiai na hosi ai bae gui, hutuma bada-herea, tuari oreana mai goadana. ¹⁶Baoma, egu bese Israel taudia ba daedia, dagadaga ese tano e ḡovaia ahumu na heto. Dina gabedia ai, lau ese baina hakaumu mai, egu tano ituari-henina totona; bena oiemu amo, Gog e, egu helaḡa na bese idau-idau vairadialai baina hamomokania, unu amo idia ese bae dibagu.

¹⁷Ḡaubada Iehova na ini e gwau tomamu: Nega gunadia ai egu hesiai taudia, Israel ena peroveta taudia, ududia amo na herevalaia tauna na oi a? Idia na laḡani gunadia lalodialai e perovetava oi baina mailaimu idia ituarihenidia totona. ¹⁸Ḡaubada Iehova ma e tomu, A una dina ai, Gog ese Israel tanona ituari-henina bainema dinana ai, egu badu baine vara. ¹⁹Badina be egu vaḡeḡe ai bona egu badu ḡaraḡara ai na gwaumu, Una dina ai Israel tanona baine heude-heude bada; ²⁰davara gwarumedia, atai manudia, uda boromadia, tano ai e raumu ḡaudia iboudiai, bona tanobada latanai e nohomu taudia iboudiai danu, bae heude-heude lau vairagu ai; ororo danu bae heḡiḡi dobi bona haga nadidia bae moru, bona maḡu iboudiai na tano ai bae heḡiḡi dobi. ²¹Ḡaubada Iehova na e lomu, Hahegari karadia idau-idau iboudiai baina havaradia, Gog ihadikana; taunimanima iboudiai na tadikakadia ida bae heala-ala heheni, edia dare amu. ²²Dai-hanai gorereana bona rara ihahebubuna amo baina hahemaoro henia, bona medu bada-hereadia bona medu-hetaridia, lahi bona teio na ia bona ena hutuma bona baine bamoā besedia loḡora latadialai baina hadiho.^p ²³Unu amo egu herea-dae bona egu helaḡa baina hahedinaraidia, bona bese momo vairadialai sibogu baina hahedinarai. Bena idia bae diba lau na Iehova.

^p 38.22 Teio; Nadi ta ladana, Helene gado ai. E aramu bena bonana dika-hereana e daemu, taunimanima e hamasediamu. Ladana English gado ai na “sulphur”.

39 ¹Taunimanimata natuna e, Gog latanai ba peroveta, baoto, Ġaubada Iehova na ini e gwau tomamu: Gog e, Mesek bona Tubal lohiadia badana, lau ese na inai henimumu; ²lau ese baina haginimu kerehai bona baina lulumu lao, mirigini kahana gabu daudaudia amo baina mailaimu, baina hakaumu, Israel ororodia ituari-henidia ai; ³bena emu peva na imamu laurina amo baina pataia oho, bona emu diba na imamu idibana amo baina hamorudia. ⁴Bena Israel ororodia ba hekida diho, oi bona emu hutuma idoinai bona e bamomumu besedia; bena lau ese baina abimui, kasiri-ani manudia idau-idau bona uda bolomadia adia ai baina halaomui; ⁵tano paka ai do ba hekida diho, badina be lau, Ġaubada Iehova, vada na hereva. ⁶Lau ese lahi baina siaia lao, Magog latanai, bona kone tanodia ai e noho namonamomu taudia latadiai; bena idia bae diba lau na Iehova.

⁷Bena lau ladagu helaġana baina hahedibalaia, egu bese Israel bogaraginai; baina gwaudia tao, lau ladagu helaġana basie hamiroa lou; bena bese idau-idau na bae diba, lau na Iehova, Helaġa Diravana Israel ai. ⁸Ġaubada Iehova na e tomu, A itaia, ia na e maimu, vada be kaumu. Lau ese vada na herevalaia dinana bunai.

⁹Bena Israel hanuadia e noholaidiamu taudia na bae raka lasi, tuari ġaudia na lahi ai bae haboudia, bae doudia; kesi bona keme auridia, peva bona diba, kareva bona io. Lahi audia ai bae halaodia ela bona laġani hitu bae ore; ¹⁰taunabunai idia ese au na tano paka ai basie abi eiava uda ai basie utu, badina be edia lahi na unu tuari ġaudia amo bae raku; edia ġau e dadi taudia ediai ġau ma bae dadi, bona edia kohu e abi oho taudia ediai kohu ma bae abi oho. Ġaubada Iehova na e herevamu.

¹¹Una dina ai lau ese Gog na gara gabuna ta baina henia Israel ai, koura ta ladana na “Laolao taudia edia Koura”, Tadi Gohuna mairiveina kahana ai. Laolao taudia edia dala na baine helao ahu, badina be unuseni ai Gog bona ena hutuma idoinai na bae guridia; ladana bae hatoa Hamono-gog Kourana. ¹²Hua hitu lalodiai Israel besena taudia ese bae guridia, tano ihaġoevana totona. ¹³Tano taudia iboudiai ese bae guridia; bena idia haridia bae namo, lau ese hairaigu baina hahedinarai dinana ai. Ġaubada Iehova na e herevamu. ¹⁴Tatau haida bae gwauraidia hidi, idia ese tano bae rakaia hanai loulou bona tano kopina ai miadia taudia bae guridia totona; unu amo tano bae haġoevaia. Hua hitu bae ore ai do bae hetahu. ¹⁵Bena tano iraka-hanaina ai idia ta ese tau ta turiana baine davaria negana ai, ia ese toa ta baine holoa una turia badibadinai, ela bona mase iguridia taudia ese Hamono-gog Kourana ai bae ġuria. ¹⁶(Hanua ta ladana Hamona na unuseni ai danu.) Tano na unu bae haġoevaia toma.

¹⁷Taunimanimata natuna e, Ġaubada Iehova ese ini e hereva henimu tomamu: Manu idau-idau bona uda boromadia iboudiai na ba hereva

henidia, baoto, Ba hegogo bena baoma; kaha iboudiai amo ba hebou, boubou ariana lau ese na hegaegaelaiamu amui na bavania, boubou ariana badana Israel ororodia ai; vamu bame ani bona rara bame inu. ¹⁸Goadaherea taudia hidiodia bavani, bona tanobada lohiadia raradia ba inu; mamoe mamaruanedia bona mamoe natudia bona nani bona boromakau mamaruanedia danu, iboudiai na Basan ubu-ubu boromadia. ¹⁹Digara bavania, ela bona bogamui bae kunuka-kunuka, bona rara ba inua, ela bona ba kekero, hari boubou ariana, amui na hegaegaelaiamu gauna, lalonai. ²⁰Egu dabara ai, hosi bona hosi-gui taudia amo, goadaherea taudia bona tuari taudia idau-idau amo, bogamui do bae kunu. Gaubada Iehova na e herevamu.

²¹Lau hairaigu na bese idau-idau bogaragidiai baina hahedinarai; bena bese iboudiai ese egu hahemaoro karana bona imagu, latadai na atoa gauna, bae itadia. ²²Israel besena na una dina amo bae diba, lau na Iehova, edia Dirava. ²³Bena bese idau-idau na bae diba, Israel besena na igui gabuna ai ela, edia kara havara dainai; badina be edia kara amo e koigu dikadika dainai lau ese vairagu na edia amo na hunia, bona adia inai taudia imadia ai na atodia, bena iboudiai na dare ai e mase. ²⁴Edia miro bona edia kerere hegeregeredia ai na kara henidia, bona vairagu na edia amo na hunia.

²⁵Taunabunai, Gaubada Iehova na ini e gwau tomaunu: Harihari Iakob ena noho-namo baina havaraia lou, bona Israel besena idoinai baina bogaia hisi; bona lau ladagu helašana vagegena baina vagege. ²⁶⁻²⁷Bena bese idau-idau bogaragidia amo baina loulaidia, bona inaidia edia tano hidaosi amo baina haboudia, bona idia edia amo egu helašana na bese momo vairadai baina hamomokania negana ai, idia ese edia hemarai bae laloa boio, bona edia kara koikoi, lau e koilaigu karadia, edia tano ai e noho namonamova bona haida ese asie hagaridiava negadia ai e karava karadia, danu bae lalo boio. ²⁸Bena idia bae diba, lau na Iehova, edia Dirava; badina be gabu daudau ai na hanohodia, bese idau-idau bogaragidiai, bena ma na gogodia lou, edia tano korikori ai. Lau ese idia ta na bese idau-idau bogaragidiai basina rakataia lou; ²⁹bona vairagu na edia amo basina hunia lou; egu Lauma ese Israel besena baine rohea. Gaubada Iehova na e herevamu.

Esekiel ena mata-hanai

40 ¹Dauhai e hanohomai lašana iharuahui-imana matamana ai, hua dinana ihagwautana ai, hanua badana e hadarerea murinai lašana gwauta-hani vada e lao bubuni ai, una dina lalonai Iehova imana na vada latagu ai; ²bona Dirava ese e henigu mata-hanaidia ai Israel tanona e laohaigu, ororo badana ta dorina ai e haginigu diho, gau ta, ita-itana na hanua badana ta na heto, hevaira-hehenina ai.

³Unuseni ai e haginigu diho negana ai, tau ta na itaia, ita-itana na auri labora-labora na heto, mai ena hahetoho varona bona ena hahetoho sirihona imana ai. Ia na ikoukou ai e gini. ⁴Bena una tau ese e hereva henigu, eto, Taunimanima natuna e, lau ese baina haheitalaimu ġaudia iboudiai na matamu amo ba itadia, bona taiamu amo ba kamona bona lalomu amo ba haerodia, badina be ini ġau baina haheitalaimu totona e mailaimu iniseni ai. Ba ita ġaudia iboudiai na Israel besena taudia ba hamaorolaidia.

⁵Bena na itaia, maġu ta ese dubu tanona e ġeġea dae. Hari hahetoho sirihona una tau imana ai latana na kiubit badadia tauratoi.⁴ (Unu kiubit badadia ta anina be kiubit idoinai ta bona ima-palapala lababana ta). Bena ia ese maġu udunana e hahetohoa, hahetoho sirihona auta heġereġerena; harana latana danu hahetoho sirihona auta heġereġerena. ⁶Bena mairiveina kahana e vaira henia ikoukouna idae-lao-henina ai, vadavadana amo e dae; bona ikoukou raka-vareaina e hahetohoa, lababana na hahetoho sirihona auta heġereġerena. ⁷Ohe daiutudia danu latadiai na hahetoho sirihona auta, bona lababadia danu hahetoho sirihona auta. Daiutu padadia na kiubit ima. Ikoukou raka-vareaina, ikoukou dehena laloma kahana ai, na hahetoho sirihona auta heġereġerena. ⁸Bena ia ese ikoukou dehena e hahetohoa: ia na kiubit taurahani; ⁹bona ena ihua-ihua danu, idia na kiubit rua. Hari ikoukou dehena na laloma kahana ai. ¹⁰Mairiveina kahana ikoukouna ohena kahana kahana na daiutu toi toi amo; toiosi edia bada na heġereġere; bona ohe kahana kahana ihua-ihuadia edia bada danu heġereġere. ¹¹Bena ia ese ikoukou raka-lasina e hahetohoa, kiubit gwauta; bona ikoukou idoinai lababana, kiubit gwauta-toi. ¹²Ohe kahana kahana daiutudia na mai seaseadia lababadia kiubit tamona, bona hari daiutu na kiubit tauratoi, ohe kahana kahana ai. ¹³Bena ikoukou na e hahetohoa, ohena ta daiutuna durana iduarana amo ela bona ma ohena ta daiutuna durana iduarana, lababa idoinai na kiubit ruahui-ima, iduara amo ela bona iduara. ¹⁴Dehe danu e hahetohoa, kiubit ruahui; maġu ta ese ikoukou dehena e ġeġea dae. ¹⁵Ikoukou vaira-kahana raka-vareaina ela bona ikoukou lalona kahana dehena na kiubit imahui. ¹⁶Ikoukou heġeġemadai ai na gaba-mauru haida; ihua-ihua padadia na hahaga murimuri kahadia ai bona i'iora laloma kahadia at; bona dehe danu mai gaba-mauruna laloma kahana hegegemadai ai. Ihua-ihua ai be pamu audia laulaudia.

¹⁷Bena ia ese murimuri kahana maġuna lalonai e hakaugu vareai; unuseni ai daiutu haida bona nadi ariarana ta na itadia, maġu e ġeġea dae; daiutu toi-ahui ese hari nadi ariarana e vaira henia. ¹⁸Hari

⁴ 40.5 Kiubit hadadia tauratoi = 3 metres sisivana.

nadi ariarana na ikoukou badibadidiai ela; lababana na hari ikoukou lababadia hegeregeredia. Una nadi ariarana na henu ariarana. ¹⁹Bena ia ese hari henu ikoukouna ena laloma kahana bona laloma maḡuna ena murimuri kahana padadia e hahetohoa; padadia na kiubit sinahu-ta.

Bena ia na lau vairagu ai ela, mirigini kahana ala; ²⁰unuseni ai ikoukou ta ese mirigini kahana e vaira henia; una na murimuri kahana maḡuna ikoukouna. Ia ese latana bona lababana e hahetohodia. ²¹Ena ohe daiutudia, toi kahana ai toi kahana ai, bona ena ihua-ihua bona ena dehe edia bada na ikoukou gini-gunana ena hegeregeredia; latana na kiubit imahui bona lababana na kiubit ruahui-ima. ²²Ena gaba-mauru, ena dehe bona ena pamu audia laulaudia edia bada na hari mairiveina kahana e vaira henia ikoukouna ena hegeregeredia. Vadavada moi-kaudia auhиту amo e dae henia; bona dehena na ena laloma kahana ai. ²³Hari mirigini kahana ikoukouna hevaira-hehenina ai na laloma maḡuna ikoukouna ta, mairiveina kahana ḡauna hegeregerena; bena ia ese padadia e hahetohoa, ikoukou ta ela bona ikoukou ta padadia na kiubit sinahu-ta.

²⁴Bena ia ese diho kahana ma e hakaugu lao; bena ikoukou ma ta na itaia diho kahana ai. Ena ihua-ihua bona ena dehe e hahetohodia; edia bada na unu haida edia hegeregeredia. ²⁵Gaba-mauru ese ia bona ia dehena e hahegegedia dae, unu haida edia gaba-mauru hegeregeredia; ia latana na kiubit imahui bona lababana na kiubit ruahui-ima. ²⁶Vadavada moi-kaudia auhиту amo e dae henia, bona dehena na ena laloma kahana ai; ena ihua-ihua ai na pamu audia laulaudia, ta ohena ta ai, ma ta ohena ta ai. ²⁷Laloma maḡuna ena diho kahana na mai ikoukouna. Bena ia ese padadia e hahetohoa, ikoukou ta amo ela bona ikoukou ta, diho kahana ai; padadia na kiubit sinahu-ta.

²⁸Bena ia ese laloma maḡuna lalonai e hakaugu vareai, diho kahana ikoukouna amo. Bena ia ese diho kahana ikoukouna e hahetohoa; ena bada na unu haida edia hegeregeredia. ²⁹Ena ohe kahana kahana daiutudia, ena ihua-ihua bona ena dehe na unu haida hegeregeredia; gaba-mauru ese ia bona ia dehena e hahegegedia dae; ia latana na kiubit imahui bona lababana na kiubit ruahui-ima. ³⁰Dehe haida ma e ḡegea dae, latadia na kiubit ruahui-ima bona lababadia na kiubit ima. ³¹Dehena na murimuri kahana maḡuna e vaira henia; ena ihua-ihua ai na pamu audia laulaudia; vadavada moi-kaudia taurahani amo e dae henia.

³²Bena ia ese laloma kahana maḡuna ai e hakaugu vareai, mairiveina kahana ai. Ia ese ikoukou e hahetohoa; ena bada na unu haida edia hegeregeredia. ³³Ena ohe kahana kahana daiutudia, ena ihua-ihua bona ena dehe edia bada na unu haida edia hegeregeredia. Gaba-mauru ese e hahegegea dae. Ia latana na kiubit imahui, bona lababana na kiubit ruahui-ima. ³⁴Ia dehena ese murimuri kahana maḡuna e vaira henia. Ena

ihua-ihua ai na pamu audia laulaudia, ta ohena ta ai, ma ta ohena ta ai. Vadavada moi-kaudia taurahani amo e dae henia.

³⁵Bena ia ese ma e hakaugu lao, mirigini kahana ikoukouna ala. Bena e hahetohoa; ena bada na unu haida edia hegeregeredia. ³⁶Ena ohe kahana kahana daiutudia, ena ihua-ihua bona ena dehe edia bada na unu haida edia hegeregeredia. Gaba-mauru ese e hahegegea dae. Ia latana na kiubit imahui, bona lababana na kiubit ruahui-ima. ³⁷Ia dehena ese murimuri kahana ikoukouna e vaira henia. Ena ihua-ihua ai na pamu audia laulaudia, ta ohena ta ai, ma ta ohena ta ai. Vadavada moi-kaudia taurahani amo e dae henia.

³⁸Daiutu ta iduarana na ikoukou dehena ai; unuseni ai gōle-oho boubouna na bae huria. ³⁹Ikoukou dehena ai danu na pata rua, ohe kahana kahana ai; idia latadiai gōle-oho bona kara dika bona kerere boubou gaudia bae aladia mase. ⁴⁰Dehe murimurina kahana ai, mirigini kahana ikoukouna raka-vareaina ai, na pata rua; hona ikoukou dehena kahanadanu pata rua. ⁴¹Pata hani na laloma kahana ai bona pata hani na murimuri kahana ai, ikoukou raka-vareaina ai; pata taurahaniosi latadiai boubou gaudia na bae aladia mase. ⁴²E utu hata nadidia patadia hani danu mimia, gōle-oho boubou gaudia patadia. Latadia na kiubit ta mai kahana, lababadia danu kiubit ta mai kahana, bona haradia latadia be kiubit tamona. Gōle-oho bouboudia bona boubou haida ialalaidia gaudia na unu pata latadiai bae heato. ⁴³Igau haida danu, edia lata na ima-palapala ta lababana hegeregerena, na lalonai e hetau dae hegege. Unu pata latadiai na boubou gaudia hidiodia bae atodia.

⁴⁴Bena ia ese murimuri kahana amo e hakaugu vareai, laloma maḡuna lalonai; unuseni ai daiutu rua na itadia, laloma maḡuna lalonai. Ta be mirigini kahana ikoukouna badibadinai, diho kahana e vaira henia. Ma ta be diho kahana ikoukouna badibadinai, mirigini kahana e vaira henia. ⁴⁵Ia ese e hamaorogu, eto, Ina diho kahana e vaira heniamu daiutuna na hahelaḡa taudia, dubu e biaguamu taudia, edia; ⁴⁶bona mirigini kahana e vaira heniamu daiutuna na hahelaḡa taudia, ihaboulaina patana e biaguamu taudia, edia. Unu na Sadok garana; Levi garana iboudiai bogaragidiai amo idia sibodia ese Iehova bae raka henia kahi, isiaina ilao-henina totona. ⁴⁷Bena ia ese maḡu e hahetohoa: ena lata na kiubit sinahu-ta bona ena lababa na kiubit sinahu-ta; kahana haniosi na hegeregere. Ihaboulaina patana na dubu vairanai.

⁴⁸Bena ia ese e hakaugu lao, dubu dehena ala. Ia ese dehe ihua-ihuana e hahetohodia; idia na kiubit ima, ohe kahana kahana ai. Ikoukou lababana na kiubit gwauta-hani; bona ikoukou ohena habadia na kiubit toi, ohe kahana kahana ai. ⁴⁹Dehe ena lata na kiubit ruahui, bona ena lababa na kiubit gwauta-rua. Vadavada moi-kaudia gwauta amo e dae henia; bona ihua-ihua badibadidiai na au-tubua, ohe kahana kahana ai.

41 ¹Bena ia ese dubu ai e hakaugu vareai; bena ihua-ihua e hahetohodia. Ohe kahana kahana ai ihua-ihua padadia na kiubit tauratoi. ²Rakavareaina lababana na kiubit gwauta; bona raka-vareaina ohena habadia na kiubit ima, ohe kahana kahana ai. Dubu laloma kahana e hahetohoa; ena lata na kiubit hari-ahui bona ena lababa na kiubit ruahui. ³Bena ia ese laloma daiutuna ai e raka vareai, raka-vareaina ihua-ihuana e hahetohodia, kiubit rua; bona raka-vareaina lababana, kiubit tauratoi; bona raka-vareaina ohena habadia, kiubit hitu. ⁴Daiutu e hahetohoa, ena lata bona ena lababa na kiubit ruahui, dubu durana kahana ai. Ia ese e hamaorogu, eto, Ina na gabu helağa-hereana.

⁵Bena ia ese dubu habana e hahetohoa, udunana na kiubit tauratoi. Ohena daiutudia lababadia na kiubit hani, idia ese dubu e hahegegea dae. ⁶Hari ohe daiutudia na ere toi, latana latana ai. Daiutu na toi-ahui toi-ahui amo, ere Ia ta ai. Dubu hegegemadai ai to-tao gaudia e kara, dubu habana ai, bena daiutu lavadia na unu gau latadiai e heato kau, unu lava na dubu habana lalonai basie hetoi vareai helaoreana. ⁷Hari ohe kahana kahanil daiutudia lababadia na e bada e laova, henu erena amo ela bona atai erena, to-tao gaudia na henu erena amo ela bona atai erena e bada e laova hegeregerena, dubu hegegemadai ai. Dubu ohena ai vadavada ta e daeva, unu amo taunimanima na henu erena amo e dara daeva ela bona bogaragi erena, bona bogaragi erena amo e dara daeva ela bona atai erena. ⁸Na itaia danu, dubu hegegemadai ai na patapata ta. Hari ohe kahana kahana daiutudia badidia na e hahetohodia, idia na hahetoho sirihona idoi ta, kiubit badadia tauratoi hegeregerena. ⁹Ohe kahana kahana daiutudia murimuridia kahadia habadia lababadia na kiubit ima; patapata mia-gağaena kahana lababana na kiubit ima. Hari dubu patapatana ¹⁰bona mađu daiutudia padadia na kiubit ruahui, dubu hegegemadai idoinai. ¹¹Hari ohe kahana kahana daiutudia iduaradia na patapata mia-gağaena kahana ai e hekeho, iduara ta na mirigini kahana e vaira henia, bona iduara ta na diho kahana e vaira henia. Una patapata mia-gağaena kahana lababana na kiubit ima, dubu hegegemadai ai.

¹²Lahara kahana ai dubu mağuna e vaira henia rumana ena lababa nil kiubit hitu-ahui. Ruma habana udunana na kiubit ima, ruma hegegemadai ai; bona ena lata na kiubit taurahanita-ahui.

¹³Bena ia ese dubu e hahetohoa, ena lata na kiubit sinahu-ta; bona mađu mai rumana ida edia lata na kiubit sinahu-ta; ¹⁴bona dubu mai mağuna ida, mairiveina kahana ai, labahadia na kiubit sinahu-ta.

¹⁵Bena ia ese mađu e vaira henia rumana, lahara kahana ai, mai ohe kahana kahana habadia ida, e hahetohodia, latadia na kiubit sinahu-ta.

Dubu laloma kahana hona laloma daiutuna bona murimuri kahana dehena habadia ¹⁶na mai iğovalaidia reireidia, bona toiosi hegegemadai ai na gaba-mauru; unu gaba-maurudia ioradia na au rotonadia amo e

kara. Rakavareaina hevaira-hehenina habana heḡeḡemadai ai na mai iḡovalaina reireidia, ruma reireina amo ela bona gaba-mauru, (hari gaba-mauru na mai ikoulaidia ḡaudia), ¹⁷ma ela bona iduara daena, ma ela bona laloma daiutuna, bona murimuri ai danu. Bona haba iboudiai heḡeḡemadai ai, laloma daiutuna ai bona dubu ai, na laulau e koro: ¹⁸kerubi laulaudia bona pamu audia laulaudia; kerubi padadia amo na pamu audia ta ta. Kerubi ta ta vairadia na rua rua: ¹⁹vaira ta, taunimanima vairana na heto, ese pamu auna ta e vaira henia ohena ta ai; bona vaira ta, leona natuna vairana na heto, ese pamu auna ta e vaira henia, ohena ma ta ai. Idia na dubu idoinai heḡeḡemadai ai e hegoro; ²⁰dubu reireina amo ela bona iduara daena, kerubi bona pamu audia laulaudia na haba ai e hegoro.

²¹Dubu iduarana ihua-ihuadia na kaha haniosi heḡereḡere audia. Gabu helaḡana vairanai na ḡau ta, ²²ita-itana na pata helaḡana, au amo e karaia ḡauna; harana latana na kiubit toi, bona latana bona lababana na kiubit rua. Daigunina bona badina bona habahabana na au amo e kara. Ia ese e hamaorogu, eto, Ina na Iehova vairanai e miamu patana.

²³Dubu bona gabu helaḡana ruaosi iduaradia na kaha rua rua amo. ²⁴Iduara ta ta mai kahadia rua rua, bona kaha ruaosi e helokuva bona e hulalava, iduara ta ta ai. ²⁵Dubu iduaradia kopidia ai kerubi bona pamu audia laulaudia na e hegoro, haba ai e hegoro na heto. Bona murimuri ai dehe na mai guhina, au-reireidia amo e karaia. ²⁶Ohe kahana kahana ai, dehe ohena habadia ai, na gaba-mauru, ioradia na au rotonadia amo e kara ḡaudia; bona pamu audia laulaudia danu.

42 ¹Bena ia ese e hakaugu lao, laloma maḡuna lalonai, mirigini kahana ai, ela bona dubu maḡuna bona mirigini kahana rumana e vaira henidia daiutudia. ²Hari mirigini kahana rumana ena lata na kiubit sinahu-ta bona ena lalaba na kiubit imahui. ³Laloma kahana maḡuna ena kiubit ruahui badibadidiai bona murimuri kahana maḡuna nadi-ariarana vairanai na dehe haida e hevaira heheniva, ere toiosi ai. ⁴Daiutu vairadiai, raka-hanai gabuna ta ese laloma kahana e lao heniava, ena lababa na kiubit gwauta bona ena lata na kiubit sinahu-ta; daiutu iduaradia na mirigini kahana ai. ⁵Atai daiutudia na taidia i'iora, badina be idia dehedia lababadia na taidia babada a henu bona bogaragi eredia dehedia lababadia na taidia mamaraḡi. ⁶Badina be idia na ere toi ai bona asi edia au-tubua, murimuri kahana maḡuna ena au-tubua heḡereḡeredia, una dainai atai daiutudia na taidia mamaraḡi a henu bona bogaragi eredia daiutudia na taidia babada. ⁷Murimuri ai na hehari maḡuna ta, ia bona hari daiutu padadia idoinai na heḡereḡere. Ia na murimuri kahana maḡuna e lao heniava, bona daiutu e vaira henidiava. Ena lata na kiubit imahui. ⁸Badina be murimuri kahana maḡuna daiutudia edia lata na kiubit imahui, a dubu e vaira heniava daiutudia edia lata na kiubit

sinahu-ta. ⁹Ini daiutu henudiai na raka-vareai gabuna ta, mairiveina kahana ai, murimuri kahana maḡuna amo daiutu lalodiai e raka vareaiva gabuna ai. ¹⁰Murimuri kahana maḡuna na unu amo e hematama.

Diho kahana ai danu, maḡu bona ruma hegaga-henina ai na daiutu haida, ¹¹bona raka-hanai gabuna ta na idia vairadiai. Idia na mirigini kahana daiutudia heḡereḡeredia, edia lata bona edia lababa na unu idia ida heheḡereḡere; edia raka lasi gabudia bona ihaginidia daladia bona iduara danu na unu idia ida heheḡereḡere. ¹²Hari diho kahana daiutudia henudiai na raka-vareai gabuna ta, mairiveina kahana ai, unuseni ai raka-hanai gabuna ai e raka vareaimu. Idia vairadiai be hehari maḡuna ta.

¹³Bena ia ese e hamaorogu, eto, Mirigini bona diho kahadia daiutudia, maḡu hevaira-hehenina ai, na daiutu helagadia; hahelaḡa taudia ese Iehova bae raka henia kahi negadia ai, herahia anianidia helaḡa-hereadia na unuseni ai bae ani; unuseni ai herahia anianidia helaḡa-hereadia bae atodia - naoa boubouna, bona kara dika bona kerere iabi-ohodia bouboudia ḡaudia; badina be una gabu na helaḡa. ¹⁴Hahelaḡa taudia na gabu helaḡana ai bae raka vareai negadia ai, idia na unu amo basie raka lasi murimuri kahana maḡuna ai ela bona kara helaḡadia ikaradia totona e hahedokilai dabuadia na unuseni ai bae dokidia oho bona bae atodia guna, badina be unu dabua na hehelaga. Idia ese dabua idaudia bae dokilaidia guna, bena hanua taudia edia gabu bae raka henia kahi.

¹⁵Ia ese dubu maḡuna laloma kahana e hahetohoa vaitani, bena mairiveina kahana e vaira henia ikoukouna amo e hakaugu lasi, bena dubu maḡuna murimurina kahana e hahetohoa heḡeḡe. ¹⁶Mairiveina kahana na hahetoho sirihona amo e hahetohoa; ia na kiubit sinahu-ima, hahetoho sirihona ai. ¹⁷Bena kahana ma ela, mirigini kahana e hahetohoa, kiubit sinahu-ima hahetoho sirihona ai. ¹⁸Ma kahana ela, diho kahana e hahetohoa, kiubit sinahu-ima hahetoho sirihona ai. ¹⁹Ma kahana ela, lahara kahana e hahetohoa, kiubit sinahu-ima hahetoho sirihona ai. ²⁰Ia ese kaha haniosi e hahetohodia. Magu ta ese e ḡegea ahu, ena lata na kiubit sinahu-ima bona ena lababa na kiubit sinahu-ima; una maḡu ese tano helaḡana bona tano uhuḡaina e kaharuadiava.

Iehova hairaina ese dubu e hahonua

43 ¹Una murinai ia ese e hakaugu lao, mairiveina kahana e vaira henia ikoukouna ai. ²Bena Israel Diravana hairaina na itaia, mairiveina kahana amo ema. Ena mai reḡena na sinavai momo reḡedia na heheto; bena ia hairaina ese tanobada na e hakiama-kiamai. ³Egu mata-hanai na hanua ihabua-tarina totona ema negana ai na mata hanailaia ḡauna bona Kebara sinavaina badibadinai na mata hanailaia ḡauna heḡereḡeredia. Bena tano ai na goru diho. ⁴Bena Iehova hairaina

na mairiveina kahana e vaira heniava ikoukouna amo dubu ai e vareai negana ai, ⁵Lauma ese e abigu isi, laloma kahana maḡuna lalonai e laohaigu; bena na itaia, Iehova hairaina ese dubu vada e hahonua.

⁶Una tau na badibadigu ai ginina ai, lau ese gado ta na kamoni, dubu lalona amo e hereva henigu; ⁷e hamaorogu, eto, Taunimanima natuna e, Egu terono bona ae-palapalagu imoina gabuna binai; iniseni ai baina noho hanaihanai, Israel taudia bogaragidiai. Israel besena taudia ese lau ladagu helaḡana basie hamiroa lou, idia bona edia pavapava edia ariara karadia amo, eiava edia pavapava tau-anidia masedia amo, ⁸eiava edia raka-vareaina na lauegu raka-vareaina bona edia iduara ihua-ihuadia na lauegu iduara ihua-ihuadia badibadidiai bae alodia, bena lau bona idia padamai ai na hehari maḡuna mo baine mia dainai. Edia kara dika-rohorohodia vada e kara dainai lau ladagu helaḡana vada e hamiroa, taunabunai lau ese egu badu garaḡarana ai vada na ha-oredia. ⁹Harihari edia kaivakuku itomadihohenidia bona edia pavapava tau-anidia masedia na bae negedia daure, bena lau na idia bogaragidiai baina noho hanaihanai.

Dubu bona Ihaboulaina Patana Taravatudia

¹⁰Taunimanima nahma e, dubu ita-itana bona ilalo-hatana na Israel besena taudia ba hamaorolaidia, edia kara havara hemaraidia bae hemarai helaoreana. ¹¹Bena edia kara iboudia hemaraidia bema hemarai, bena dubu bona ihaero-hatana, raka-lasina bona raka-vareaina, bona oromana idoinai, ba haheitalaidia, bona ena hahedua herevadia bona ena taravatu iboudia ba hadibalaidia; idia vairadiai ba torea, bena idia ese ena taravatu bona ena hahedua herevadia iboudia na bae badinadia bona karadia bae kara. ¹²Dubu taravatuna binai ororo dorina tanona hegeḡemadai idoinai baine helaḡa herea. A itaia, dubu taravatuna bunai.

¹³Ihaboulaina patana ihahetohona, kiubit amo e hahetohoa, binai. (Ini kiubit na kiubit ta bona ima-palapala lababana ta). Ia badina hara-latana na kiubit ta, bona lababana na kiubit ta; ia na mai isena, ohena idoinai e ḡeḡea ahu ḡauna, isena lababana na ima-kwakikwaki daḡana ta heḡereḡerena. Ihaboulaina patana harana latana na ini baine heto: ¹⁴badina, tano ai, amo ela bona henu digina, kiubit rua, bona lababana na kiubit tamona; bona digi maraḡina amo ela bona digi badana, kiubit hani, bona lababana na kiubit tamona. ¹⁵Ihaboulaina patana rahurahuna na kiubit hani; bona ihaboulaina patana rahurahuna amo doa hani e hagini, edia lata na kiubit tamona. ¹⁶Hari rahurahu ena lata bona ena lababa bae heḡereḡere, lalana kiubit gwauta-rua bona lababana danu kiubit gwauta-rua. ¹⁷Digina danu ena lata bona ena lababa bae heḡereḡere, latana kiubit gwauta-hani bona lababana kiubit gwauta-

hani; isena danu baine gēgea ahu, ia lababana na kiubit duduna. Bona ia badina hēgēgemadai ai na kiubit tamona. Ihaboulaina patana vadavadana na mairiveina kahana baine vaira henia.

¹⁸Bena ia ese e hamaorogu, eto, Taunimanim natuna e, Ġaubada Iehova na ini e gwau tomamu: Hahedua herevadia, ihaboulaina patana ena, bini. Ġole-oho bouboudia na latanai bae hahelaġadia bona rara bae nevarilaia totona bae haginia dinana ai, ¹⁹Levi hahelaġa taudia, Sadok ena iduhu taudia, kara helaġadia ikaradia totona e raka henigu kahimu taudia, na boromakau maruanena ta ba henidia, kara dika iabi-ohona boubou ġauna ai bainela. Ġaubada Iehova na e herevamu. ²⁰Bena rarana kuri ta bavabia, ihaboulaina patana ena doa haniosi ba dahulaidia, bona digi daigunina haniosi danu, bona isena hēgēgemadai ai; unu amo ihaboulaina patana ba haġoevaia bona kara dika na iena amo bavabia oho. ²¹Bena una boromakau maruanena, kara dika iabi-ohona ġauna, na bavabia, vada e gwauria hidi gabuna ai ba haġolea oho, dubu tanona ai, to helaġa gabuna murimurina. ²²Bena dina iharuana ai, nani maruanena asi bebeke-bebekana ta ba hahelaġaia, kara dika iabi-ohona ġauna ai bainela. Unu amo ihaboulaina patana ma ba haġoevaia, boromakau maruanena amo o haġoevaia heġereġerena. ²³Ba haġoevaia ġuġuru, bona boromakau maruanena asi bebeke-bebekana ta bona seri mamoe maruanena asi bebeke-bebekana ta ba hahelaġadia. ²⁴Iehova vairanai ba heni, bona hahelaġa taudia ese damena na latadiai bae ġiġi, bona bae haġoledia oho, Iehova ena. ²⁵Dina hitu lalodiai, dina ta ta ai nani maruanena ta ba heni, kara dika iabi-ohona ġauna ai bainela; bona boromakau maruanena ta bona seri mamoe maruanena ta asi bebekabebekadia, danu ba heni. ²⁶Dina hitu lalodiai boubou karadia bae kara, dika na ihaboulaina patana amo iabi-ohona bona ihaġoevana totona; unu amo ba hahelaġaia. ²⁷Unu dina bae haġuġurudia, bona dina ihatauranina amo hahelaġa taudia ese emui ġole-oho bouboudia bona emui maino bouboudia ġaudia na bae hahelaġadia, ihaboulaina patana latanai; bona lau ese baina abimui dae. Ġaubada Iehova na e herevamu.

Kara helaġadia

44 ¹Bena ia ese e hakaugu lou lao, gabu helaġana murimurina kahana ikoukouna ala, mairiveina kahana e vaira heniamu ġauna. Ġauna na vada e hekou. ²Bena ia ese e hamaorogu, eto, Ina ikoukou na hekouna ai do baine mia; ta ese basine kehoa, bona ta na iena amo basine raka vareai; badina be Iehova, Israel Diravana, na iena amo vada e raka vareai, una dainai ia na hekouna ai do baine mia. ³Hanua pavapavana sibona na ia lalonai baine helai, Iehova vairanai baine aniani totona. Ia na ikoukou dehena amo baine raka vareai, bona unu amo ma baine raka lasi.

⁴Bena ia ese mirigini kahana ikoukouna amo e hakaugu lao, ela bona dubu vairanai a kau. Bena na roha lao, na itaia, Iehova hairaina ese Iehova ena dubu vada e hahonua; bena tano ai na goru diho. ⁵Bena Iehova ese e hereva henigu, eto, Taunimanima natuna e, a laloa namonamo; baina hamaorolaimu ġaudia iboudiai ba itadia bona herevadia ba kamoni, Iehova ena dubu herevadia, hahedua herevadia bona taravatuna iboudiai danu. Ba laloa namonamo danu, daika daika na dubu ai bae raka vareai diba, bona daika daika na gabu helaġana lalonai basie raka vareai diba. ⁶Bona gwau-edeede besena, Israel besena, na ba hamaordia, baoto, Ġaubada Iehova na ini e gwau tomamu: Israel besena e, emui kara dika-rohorohodia iboudiai ba hadoko. ⁷Idau bese taudia, lalodia asie hahelaġadia bona tauanidia asie peritomea taudia, na egu gabu helaġana lalonai o harakadia vareai, bona gabu o hamiroa, agu aniani, digara bona rara, na egu ai o hahelagadiamu negadia ai. Emui kara dika-rohorohodia iboudiai latadijai danu egu taravatu itata-utuna vada o atva kau. ⁸Egu ġau helaġadia danu asio baladia heni, a idau bese taudia vada o duanidia, egu ġau bae baladia heni, egu gabu helaġana lalonai.

⁹Taunabunai, Ġaubada Iehova na ini e gwau tomamu: Idau bese tauna ta, lalona se hahelaġaia bona tau-anina asie peritomea tauna, idau bese taudia iboudiai Israel besena taudia padadijai e nohomu taudia ta, na egu gabu helaġana lalonai basine raka vareai. ¹⁰A Levi taudia ese edia dika davadia bae hua, egu amo idauhai e raka kerere dainai; idia ese lau e rakatanigu bona edia kaivakuku muridiai ela, Israel besena e raka kerere negana ai. ¹¹Idia ese egu gabu helaġana ġaukaradia bae kara, bona dubu ikoukoudia bae itadia tao, bona dubu ai kara helaġadia bae kara. Idia ese ġole-oho boubou ġauna bona taunimanima edia boubou ġaudia na bae aladia mase; taunimanima bae naridia bona isiaidia bae lao heni. ¹²Badina be idia ese kara helaġadia e kara, edia kaivakuku vairadijai, bona kara dika-rohorohodia amo Israel besena ihahekwakwanaina ġauna ai ela; taunabunai Ġaubada Iehova na e gwaumu: Lau na idia latadijai vada na gwau hamata, edia dika davadia do bae hua. ¹³Idia ese basie raka henigu kahi, hahelaġa karadia ai isiaigu basie lao heni; egu ġau helaġadia bona egu ġau helaġa-hereadia basie raka heniida kahi, a hemaradia bae hemarai, kara dika-rohorohodia vada e kara daidiai. ¹⁴Ġau tan-ona lau ese baina duanidia, dubu bae naria; bona toma-diho karadia iboudiai bona ġaukara iboudiai ia lalonai e karamu na idia ese bae kara.

¹⁵A Levi taudia haida, Sadok vevena, hahelaġa dagina e abia bena egu gabu helaġana e nariava, Israel besena taudia ese e rakatanigu negana ai, ese bae raka henigu lialu, bona isiaigu bae lao heni; idia na lau vairagu baema, digara bona rara bae hahelaġadia egu. Ġaubada Iehova na e herevamu.

¹⁶Idia danu egu gabu helaḡana lalonai bae raka vareai, bona egu pata bae raka henia kahi, isiaigu bae lao heni bona egu hahedua bae badinadia totona. ¹⁷Laloma maḡuna ikoukoudia lalodiai bae raka vareai negana ai, idia ese dabua auka hahedokidia bae dokilai; Inamoe huidia dabuadia basie hahedohlai, laloma maḡuna ikoukoudia ai bona maḡu lalonai kara helaḡadia bae kara negadia ai. ¹⁸Kwaradia na dabua aukadia amo bae havavalaidia, bona koekoedia ai dabua auka piriboudia bae kara; varahu ihavarana ḡauna ta basie dokilaia. ¹⁹Bena murimuri maḡuna ai taununanima dekediai bae raka lasi negana ai, idia ese unu dabua, kara helaḡadia e karalai ḡaudia, na bae doki oho, daiutu helaḡadia ai bae atodia, bena dabua idaudia bae dokilai, edia dabua amo unu taunimanima na helaḡa siahuna bae henidia hanai na garina. ²⁰Kwaradia basie naudia, bona huidia basie halata; kwaradia huidia bae utu kwadogi mo. ²¹Hahelaḡa tauna ta ese vine ranuna basine inua, laloma maḡuna ai e raka vareaimu negana ai. ²²Idia ese vabu ta eiava e diho hahinena ta na basie adavaia, a rami-hebou ulatona ta, Israel besena amo, eiava hahelaḡa tauna ta vabuna. ²³Idia ese egu orea taudia na bae hadibadia, ḡau helaḡadia bona ḡau uhugaidia ede e idau tomamu; bona ḡau dia gogoeva bona ḡau goevaḡoevadia edia idau ede bae diba toma. ²⁴Heai lalodiai idia na hahemaoro taudia ai baela; bona lauegu hahemaoro daladia amo bae hahemaoro. Egu taravatu bona egu hahedua herevadia bae badinadia, vada na gwauraidia ariadia iboudiai lalodiai; bona egu dina helaḡadia bae hahelaḡadia. ²⁵Mase tauna iraka-kahi-henina ai sibodia basie hahemiro; ḡau tamona tamadia eiava sinadia eiava natudia mamaruanedia eiava hahinedia, eiava tadikakadia eiava taihudia ulatodia daidiai sibodia bae hahemiro diba. ²⁶Ta baine hahemiro murinai, ia sibona ese dina hitu baine hahemiro, bona ia na baine ḡoeva. ²⁷A gabu helaḡana, laloma maḡuna ai, lalonai baine raka vareai, gabu helaḡana ai kara helaḡadia baine kara totona, una dina ai ia ese ena kara dika iabi-ohona boubouna ḡauna na baine hahelaḡaia. Ḡaubada Iehova na e herevamu.

²⁸Ahudia ta basie abia, badina be ahudia na lau; bona kohu ta Israel ai basio henidia, badina be edia kohu na lau. ²⁹Flaoa boubouna bona kara dika bona kerere iabi-ohodia bouboudia ḡaudia na bae ani; bona ḡau helaḡadia iboudiai Israel ai na idia edia. ³⁰Uma ḡaudia roboadia idau-idau iboudiai bona emui herahia ḡaudia idau-idau iboudiai, na hahelaḡa taudia ese bae abidia edia; bona emui igabu roboadia danu hahelaḡa taudia ba henidia, hahenamo na emui ruma latadiai baine mia helaoreana. ³¹E mase kava ḡauna ta eiava ḡau ta ese e haberoa ḡauna ta, roho manuna eiava timo kopina ai e nohomu ḡauna, na hahelaḡa taudia ese basie ania.

Tano iharina bona hahetoho

45 ¹Tano ba haria negana ai, tano kahana ba gwaurai hidi Iehova ena, kaha helaḡana ai bainela. Ena lata na kiubit gerebu rua

daha ima bona ena lababa na kiubit gerebu rua; ia na baine helaḡa ela bona hetoana idoinai. ²Ia lalonai gabu ta baine mia, dubu helaḡana gabuna, ena lata bona ena lababa bae heḡereḡere, kiubit sinahu-ima; bona heḡeḡemadai ai tano taina baine mia ḡagae, ia lababana na kiubit imahui. ³Hari kaha helaḡana lalonai, tano ta ba hahetohoa, ena lata na kiubit gerebu-rua daha-ima bona ena lababa na kiubit gerebu-ta; ia lalonai dubu helaḡana, helaḡa herea gabuna, na baine gini. ⁴Una tano na tano helaḡana ai bainela; ia na hahelaḡa taudia, dubu helaḡana ai kara helaḡadia e karamu bona Iehova isiaina ilaohenina totona e raka henia kahimu taudia edia; edia ruma gabudia tanona, bona dubu helaḡana tanona helaḡana ai bainela. ⁵Ma kaha ta, ena lata na kiubit gerebu-rua daha-ima bona ena lababa na kiubit gerebu-ta na Levi taudia, dubu lalonai kara helaḡadia e karamu taudia, edia; bae ḡaunaia, bae noholaidia hanuadia unuseni ai bae hadai.

⁶Vada o gwauraia hidi, kaha helaḡana ai o halaoa, tanona badibadinai, hanua tanona ba duanaia, ena lababa na kiubit daha-ima bona ena lata na kiubit gerebu-rua daha-ima; ia na Israel besena idoinai ese baine ḡaunaia.

⁷Bena kaha helaḡana ohena ohena tanodia bona hanua ena kaha ohena ohena tanodia, lahara kahana ai bona laurabada kahana ai, na hanua pavapavana ese baine ḡaunaia, ena lata na iduhu ta ahuna ena lata heḡereḡerena, lahara kahana hetoana ela bona laurabada kahana hetoana. ⁸Una na ia ahuna korikorina Israel ai. Bena pavapava ai baina halaodia taudia ese egu ore a taudia na basie hahisihisidia lou; a tano na Israel besena taudia bae henidia, edia iduhu ta ta ai.

⁹Gaubada Iehova na ini e gwau tomamu: Israel pavapavadia e, vadaeni! Daḡedaḡe bona hahehisi karadia ba negedia; hahemaoro ḡoevaḡoeva bona kara maoromaoro ba kara; egu ore a taudia ilulu-lasidia ba hadokoa. Gaubada Iehova na e herevamu.

¹⁰Hahetoho ḡaudia momokanidia bavabi, bona efa momokanina bona bata momokanina danu. ¹¹Efa bona bata anidia bae heḡereḡere; bata gwauta na homere ta heḡereḡerena, bona efa gwauta na homere ta heḡereḡerena. Hahetoho ḡaudia iboudiai ibadidia na homere. ¹²Sekele na gera ruahui heḡereḡeredia; sekele ima be sekele anidia korikoridia inta ba heni, bona sekele gwauta be sekele anidia korikoridia gwauta ba heni. Emui mina lalonai sekele bae imahui.

Boubou bona Aria

¹³Boubou ḡaudia na ini ba heni toma: uit homere ta lalona amo efa ta ba karoaia, karoa tauratoi, bena karoa ta ba heni; bona bali homere ta lalona amo efa ta ba karoaia, karoa tauratoi, bena karoa ta ba heni; ¹⁴bona dehoru ahuna na koro ta ta lalodia amo bata ta ba karoaia,

karoa gwauta, bena karoa ta ba heni. (Hari koro lalonai na bata gwauta, homere hegeregerena). ¹⁵Bona mamoe sinahu-rua sinahu-rua amo mamoe ta ta ba heni; Israel iduhudia iboudiai ese unu bae heni toma. Boubou gaudia bunu, flaoa bouboudia bona gōle-oho bouboudia bona maino bouboudia, edia dika iabi-ohodia gaudia. Gāubada Iehova na e herevamu.^r ¹⁶Tano taudia iboudiai ese ini boubou gaudia na Israel pavapavana bae henia. ¹⁷Hanua pavapavana ena gāukara korikori be gōle-oho bouboudia bona flaoa bouboudia bona inuinu bouboudia gaudia baine heni, aria negadia ai bona hua matamatadia negadia ai bona dina helaḡadia ai, Israel besena ena aria korikoridia iboudiai negadia ai. Ia ese kara dika bouboudia bona flaoa bouboudia bona gōle-oho bouboudia bona maino bouboudia gaudia baine heni, Israel besena ena kara dika iabi-ohodia gaudia.

¹⁸Gāubada Iehova na ini e gwau tomamu: Hua gini-gunana dinana gini-gunana ai, boromakau natuna maruanena asi bebeka-bebekana ta bavabia, bena gabu helaḡana ba haḡoevaia. ¹⁹Hahelaḡa tauna ese kara dika iabi-ohona boubou gauna rarana kuri ta baine abia, dubu iduaradia ihua-ihudua bona ihaboulaina patana isena daigunina haniosi bona laloma maḡuna ikoukouna audia baine dahulaidia. ²⁰Hua dinana ihahituna ai danu unu ba kara toma, kara-rea eiava mata-lahui dainai vada e kara dika tauna bagunai; unu amo dubu ba haḡoevaia.

²¹Hua gini-gunana dinana ihag vauta-hanina ai, lagau-hanai ariana ba karaia; dina hitu lalodai asi hatubua flaoana bae ania. ²²Una dina ai, hanua pavapavana ese boromakau natuna maruanena ta baine heni, dika iabi-ohona boubouna gauna, ia bona tano taudia iboudiai daidiai. ²³Bona aria dinadia hituosi lalodai ia ese boromakau natudia mamaruanedia hitu bona mamoe mamaruanedia asi bebeka-bebekadia hitu baine heni, Iehova ena, unu dina ta ta ai, gōle-oho boubou gaudia; bona nani maruanena ta, unu dina ta ta ai, dika iabi-ohona boubouna gaudia. ²⁴Ia ese danu flaoa boubouna baine heni, efa ta ta boromakau mamaruanedia ta ta edia, bona efa ta ta mamoe mamaruanedia ta ta edia, bona dehoru hini^s ta ta efa ta ta ida. ²⁵Hua ihahituna dinana ihagwauta-imana ai, bona aria dinadia hituosi lalodai, ia ese unu hegeregeredia ma baine heni, dika iabi-ohona bouboudia bona gōle-oho bouboudia bona naoa bouboudia gaudia, bona dehoru danu.

46 ¹Gāubada Iehova na ini e gwau tomamu: Laloma maḡuna ikoukouna, mairiveina kahana e vaira heniamu gauna, na baine hekou, gāukara dinadia tauratoiosi lalodai; a dina helaḡa ai

^r 45.15 Efa; bata; homere; sekele; gera; mina; koro. Ini na Heberu taudia edia hahetoho gaudia haida ladadia. ^s 45.24 “Efa” bona “hini” na Heberu taudia edia hahetoho gaudia ladadia.

bona hua matamatana dinana ai vada bae kehoa. ²Hanua pavapavana na murimuri kahana amo baine raka vareai, ikoukou dehena ai; bena ikoukou auna badibadinai baine gini. Bena hahelağa taudia ese ena ġole-oho boubouna bona ena maino bouboudia ġaudia na bae hahelaġadia; bena ia na ikoukou raka-vareaina ai baine toma diho. Bena ia na baine raka lasi, a ikoukou na basie koua ela bona dina baine diho. ³Tano taudia na Iehova vairanai bae toma diho, una ikoukou raka-vareaina ai dina helaġadia ai bona hua matamata dinadia ai. ⁴Ġole-oho boubouna, hanua pavapavana ese dina helaġa ai Iehova baine henia ġauna, na mamoe natudia asi bebeke-bebekadia tauratoi, bona mamoe maruanena asi bebekebebekana ta. ⁵Flaoa boubouna mamoe maruanena ida baine heni ġauna na efa ta, bona flaoa boubouna ġaudia mamoe natudia ida na ena goada heġereġerena ai baine heni; flaoa efadia ta ta ida dehoru hini ta ta baine heni danu. ⁶Hua matamata dinana ai, ia ese boromakau natuna maruanena asi bebeke-bebekana ta, bona mamoe natudia tauratoi bona mamoe maruanena ta, asi bebeke-bebekadia, na baine heni. ⁷Ena ilaoa bouboudia na boromakau maruanena ida efa ta bona mamoe maruanena ida efa ta, bona mamoe natudia ida ena goada heġereġerena ai baine heni; flaoa efadia ta ta ida dehoru hini ta ta baine heni. ⁸Hanua pavapavana baine raka vareai negana ai, ia na ikoukou dehena amo baine raka vareai, bona unu amo ma baine raka lasi.

⁹E gwaurai ariadia daidiai tano taudia na Iehova vairanai baema negadia ai, mirigini kahana ikoukouna amo toma-diho totona baine raka vareai tauna na diho kahana ikoukouna amo baine raka lasi; bona diho kahana ikoukouna amo baine raka vareai tauna na mirigini kahana ikoukouna amo baine raka lasi; asi tauna ta ese e raka vareai ikoukouna amo ma baine raka lasi; a ta ta na bae raka vairai, bena bae raka lasi. ¹⁰Bae raka vareai negana ai, hanua pavapavana na idia ida baine raka vareai; bona bae raka lasi negana ai, ia danu baine raka lasi.

¹¹Aria negadia ai bona e gwaurai negadia ai, flaoa boubouna boromakau natuna maruanena ida bae heni ġauna na efa ta; bona mamoe maruanena ta ida danu efa ta; a mamoe natudia ida ihenina tauna ena goada heġereġerena ai baine heni. Eta ta ta ida dehoru hini ta ta bae heni. ¹²tlanua pavapavana ese ena ura-kwalimu ai boubou ġauna bema heni, ġole-oho boubouna eiava maino bouboudia, ena ura-kwalimu ġauna Iehova ena; bena baine heni negana ai mairiveina kahana e vaira heniamu ikoukouna na bae kehoa iena. Bena ia ese ena ġole-oho boubouna eiava ena maino bouboudia ġaudia baine heni, dina helaġa ai heġereġerena. Bena ia na baine raka lasi; bena baine raka lasi murinai ikoukou na bae koua.

¹³Dina ta ta amo ia ese mamoe natuna ta, laġani tamona ġauna asi bebeke-bebekana, baine heni, ġole-oho boubouna ai bainela, Iehova ena;

daba daba iboudiai ia ese baine heni. ¹⁴Daba ta ta amo danu ia ese flaoa boubouna baine heni; efa ta baine karoaia, karoa tauratoi, bena karoa ta baine heni, bona dehoro hini ta baine karoaia, karoa toi, bena karoa ta baine heni, flaoa ikuilaina; una na flaoa boubouna ai bainela, Iehova ena. ¹⁵Gole-oho bouhouna, bae heni loulou ġauna, haheġanina bunai. ¹⁵Taunabunai, mamoe natuna bona flaoa boubouna bona dehoro na daba daba iboudiai bae heni, ġole-oho boubouna, bae heni loulou ġauna, ai bainela.

¹⁶Ġaubada Iehova na ini e gwau tomamu: Bema hanua pavapavana ese harihari ġauna na ia ahuna amo natuna haida baine henidia, unu natuna ese bae abia, bae ġaunaia, ahudia korikoridia ai baela. ¹⁷A bema ia ese harihari ġauna na ia ahuna amo ena hesiai taudia ta baine henia, una tau ese baine abia, ela bona heruha-nege laġanina; una negana ai hanua pavapavana ese baine abia lou. Ia natuna mo sibodia ese harihari ġauna ta ia ahuna amo na bae dogoa tao diba. ¹⁸Hanua pavapavana ese ena ore a taudia ahudia taina basine abia diba, ahudia amo basine luludia lasi; ia ese natuna ahudia baine henidia, ia sibona ahuna amo, taunabunai egu ore a taudia ta ena ġau basine heabi oho.

¹⁹Bena ia ese ikoukou badina iduarana amo e hakaugu hanai, ela bona hahelaġa taudia edia daiutu helaġadia mirigini kahana erena; bena una ere dokodokona ai, lahara kahana ai, gabu ta na itaia. ²⁰Bena ia ese e hamaorogu, eto, Gabuna binai hahelaġa taudia ese kerere bona kara dika iabi-ohodia bouboudia ġaudia na bae nadudia, bona flaoa bouboudia ġaudia na bae gabudia; murimuri kahana maġuna ai basie lasilaidia, taunimanima na helaġa siahuna bae henidia hanai na garina.

²¹Bena ia ese e hakaugu lasi, murimuri kahana maġuna ala, bena e hakaugu lao, maġu daigunina haniosi a lao heni; maġu daigunina ta ta na mai maġumaġudia. ²²Maġu daigunina haniosi na mai maġumaġudia, edia lata na kiubit hari-ahui bona edia lababa na kiubit toi-ahui; haniosi edia bada na heġereġere. ²³Laloma kahadia ai, hari maġumaġu haniosi hegegemadai ai, na nadi palakadia ere ta, bona unu ere henudiai na rahurahu. ²⁴Bena ia ese e hamaorogu, eto, Nanadu gabudia bini, kara helaġadia dubu ai e karamu taudia ese taunimanima edia boubou ġaudia na iniseni ai bae nadu.

Dubu ranudia

47 ¹Bena ia ese e hakaugu lou, dubu iduarana ai; bena na itaia, ranu na dubu raka-vareaina henuna amo e lasiva, mairiveina kahana ai, (badina be dubu na mairiveina kahana e vaira henia); bona dubu raka-vareaina diho kahana henuna amo danu ranu e lasiva, ihaboulaina patana diho kahana ai. ²Bena ia ese mirigini kahana ikoukouna amo e hakaugu lasi, murimuri kahana ai e hakaugu heġeġe ela bona murimuri

kahana ikoukouna, mairiveina kahana e vaira heniamu ġauna; ranu na diho kahana amo e lasiva.

³Mairiveina kahana ma ala; ia na mai ena hahetoho varona imana ai, bena kiubit daha-ta e hahetohodia, bena ranu amo e hakaugu hanai; aemai ganaganadia ai e raro. ⁴Ma kiubit daha-ta e hahetohodia, bena ranu amo ma e hakaugu hanai; tuimai ai e raro. Ma kiubit daha-ta e hahetohodia, bena ranu amo ma e hakaugu hanai; koekoemai ai e raro. ⁵Ma kiubit daha-ta e hahetohodia, bena ranu na vada sinavai ta; asi turu-hanai dibagu, badina be ranu vada e dae; vada e dobu, nahu heġereġerena, ta basinema turu hanai diba. ⁶Bena ia ese e nanadaigu, eto, Taunimanima natuna e, ina na vada o itaia a?

Bena e hakaugu riri lou, sinavai isena amo. ⁷Lougu ai, au momo herea na itadia sinavai isena kahana kahana ai. ⁸Bena ia ese e hamaorogu, eto, Ina ranu na mairiveina kahana e aru e laomu, Araba kourana ai e dihomu; bena gohu ai e aru lasimu negana ai, gohu na e negarimu. ⁹Bena sinavai na e aru e laomu gabudia iboudiai, mauri ġaudia na bae vara heġiġi oda-oda, bona gwarume danu seridia seridia. Badina be ina ranu na e aru e laomu, gohu baine hanegaria; taunabunai sinavai na e aru e laomu gabudia ai, ġau iboudiai na bae mauri daehai daehai. ¹⁰Haoda taudia na gohu badinai bae gini; En-gedi amo ela bona En-eglaimi edia reke bae tore; gwarumena bae idau-idau, Davara Badana gwarumedia heġereġeredia. ¹¹A gohugohuna bona laguta-lagutana na basie negari; bae mia, damena gabudia. ¹²Sinavai isena kahana kahana ai huahua audia idau-idau iboudiai bae vara. Idia raudia basie marai, bona huahuadia basie hehuhu, a hua ta ta amo huahuadia bae dobi, badina be ihapariparidia ranudia na gabu helaġana amo e aru e laomu. Huahuadia na aniani ġaudia bona raudia na hahemauri ġaudia ai baela.

Tano Hetoadia

¹³Ġaubada Iehova na ini e gwau tomamu: Tano hetoadia bini: tano na ba haria, Israel iduhudia gwauta-ruaosi ese ahudia bae abi, a Iosef na ahu rua baine abi. ¹⁴Ba haria, ahu iboudiai bae heġereġere; na gwau hamata senemui baina henidia nato; ina tano na ahumui korikori ai bainela.

¹⁵Tano hetoana binai: mirigini kahana ai, Davara Badana amo baine hematama, bena Hetelono amo bainela ela bona Hamat raka-vareaina, bena Sedad ¹⁶bona Berota bona Sibiraimi amo (una Sibiraimi na Damasko bona Hamat hetoadia ai) ela bona Hasere-hatikono, Haurana hetoana ai. ¹⁷Unu amo hetoa na davara amo bainela ela bona Hasara-enono, Damasko mirigini kahana hetoana ai. Hamat hetoana danu na ia miriginina kahana ai. Mirigini kahana hetoana bunai.

¹⁸Laurabada kahana ai, hetoa na Hasara-enono amo baine hematama, Haurana bona Damasko padadia amo bainela; bena Ioridane sinavaina

amo bainela, Gilead bona Israel tanodia padadia amo, ela bona laurabada kahana davarana, ela bona Tamara. Laurabada kahana hetoana bunai.

¹⁹Diho kahana ai, hetoa na Tamara amo baine hematama, bainela ela bona Meribata-kade ranu gabudia, bena Aigupto Dokana amo bainela, ela bona Davara Badana. Diho kahana hetoana bunai.

²⁰Lahara kahana ai, hetoa na Davara Badana, ela bona Hamat rakavareaina hevaira-hehenina. Lahara kahana hetoana bunai.

²¹Ina tano na unu ba haria toma, Israel iduhudia hegeregeredia.
²²Ahumui ba duanaidia, umul emui bona idau taudia, bogaragimui ai e nohomu bona natudia na bogaragimui ai vada e havaradia taudia. Idia na Israel memerodia korikoridia hegeregeredia ai baela umui emui ai; umui ida ahumui ba duanaidia Israel iduhudia bogaragidiai. ²³Edena iduhu ai idau tauna na e nohomu, unusenai ai ia ahuna ba henia. Ġaubada Iehova na e herevamu.

48 ¹Iduhu ladadia bini. Mirigini kahana hetoana na davara amo baine hematama, Hetelono amo bainela ela bona Hamat rakavareaina, ela bona Hasara-enono (una na Damasko mirigini kahana hetoana, Hamat hevaira-hehenina ai), laurabada kahana amo ela bona lahara kahana: una na Dan ahuna, ahu ta. ²Dan ena tano ohena ai, laurabada kahana ela bona lahara kahana, Asere ahuna, ahu ta. ³Asere ena tano ohena ai, laurabada kahana ela bona lahara kahana, Napatali ahuna, ahu ta. ⁴Napatali ena tano ohena ai, laurabada kahana ela bona lahara kahana, Manase ahuna, ahu ta. ⁵Manase ena tano ohena ai, laurabada kahana ela bona lahara kahana, Efraim ahuna, ahu ta. ⁶Efraim ena tano ohena ai, laurabada kahana ela bona lahara kahana, Ruben ahuna, ahu ta. ⁷Ruben ena tano ohena ai, laurabada kahana ela bona lahara kahana, Iuda ahuna, ahu ta.

⁸Iuda ena tano ohena ai, laurabada kahana ela bona lahara kahana, tano ta ba gwauraia hidi. Ena lababa na kiubit gerebu-rua daha-ima, ena lata na unu iduhu ahudia ta hegeregerena, laurabada kahana ela bona lahara kahana; ia bogaraginai na gabu helaġana. ⁹Iehova ena ba gwauraia hidi tanona ena lata na kiubit gerebu-rua daha-ima, bona ena lababa na kiubit gerebu-rua. ¹⁰Tano helaġana inogodia bini: hahelaġa taudia edia inogo ena lata na kiubit gerebu-rua daha-ima murigini kahana ai, ena lababa na kiubit gerebu-ta lahara kahana ai bona kiubit gerebu-ta laurabada kahana ai, bona ena lata na kiubit gerebu-rua daha-ima diho kahana ai. Iehova en: gabu helaġana na ia bogaraginai. ¹¹Una na vada e hahelaġadia taudia, Sadok vevena, edia; idia ese egu hahedua e badinadiava, bona Israel taudia e raka siri negana ai idia na asie raka siri, hari Levi taudia e raka siri na heto. ¹²Idia ahudia korikorina ai bainela, tano helaġana lalonai, gabu helaġa-hereana ai bainela, Levi taudia edia tano ohena ai. ¹³Hahelaġa taudia edia tano ohena ai, Levi

taudia ese edia inogo bae abia; ena lata na kiubit gerebu-rua daha-ima bona ena lababa na kiubit gerebu-ta. Latana idoinai na kiubit gerebu-rua daha-ima, bona lababana idoinai na kiubit gerebu-rua. ¹⁴Taina basie hoia, eiava basie hebodohilaia. Ina ahu namohereana tanona na haida basie henidia, badina be ia na helaḡa, Iehova ena.

¹⁵Orena miana, ena lababa na kiubit daha-ima bona ena lata na kiubit gerebu-rua daha-ima, na hanua ena, ruma bona gabiruma tanodia. Ilanua badana na bogaraginai baine gini. ¹⁶Ena bada be iniheto: mirigini kahana, kiubit daha-hani sinahu-ima; diho kahana, kiubit daha-hani sinahu-ima; laurabada kahana, kiubit daha-hani sinahu-ima, bona lahara kahana, kiubit daha-hani sinahu-ima. ¹⁷Hanua ena gabiruma tanona danu baine mia: mirigini kahana ai, kiubit sinahu-rua imahui; diho kahana ai, kiubit sinahu-rua imahui; laurabada kahana ai, kiubit sinahu-rua imahui; bona lahara kahana ai, kiubit sinahu-rua imahui. ¹⁸Orena miana ena lata tano helaḡana ohena ai na kiubit gerebu-ta laurabada kahana ai bona kiubit gerebu-ta lahara kahana ai, tano helaḡana ohena ai. Una tano huahuana na hanua ena ḡaukara taudia adia aniani. ¹⁹Hanua ena ḡaukara taudia, Israel iduhudia iboudiai amo, ese bae biru henia. ²⁰Ba gwaurai hidi, tano idoinai ena lata bona ena lababa bae heḡereḡere, kiubit gerebu-rua daha-ima; una na tano helaḡana bona hanua tanona.

²¹Tano orena, tano helaḡana bona hanua tanona ohena ohena ai, na hanua pavapavana ena. Tano helaḡana ena kiubit gerebu-rua daha-ima amo ela bona laurabada kahana hetoana, bona lahara kahana ai hari kiubit gerebu-rua daha-ima amo ela bona lahara kahana hetoana, na hanua pavapavana ena tano. Una tano bona iduhu ta ta ahudia padadia na basie maraḡi bona basie bada edia lata idoinai. Tano helaḡana bona dubu helaḡana ia bogaraginai danu, ²²bona Levi taudia edia tano bona hanua tanona, na hanua pavapavana ena tano bogaraginai bae mia. Hanua pavapavana ahuna na Iuda ena tano bona Beniamina ena tano padadiai baine mia.

²³Iduhu oredia na iniheto: laurabada kahana amo ela bona lahara kahana, Beniamina ahuna, ahu ta. ²⁴Beniamina ena tano ohena ai, laurabada kahana amo ela bona lahara kahana, Simeon ahuna, ahu ta. ²⁵Simeon ena tano ohena ai, laurabada kahana amo ela bona lahara kahana, Isakara ahuna, ahu ta. ²⁶Isakara ena tano ohena ai, laurabada kahana amo ela bona lahara kahana, Sebulun ahuna, ahu ta. ²⁷Sebulun ena tano ohena ai, laurabada kahana amo ela bona lahara kahana, Gad ahuna, ahu ta. ²⁸Gad ena tano ohena ai, diho kahana ai, hetoa na Tamara amo bainela, ela bona Meribatakade ranu gabudia bena Aigupto Dokana amo bainela, ela bona Davara Badana. ²⁹Tanona bunai ba haria, Israel iduhudia ahudia ba henidia; ahudia ta ta bunu. Ḡaubada Iehova na e herevamu.

Hanua ikoukouna bona ladana

³⁰Hanua lalona amo bae raka lasi gabudia bini: Mirigini kahana ai (ena lata na kiubit daha-hani sinahu-ima), ³¹ikoukou toi bae mia, Ruben ena ikoukou, Juda ena ikoukou, bona Levi ena ikoukou. Hanua ikoukoudia na Israel iduhudia ladadia bae nemiaia. ³²Laurabada kahana ai (ia danu ena lata na kiubit daha-hani sinahu-ima), ikoukou toi bae mia, Josef ena ikoukou, Beniamina ena ikoukou, bona Dan ena ikoukou. ³³Diho kahana ai (ia danu ena lata na kiubit daha-hani sinahu-ima), ikoukou toi bae mia, Simeon ena ikoukou, Isakara ena ikoukou, bona Sebulun ena ikoukou. ³⁴Lahara kahana ai (ia danu ena lata na kiubit daha-hani sinahu-ima) ikoukou toi bae mia, Gad ena ikoukou, Asere ena ikoukou, bona Napatali ena ikoukou. ³⁵Hanua na bae hahetohoa heḡeḡe na kiubit gerebu-ta daha-taurahani. Bona una negana amo hanua ladana bae hatoa “Ihova ena noho gabuna”.

DANIEL

Iuda memerodia hahaniosi

1 ¹Iehoiakim, Iuda pavapavana, ena lohia laḡanina ihatoina ai, Nebukadnesara, Babulono pavapavana, ese Ierusalem e lao henia, e daia heḡeḡe. ²Bena Ġaubada ese Iehoiakim, Iuda pavapavana, na ia imana ai e atoa, bona Dirava ena dubu kohudia haida danu. Bena ia ese unu dubu kohudia na Sinara tanona e laohaidia, ena dirava ena dubu ai, bena hari kohu na ena dirava ena habou-habou daiutuna ai e atodia. ³Bena hanua pavapavana ese Aspenasa, ena hesiai tauna badana, e hagonia, ia ese Israel taudia haida, hanua pavapavana bona hanua lohiadia edia iduhu bogaragidia amo, baine mailaidia, ⁴uhau asi bebekabekadia, raho-namo memerodia, aonega daladia iboudiai lalodiai vada e manada memerodia, lalo-parara bona kwara-haraga memerodia, heheḡereḡere hanua pavapavana ena ruma ai hesiai memerodia ai baela; bena Kaldea taudia edia toretore dalana bona edia gado bae hadibalaidia. ⁵Hanua pavapavana ese adia e gwaurai, dina ta ta ahudia, pavapava ana aniani gaihodia, ia ese e ani gaudia, heḡereḡeredia; bona vine ranuna danu, ia e inua ḡauna heḡereḡerena. Laḡani toi lalodiai bae hadibadia, bena una negana baine ore ai, idia na hanua pavapavana vairanai bae hedinarai. ⁶Unu uhau bogaragidiai na Daniel bona Hanania bona Misael bona Asaria, Iuda iduhuna memerodia. ⁷Bena hari hesiai tauna badana ese ladadia ma e nemaidia; Daniel e nemaia Beletesasara; Hanania e nemaia Sadaraka; Misael e nemaia Mesaka; bona Asaria e nemaia Abedenego.

⁸A Daniel ese lalona e hadaia, ia na hanua pavapavana ana aniani gaihodia eiava e inuava vine-ranuna amo basine hahemiro eto; taunabunai ia ese hesiai tauna badana e noia, baine gwau maoro, ia na sibona basine hahemiro. ⁹Bena Dirava ese hesiai tauna badana lalona e ha-uraia, ia ese Daniel baine lalo namo henia bona baine bogaia hisi. ¹⁰Bena hesiai tauna badana ese Daniel e hamaoroa, eto, Lau na garimu, egu lohia, hanua pavapavana, amu aniani bona inuina ḡaudia e gwaurai hidi tauna, ese baine itamu, tau-animu se badamu, bamomu, oi ida

sihi tamona memerodia, tau-anidia e badamu hegeregerena baine itaia na garina. Unu amo boma hahekwakwanaigu, hanua pavapavana ese kwaragu baine utua oho. ¹¹Bena Daniel ese heregu tauna, hesiai tauna badana ese Daniel bona I lanania bona Misael bona Asaria iregudia ai vada e halaoa tauna, na e hereva henia, eto: ¹²Emu hesiai memerodia na ba dibamai toho, dina gwauta lalodiai; uma anianidia mo bona ranu mo bae henimai, baia ani bona baia inu ¹³Bena ai oromamai bona hari uhau haida; hanua pavapavana ana aniani gaihodia e animu memerodia, oromadia ba itadia; bena ba itamai hegeregerena emu hesiai memerodia ba kara henimai. ¹⁴Taunabunai, se edia hereva e abia dae, bena dina gwauta lalodiai e dibadia toho. ¹⁵Dina gwauta e ore ai, ia ese e itadia, oromadia ai bona tau-anidia ai idia ese hari hanua pavapavana ana aniani gaihodia e aniva memerodia iboudiai na e hereadia. ¹⁶Taunabunai heregu tauna ese adia aniani gaihodia bona aida vine ranuna na e abi oho, bena uma anianidia mo e henidia.

¹⁷Hari uhau hahaniosi na Dirava ese lalo-parara bona revareva iduahidia bona itoredia bona aonega e henidia; Daniel na danu mata-hanai bona nihi iboudiai mai dibana. ¹⁸Hanua pavapavana vada e hahegani bae hakaudia vareai negana e ore, bena hesiai tauna badana ese e hakaudia vareai, Nebukadnesara vairanai. ¹⁹Bena hanua pavapavana na idia ida e hereva-hereva, bena idia iboudiai bogaragidia amo ta se davaria, unu Daniel bona Hanania bona Misael bona Asaria hegeregeredia; taunabunai idia hahaniosi na hanua pavapavana vairanai do gigini. ²⁰Bena lalo-parara bona aonega daladia iboudiai lalodiai hanua pavapavana ese e nanadaidia, bena vada e dibadiaidia ese mea taudia bona babalau taudia iboudiai ena basileia idoinai lalonai na e hereadia nega hagwauta. ²¹Bena Daniel na gabuna ai do noho, ela bona King Kuresa ena lohia lagania gini gunana.

Nebukadnesara ena nihi

2 ¹Nebukadnesara ena lohia lagania iharuana ai, Nebukadnesara e nihi; bena lalona na e hekwarahiva bona se mahutava. ²Bena hanua pavapavana na e hahedua, mea taudia bona babalau taudia bona rohe taudia bona Kaldeataudia na bae boiridia, hanua pavapavana ena nihi bae herevalai henia. Taunabunai, idia na e raka vareai, hanua pavapavana vairanai e gini.

³Bena hanua pavapavana ese e hamaorodia, eto, Na nihi, bena laloguna e hekwarahimu, nihi baina dibaia na tomamu. ⁴Bena Kaldea taudia ese hanua pavapavana e hamaoroa, eto, Pavapava e, ba mauri hanaihanai! Emu hesiai taudia na nihi ba hamaorolaimai, bena ai ese anina baia gwauria.

⁵Bena hanua pavapavana ese Kaldea taudia e haere henidia, eto, Na hamaoromui momokanimu, nihi bona anina danu basio hamaorolaigu,

vada bae daremui patapata bona emui ruma bae gīgīdia dobi. ⁶A nihi bona anina vada ba hahedinarai, bena lauegu amo harihari gāudia bona dava namodia bona dāgi badadia baina henimui. Taunabunai, nihi bona anina danu ba hadibalaigu. ⁷Idia ese nega iharuana ma e haere, eto, Hanua pavapavana ese ena hesiai taudia na nihi baine hadibalaimai, bena ai ese anina baia gwauria.

⁸Hanua pavapavana ma e haere, eto, Lau dibagu momokani umui na o halahemu, badina be vada o diba egu hereva na momokani, ⁹nihi na basioma hadibalaigu davamui baine tamona mo. Vada o henega bou, hereva koikoidia bona dikadia lau vairagu ai ba gwaurai, ela bona nega ta. Taunabunai, nihi vada ba hamaorolaigu, bena baina diba umui na anina danu ba hamaorolaigu diba. ¹⁰Bena Kaldea taudia ese hanua pavapavana e haere henia, eto, Asi tauna ta tanobada ai ese hanua pavapavana ena hahedua baine badinaia diba; badina be asi hanua pavapavana badana bona mai siahuna ta ese gāu unuhetomana vada e tahua, mea tauna ta eiava babalau tauna ta eiava Kaldea tauna ta enai. ¹¹Hanua pavapavana ese e tahuamu gāuna na auka herea; tau ta ese hanua pavapavima basine hamaorolaia diba, a dirava haida ese. A unu dirava na taunimanima dekediai asie nohomu.

¹²Una hereva dainai hanua pavapavana na e badu, lalona na e gāragāra herea, bena e hahegani aonega taudia iboudiai Babulono ai na bae aladia ore. ¹³Taunabunai, hahedua herevana e siaia lao, aonega taudia na bae aladia mase; bena Daniel mai bamona ida danu e tahudia, bae aladia mase totona. ¹⁴Bena Daniel ese ena hereva nahuana e tohoa, bena mai lalo-pararana ida Ariok, hanua pavapavana ena hegima oreana biaguna, aonega taudia Babulono ai iala-masedia totona ela tauna, na e haere henia. ¹⁵Ia ese Ariok, hanua pavapavana ena tuari lohiana, e nanadaia, eto, Badina be dahaka hanua pavapavana ena hahedua na auka herea? Bena Ariok ese una kara na Daniel e hamaorolaia. ¹⁶Bena Daniel na e raka vareai, hanua pavapavana e noia, nega ta baine gwaurai henia, nihi anina na hanua pavapavana baine hamaorolaia helaoreana.

¹⁷Bena Daniel na ena ruma ela, una kara na ia bamona Ilanania bona Misael bona Asaria e hamaorolaidh, ¹⁸bena e hamaorodia danu, guba Duavana ena hebogahisi bae tahua, una gāu hehunina dainai, Daniel mai bamona ida na aonega taudia Babulono ai oredia ida basie mase bou helaoreana. ¹⁹Bena una gāu hehunina na Daniel enai e hedarai, hanuaboi mata-hanaina lalonai. Bena Daniel ese guba Duavana e hanamoa. ²⁰Daniel eto,

Dirava ladana bae hanamoa ela bona hanaihanai;
aonega bona goada na ienai.

²¹Ia ese nega bona nega hetoadia e ha-idaudiamu;
ia ese hanua pavapavadia e abidia ohomu bona e haginidiamu;

ia ese aonega taudia na aonega e henidiamu,
bona lalo-parara taudia na lalo-parara e henidiamu.

22 Ia ese ġau dobudia bona ġau hehunidia e hahedinaraidiamu;
dibura ai e miamu ġaudia na ia dibana,
diari na ienai e miamu.

23 Senegu edia Dirava e,
lau na hanamomumu, na imodaimumu;
badina be oi ese aonega bona goada vada o henigu,
bona ai ese a noimu ġauna na vada o hadibalaigu;
badina be hanua pavapavana enai e vara karana na
vada o hadibalaimai.

24 Taunabutlai Daniel na Ariok, hanua pavapavana ese aor!ega taudia Babulono ai iala-masedia e duanaia tauna, dekenai e raka vareai. Ela, e hereva henia, eto, Aonega taudia Babulono ai basio aladia mase; lau ba hakaugu vareai hanua pavapavana vairanai, bena lau ese hanua pavapavana ena nihi anina baina hamaorolaia.

25 Bena Ariok ese Daniel e hakaua vareai haraġa, hanua pavapavana vairanai, e hamaoroa, eto, Iuda amo e mailaidia bena iniseni ai e hanohodia taudia bogaragidiai tau ta vada na davaria, ia ese nihi anina na hanua pavapavana baine hamaorolaimu diba. 26 Bena hanua pavapavana ese Daniel, ladana ta be Beletesasara, e nanadaia, eto, Egu nihi bona anina danu ba hamaorolaigu diba eiava? 27 Daniel ese hanua pavapavana e haere henia, eto, Aonega taudia eiava babalau taudia eiava mea taudia eiava hisiu toadia mai dibadia taudia ta ese hari ġau hehunina, hanua pavapavana ese vada e nanadailaia ġauna, na hanua pavapavana basine hamaorolaia diba. 28 A ġau hehunidia e hahedinaraidiamu Diravana na guba ai; ia ese dina gabedia ai bae vara ġaudia na oi King Nebukadnesara vada e haheitalaimu. Emu nihi, bona mata-hanai ġaudia kwaramu ai e hedinarai, emu mahuta patana latanal o hekureva negana ai, ġaudia bini. 29 Pavapava e, emu mahuta patana latanai o hekureva negana ai, lalo-hadai haida na emu ai e kau, nega gabedia ai bae vara ġaudia o lalo hadailai; bona ġau hehunidia e hahedinaraidiamu Diravana ese bae vara ġaudia na e hadibalaimu. 30 A ina ġau hehunina na egu ai vada e hahedinarai, dia egu aonega ese mauri taudia iboudia edia aonega na e herediamu dainai, to anina na hanua pavapavana baina hadibalaimu bona oi sibomu emu lalo-hadai ba dibadia helaoreana.

31 Pavapava e, kaivakuku badana ta o itaia. Una kaivakuku bada-hereana bona kiamakiama-hereana na oi vairamu ai e gini, ita-itana na mai garina. 32 Una kaivakuku kwarana na *gold* namo-hereana, kemena bona imana na *silver*, bogana bona koekoena na auri labora-labora, 33 bona aena na auri. Aena palapaladia na taidia auri bona taidia raro.

³⁴Bena o raraia negana ai, nadi ta vada e heutu oho, a d;ja taunimanima imana ese; bena una nadi ese una kaivakuku aena palapaladia, auri bona raro gaudia, ai e tubu, e hamakohidia rohoroho. ³⁵Bena auri, raro, auri labora-labora, *silver*, *gold*, iboudiai na e makohi sisisisi, taboro negana ai uit e kwadiumu gabuna momorudia na heheto; bena lai ese e hodadia oho, sidia taidia asie davaridia diba. A hari kaivakuku ai e tubu nadina na ororo badana ai ela, tanobada idoinai e hahonua.

³⁶Nihi na bunai. Harihari ai ese ia anina na hanua pavapavana baia hamaorolaimu. ³⁷Pavapava e, oi na pavapava edia pavapava; guba Diravana ese basileia bona sياهو bona goada bona hairai na oi vada e henimu; ³⁸bona taunimanima natudia bona uda boromadia bona atai manudia, edeseni ai edeseni ai e nohomu, na oi imamu ai vada e atodia bona iboudiai biagudia ai vada e halaomu: oi na hari kwara, *gold* ġauna. ³⁹Oi murimu ai basileia ta ma baine gini, a dia oiemu hegeregerena; ma ia murinai ihatoia, auri labora-labora ġauna; ia ese tanobada idoinai baine lohiaia. ⁴⁰Bena basileia ihahanina baine gini, mai goadana auri na heto; badina be auri ese ġau iboudiai e hamakohidia sisisisimu bona e huaridia patapatamu; bena e hahemakohimu aurina na heto ia ese ini iboudiai baine hamakohidia bona baine taodia pata. ⁴¹Ina danu, hari ae palapaladia bona ae kwakikwakidia o itadia, taidia na uro ikarana tauna ena raro bona taidia na auri, hegeregerena ai una basileia baine haheparara; a ia lalonai auri ena auka taina baine mia, hari auri o itaia, raro manoka-manokana ida e hebulo, na heto. ⁴²Bona hari ae kwakikwakidia taidia na auri bona taidia na raro manoka-manokana hegeregerena ai, una basileia kahana baine goada bona kahana baine makohi kava. ⁴³Bona auri o itaia, ia na raro manoka-manokana ida e hebulo, hegeregerena ai idia na bae headava hedoa-hedoa, a basie hahetamona, auri bona raro e hebulomu ai asie hahetamonamu na heto. ⁴⁴Unu pavapava edia nega ai guba Diravana ese basileia ta baine haginia, nega ta ai basie habuaia tari diba ġauna; bena ena lohia siahuna na basine hanai bese idauna ta enai. Ia ese unu basileia iboudiai na baine hamakohidia sisisisi bona baine hadokodia, bena baine gini hanaihanai. ⁴⁵Nadi ta o itaia hegeregerena, ororo amo e heutu oho, a dia taunimanima imana ese; bena una nadi ese auri, auri labora-labora, raro, *silver* bona *gold* na e hamakohi sisisisi. Dirava badana ta ese nega gabena ai bae vara ġaudia na hanua pavapavana vada e hadibalaimu. Nihi na momokani, bona anina na momokani. ⁴⁶Bena King Nebukadnesara na tano ai e goru diho, Daniel e toma henia diho, bena e hahegani, boubou ġauna bona muramura mai bonana na bae hahelaġaia iena. ⁴⁷Hanua pavapavana ese Daniel e hereva henia, eto, Momokani, emu Dirava na dirava edia Dirava bona pavapava edia Lohia, bona ġau hehunidia ihahedinaraidia Diravana; badina be oi ese ina ġau hehunina

ihahedinaraina vada o diba. ⁴⁸Bena hanua pavapavana ese Daniel na dagi badadia bona herahia badadia ġaudia momo herea e henia; bona Babulono tanona idoinai lohiana ai bona aonega taudia iboudiai Babulono ai biagudia ai e halaoa. ⁴⁹Bena Daniel ese hanua pavapavana e noia; bena ia ese Sadaraka bona Mesaka bona Abedenego e duanaidia, Babulono tanona bae biagua; a Daniel na hanua pavapavana ena ruma ai e nohova.

Lahi badana

3 ¹King Nebukadnesara ese *gold* kaivakukuna ta e karaia, latana na kiubit tauratoi-ahui bona lababana na kiubit tauratoi. Ia ese Dura taorana ai e haginia, Babulono tanona ai. ²Bena King Nebukadnesara ese hereva e siaia lao, heitatao taudia, hanua lohiadia, basileia lohiadia, hahealo taudia, moni inaridia taudia, hahemaoro taudia badadia bona maraġidia bona kaha ta ta ai mai dagidia taudia iboudiai na baema, hari King Nebukadnesara ese vada e haginia kaivakukuna ihahelaġana totona. ³Bena hari heitatao taudia, hanua lohiadia, basileia lohiadia, hahealo taudia, moni inaridia taudia, hahemaoro taudia badadia bona maraġidia bona kaha ta ta ai mai dagidia taudia iboudiai na e hebou, King Nebukadnesara ese vada e haginia kaivakukuna ihahelaġana totona, bena idia na King Nebukadnesara ese vada e haginia kaivakukuna vairanai e gini.

⁴Bena gwau-lasi tauna na e hereva badabada, eto, Bese idau-idau bona basileia idau-idau bona gado idau-idau taumui e, Pavapava ese e haganimuimu, ⁵kibi, ivilikou, gitara, eukaleli, hatai ġauna badana, gaba bona rege ġaudia idau-idau reġedia ba kamoni negana ai, ba goru goru diho, hari *gold* kaivakukuna, King Nebukadnesara ese vada e haginia ġauna, ba toma henia diho; ⁶a daika basine goru diho bona basine toma diho, ia na maoromaoro bae abia, lahi ta, e hururu hereamu bona e siahu hereamu lahina, Ialonai bae taho varei. ⁷Taunabunai, taunimanima iboudiai ese kibi, ivilikou, gitara, eukaleli, hatai ġauna badana, gaba bona rege ġaudia idau-idau reġedia e kamoni negadia ai, bese idau-idau bona basileia idau-idau bona gado idau-idau taudia iboudiai na e goru goru diho, hari *gold* kaivakukuna, King Nebukadnesara ese e haginia gauna, na e toma henia diho.

⁸Taunabunai, una negana ai Kaldea taudia haida ema, edia lalo-dika ai Iuda taudia e habadelaidia. ⁹Idia ese King Nebukadnesara e hamaoroa, eto, Pavapava e, ba mauri hanaihanai! ¹⁰Pavapava e, oi na o hahegani, olo kibi, ivilikou, gitara, eukaleli, hatai ġauna badana, gaba bona rege ġaudia idau-idau reġedia bae kamoni taudia iboudiai na bae goru goru diho, hari *gold* kaivakukuna bae toma henia diho; ¹¹a basine goru diho bona basine toma diho tauna na lahi ta, e hururu hereamu bona

e siahu hereamu lahina, lalonai bae tahoā vareai. ¹²luda taudia haida iniseni ai, oi ese vada o duanaidia, Babulono tanona bae biagua taudia: Sadaraka, Mesaka bona Abedenego. Pavapava e, unu tatau ese asie kamonaī henimumu; oiemu dirava isiaidia asie lao henimu, bona *gold* kaivakukuna, oi ese o haginia ḡauna, asie toma henia dihomu.

¹³Bena Nebukadnesara na e badu garaḡara, e hahedua, Sadaraka, Mesaka bona Abedenego bae mailaiadia. Bena unu tatau na e hakaudia vareai, hanua pavapavana vairanai. ¹⁴Nebukadnesara ese e nanadaidia, eto, Sadaraka, Mesaka bona Abedenego e, momokani umui ese egu dirava isiaidia asio lao henimu bona *gold* kaivakukuna, vada na haginia ḡauna, asio toma henia dihomu a? ¹⁵Benaini, lalomui bema heḡeregere, kibi, ivilikou, gitara, eukaleli, hatai ḡauna badana, gaba bona rege ḡaudia idau-idau reḡedia ba kamonaī negana ai na ba goru diho, bona vada na karaia kaivakukuna ba toma henia diho, vada namo. A basioma toma diho, e hururu hereamu bona e siahu hereamu lahina lalonai maoromaoro baema tahomui vareai; bena edena dirava ese lau imagu amo baine hamaurimui?

¹⁶Bena Sadaraka, Mesaka bona Abedenego ese hanua pavapavana e haere henia, eto, Nebukadnesara e, asi badina baia haere henimu. ¹⁷Emai Dirava, isiaina a lao heniamu Diravana, na ihamaurimai bema ura, ia ese hari e hururu hereamu bona e siahu hereamu lahina amo bona oi pavapava taumu imamu amo do baine hamaurimai. ¹⁸A basinema ura danu, pavapava e, vada ba diba, ai ese emu dirava isiaidia basia lao heni, bona hari *gold* kaivakukuna, oi ese vada o haginia ḡauna, na basia toma henia diho.

¹⁹Bena Nebukadnesara na badu ai e honu honu dae, bona ia vairana na e ha-idaua Sadaraka, Mesaka bona Abedenego ediai. Ia e hahedua, eto lahi na nega hahitu ma bae hasiahua, dia vaevae e hasiahuava heḡereḡerena. ²⁰Bena ia ese ena tuari oreana taudia mai goadadia haida e haganidia, idia ese Sadaraka, Mesaka bona Abedenego na bae guidia, hari lahi, e hururu herea bona e siahu herea lahina, lalonai bae tahodia vareai. ²¹Bena unu tatau na mai dabuadia bona hahedokidia bona mai edia kwara ḡaudia bona mai dabua logoradia ida e guidia, e hururu herea bona e siahu herea lahina ai e tahodia vareai. ²²Bena hanua pavapavana ena hahedua na auka bona lahi na siahu herea dainai, lahi hururuna ese unu Sadaraka, Mesaka bona Abedenego e abidia lao taudia na e aradia mase. ²³Unu tatau tatoiosi, Sadaraka, Mesaka bona Abedenego na e hururu herea bona e siahu herea lahina lalonai eha tubu, mai iḡuidia ida.

²⁴Bena King Nebukadnesara e hoa dikadika; bena e tore isi haraḡa-haraḡa. Ia ese ena hahealo taudia e nanadaidia, eto, Tatau tatoi na mai iḡuidia ida lahi lalonai ta tahodia vareai ani? Idia ese hanua pavapavana e haere henia, eto, Pavapava e, momokani. ²⁵Ia na e haere, eto, A lau ese

tatau hahani heruhadia ai na itadiamu, lahi bogaraginai e loaloamu, asi berodia; bona ihahanina oromana na dirava ta natuna na heto.

²⁶Bena Nebukadnesara ese hari e hururu herea bona e siahu herea lahina gabuna iduarana e raka henia kahi, eto, Sadaraka, Mesaka bona Abedenego, Herea Mikamika Diravana ena hesiai taudia, ini a raka lasi mai. Bena Sadaraka, Mesaka bona Abedenego na lahi amo e raka lasi. ²⁷Bena heitatao taudia, hanua lohiadia, basileia lohiadia bona hanua pavapavana ena hahealo taudia na e hegogo, e itaia, lahi na asi siahuna unu tatau tau-anidia ediai; kwaradia huidia na asie hedederai, edia dabua na asie dika, bona lahi varagana na lasi ediai.

²⁸Bena Nebukadnesara eto, Sadaraka, Mesaka bona Abedenego edia Dirava na aita hanamo. Ia ese ena aneru ta e siaia, ena hesiai taudia, ia e abidadama henia bona hanua pavapavana ena hahegani e dadaraia bona idau dirava ta isiaina asie lao heni bona asie toma henia diho a edia Dirava korikorina mo dainai tau-anidia e heni taudia, na e hamauridia. ²⁹Taunabunai, lau na haheganimu; bese ta eiava basileia ta eiava gado ta taudia ese Sadaraka, Mesaka bona Abedenego edia Dirava na bae uduguiria, vada bae daredia patapata, bona edia ruma na bae gīgidia dobi; badina be asi dirava ta na hahemauri mai dibana ina hegeregerena. ³⁰Bena hanua pavapavana ese Sadaraka, Mesaka bona Abedenego e hadaedia, Babulono tanona ai.

Nehukadnesara e kavaia

4 ¹A King Nebukadnesara ena hereva, bese idau-idau bona basileia idau-idau bona gado idau-idau iboudiai, tanobada idoinai e noho heniamu taudia iboudiai ediai, binai.

Maino baine bada emui ai! ²Vada na laloa, namona be toa bona hoa karadia Herea Mikamika Diravana ese egu ai vada e kara mani aina hamaorolaimui.

³Iena toa na daka bada!

lena hoa karadia na daka siahu!

lena basileia na e hesiriu hanaihanaimu,

bona ena lohia siahuna na uru uru latadi.ia.

⁴Lau Nebukadnesara na egu ruma ai na noho namonamova, egu pavapava rumana ai egu namo na habadaiava. ⁵Nega ta na nihi, bona una nihi ese e hagarigu; egu mahuta patana latanai na hekureva negana ai, egu lalo-hadai bona mata-hanai gaudia kwaragu lalonai ese e hagarigu. ⁶Taunabunai na hahedua, aonega taudia iboudiai Babulono ai na vairagu ai bae mailaidia, nihi anina bae hadibalaigu totona. ⁷Bena mea taudia, babalau taudia, Kaldea taudia bona hisiu toadia mai dibadia taudia na e raka vareai; bona lau ese nihi na hamaorolaidia, a anina ihadibalaigu na asi dibadia. ⁸Dokona ai Daniel e raka vareai; ia ladana

ta na Beletesasara, egu dirava ladana e nemailaia, bona dirava helaḡadia ese e roheamu. Bena una nihi na hamaorolaia, nato, ⁹Beletesasara e, oi na mea tauna badana, badina be lau dibagu dirava helaḡadia ese vada e rohemu, bona ḡau hehunina ta na dia hehuni oiemu ai. Na itaia nihina binai; oi ese anina do ba hamaorolaigu. ¹⁰Egu mahuta patana latanai na hekureva negana ai, mata-hanai ḡaudia kwaragu lalonai bini: na roha lao, au ta na itaia, tanobada bogaraginai; ia na gaulatalata. ¹¹Au na e tubu, e lo e laova, dorina na guba ai e kau, bona tanobada idoinai dokona amo e itaiava. ¹²Rauna na kasiri-kasiri, huahuana na momo herea, taunimanima iboudiai adia aniani ḡaudia. Uda boromadia na ia ikerukeruna ai e hekureva, bona atai manudia na ia rigina ai e nohova, mauri ḡaudia iboudiai na ia ese e ubudiava.

¹³Egu mahuta patana latanai na hekureva negana ai, kwaragu ena mata-hanai lalonai na itaia, hegima tauna helaḡana ta na guba amo e diho. ¹⁴E boi lolo, ini e gwau toma: Au ba hagaria, rigina ba lapadia oho, rauna ba padadia oho, huahuana ba ḡigidia rohoroho; uda boromadia na ia henuna amo bae heau lasi bona manu na rigina amo bae roho oho. ¹⁵A au badina mai ramuna ida na tano ai ba rakatania, bona iḡeḡelaina aurina, auri bona auri-laboralabora amo e karaia ḡauna, amo ba ḡeḡea; bona rei matamata bogaraginai do baine mia. Guba hununa ese baine hapariparia; uda boromadia ida baine noho tanobada reina ai. ¹⁶Ia lalona, taunimanima lalona, na baine idau, boroma lalona bae henia; bona laḡani hitu na ia latanai bae ha-ore. ¹⁷Irevana na hegima taudia edia hahedua amo, bona ihahemaoro-henina na helaḡa taudia edia hereva amo, bona mauri taudia na bae diba, Herea Mikamika Diravana ese taunimanima edia basileia e lohiamu, bona e uramu baine henia tauna na e heniamu, bona uhugai herea tauna na hekwara tauna ai e halaoamu. ¹⁸Una nihi na lau, King Nebukadnesara, ese na itaia. A oi, Beletesasara e, anina ba gwauriaia hedinarai, badina be aonega taudia iboudiai egu basileia lalonai na anina ihamaorolaigu asi dibadia, a oi na mai dibamu, badina be dirava helaḡadia ese vada e rohemu.

¹⁹Bena Daniel, ladana ta na Beletesasara, kudouna na e hetaha nega sisina ai; bona ena lalo-hadai ese e hagaria. Bena hanua pavapavana eto, Beletesasara e, nihi eiava anina ese basine hagarimu. Beletesasara na e haere, eto, Egu lohia e, bema nihi na e inai henimumu taudia latadiiai bona anina na oi inaimu latadiiai, una na bema namo. ²⁰Au o itaia, e tubu bona e lo e laova ela bona dorina na guba ai e kau bona tanobada idoinai dokona amo e itaiava ḡauna, ²¹rauna na kasiri-kasiri bona huahuana na momo herea, taunimanima iboudiai adia aniani ḡaudia, bona ikerukeruna ai uda boromadia e hekureva bona rigina ai atai manudia e nohova ḡawla, ²²pavapava e, una na oi. Oi na vada o tubu bona vada o lo; vada o tubu badabada ela bona guba, bona emu siahu na e laomu

ela bona tanobada dokodia. ²³Hanua pavapavana ese hegima tauna helaḡana e itaia, guba amo e diho, eto: Au ba hagaria, ba habuaia tari, a au badina mai ramuna ida na tano ai ba rakatania, bona igegelaina aurina, auri bona auri-laboralabora amo e karaia ḡauna, amo ba ḡeḡea, bena rei matamata lalonai baine mia; bena guba hununa ese baine hapariparia, uda boromadia ida baine noho, ela bona laḡani hitu na ia latanai bae ha-ore. ²⁴Pavapava e, anma binai: Herea Mikamika Diravana ena hahedua egu lohia bona egu pavapava latamu ai vada e kau; ²⁵e tomu taunimanimā bogaragidia amo bae lulumu lasi, uda boromadia ida ba noho; rei do bavani, boromakau na heto, bona guba hununa ese baine hapariparimu; laḡani hitu na oi latamu ai bae ha-ore, ela bona ba diba Herea Mikamika Diravana ese taunimanimā edia basileia e lohiamu, bona e uramu baine henia tauna na e heniamu. ²⁶Bona e hahegani, au badina mai ramuna ida baine mia heḡereḡerena ai, emu basileia baine mia oiemu, oi ba diba Guba Diravana e lohiamu negana amo. ²⁷Taunabunai, pavapava e, egu hahealo na boma abia dae; emu kara dika boma hadoko, kara maoromaorodia boma kara, bona emu kara havara danu boma hadoko; e hahisidiamu taudia boma bogadia hisi; bena reana emu noho-maino taina ma baine daudau.

²⁸Ina idoinai na King Nebukadnesara latanai e kau. ²⁹Hua gwauta-rua e ore, bena ia ese pavapava rumana Babulono ai guhina latanai e raka eva-evava. ³⁰Bena hanua pavapavana eto, Ina na Babulono badana, egu siahu hereana amo vada na haginia, lau pavapava egu noho gabuna bona lau pavapava hairaigu ihabadana ani? ³¹Hanua pavapavana na dounu e herevava ai, gado ta na guba amo e diho, eto, King Nebukadnesara e, vada e hereva henimumu, e tomu “Basileia na emu amo vada eme heabi oho; ³²taunimanimā bogaragidia amo bae lulumu lasi, uda boromadia ida ba noho; rei do bavani, boromakau na heto; laḡani hitu na oi latamu ai ba ha-ore, ela bona vada ba diba, Herea Mikamika Diravana ese taunimanimā edia basileia e lohiamu, bona e uramu baine henia tauna na e heniamu”. ³³Bena asi vanahana una hereva anina e vara Nebukadnesara latanai. Taunimanimā bogaragidia amo e lulua lasi, bena rei e aniva, boromakau na heto, bona tau-anina na guba hununa ese e haparipariava, ela bona huina e lata, ugava huina na heto, bona kahauna na manu kahaudia na heheto.

Nebukadnesara ena hereva

³⁴Unu dina dokodia ai, lau Nebukadnesara na gaga dae guba ai, bena daragu ma e vara lou, bona Herea Mikamika Diravana na hanamoa, e noho hanaihanaimu Diravana na imodaia bona na heatolaia.

Badina be ia siahuna na mia hanaihanai siahuna,
bona iena basileia na uru ta ela bona ma uru ta e hesiriumu;

³⁵ tanobada inoholaina taudia iboudiai e nenediamu, dia ġau ta na heto; ia na sibona ena ura e karamu guba oreana bogaraginai, bona tanobada inoholaina taudia bogaragidiai danu; ta ese ia imana basine laoa ahu diba, eiava basine nanadaia, basineto “Dahaka o karamu?”

³⁶Una negana ai danu daragu ma e vara lou; bona pavapava dagina bona hairaina ma e ahulaigu, egu basileia ihahairaina totona. Egu hahealo taudia bona egu lohia taudia ese e tahugu, bona egu basileia ai e haginigu, bena egu sياهو na e bada e laova. ³⁷Harihari lau Nebukadnesara ese guba Pavapavana na imodaiamu, na heatolaiamu bona na matauraianu; badina be iena kara iboudiai na mamaoro-mamaoro bona ena dala na gogoeva-goġoeva; bona mai hekokorokudia ida e rakamu taudia ihahemaraidia na mai dibana.

King Belesasara ena aria

5 ¹King Belesasara ese aria badana ta e karaia, ena lohia taudia daha-ta adia; bena ia ese vine ranuna e inua, unu tatau daha-ta vairadiai.

²Belesasara ese vine ranuna e demaia toho, bena ia na e haheġani, tamana Nebukadnesara ese Ierusalem dubuna amo e abidia keheredia, *gold* bona *silver* gaudia, na bae mailaidia, bena hanua pavapavana bona ena lohia taudia bona adavana korikoridia bona e adavadia hahinedia danu ese vine ranuna na unu ġau amo bae inu. ³Bena haida ese hari *gold* bona *silver* keheredia, Ierusalem dubuna, Dirava ena dubu, amo e abi ġaudia, na e mailaidia; bena hanua pavapavana bona ena lohia taudia bona adavana korikoridia bona e adavadia hahinedia ese vine ranuna na unu ġau amo e inuinulai. ⁴Idia ese vine ranuna vada e inu, bena *gold*, *silver*, auri labora-labora, auri, au bona nadi diravadia e imodaidia.

⁵Asi vanahana tau ta imana kwakikwakidia e hedinarai, bena hanua pavapavana ena ruma habana ai e toretore, lamepa patana hevaira-hehenina ai, bena hanua pavapavana ese una ima na revareva e toreva ai e itaia. ⁶Bena hanua pavapavana na e laboraia ġuġuru, bona ena lalo-hadai ese e halalagaia, e hebalarea utu-utu, tuina ruaosi e tabubu-tabubu. ⁷Bena hanua pavapavana e boiboi badabada, babalau taudia bona Kaldea taudia bona hisiu toadia mai dibadia taudia bae hakaudia vareai. Bena hanua pavapavana ese aonega taudia Babulono ai e hereva henidia, eto, Ina revareva baine duahia bona anina baine hadibalaigu tauna na dabua kakakakana amo bae hadabualaia, bona *gold* agevana na aiona ai bae ha-inulaia, bona basileia lalonai lohia dagina ihatoina baine abia. ⁸Bena hanua pavapavana ena aonega taudia iboudiai e raka vareai, a una revareva iduahina asi dibadia bona asie heġereġere anina na hanua pavapavana bae hadibalaia. ⁹Bena King Belesasara e gari dikadika bona e laboraia ġuġuru. Ena lohia taudia danu e daradarava.

¹⁰Hanua pavapavana bona ena lohia taudia edia hereva daidiai, hanua pavapavana hahinena na aria rumana ai e raka vareai. Bena hanua pavapavana hahinena eto, Pavapava e, ba mauri hanaihanai! Emu lalo-hadai ese basie halalaḡamu bona basine laboramu guguru. ¹¹Emu basileia lalonai dirava helaḡadia ese e roheamu tauna ta e nohomu. Tamamu ena nega ai, diari bona lalo-parara bona aonega, dirava edia aonega heḡereḡerena, na e davaridia; bena tamamu King Nebukadnesara ese mea taudia, babalau taudia, Kaldea taudia bona hisiu toadia mai dibadia taudia biagudia ai e halaoa; ¹²badina be lauma namo-hereana bona aonega bona lalo-parara na Daniel (hanua pavapavana ese Beletesasara e nemaia tauna) enai e davaridia, nihi bona hereva hehunidia anidia ihahedinaraidia ai bona lalo-hekwarahi ihamaoromaorodia ai. Mani emu kara, Daniel ae boiria, bena ia ese anina baine hahedinarai.

¹³Bena haida ese Daniel na hanua pavapavana vairanai e hakaua vareai. Bena hanua pavapavana ese Daniel e hereva henia, eto, Oi na vanegai Daniel, noho-hedoa tauna, tamagu hanua pavapavana ese luda amo e mailaidia taudia ta. ¹⁴Harimu vada na kamoni, dirava helaḡadia ese e rohemumu, bona diari bona lalo-parara bona aonega herea-daena na oi lalomu ai vada e davaridia. ¹⁵Benaini, aonega taudia bona babalau taudia na vairagu ai vada e hakaudia vareai, ina revareva bae duahia bona anina bae hadibalaigu totona, a ina kara anina ihahedinaraina na asi dibadia. ¹⁶A vada na kamoni, oi ese ḡau anidia ihahedinaraidia bona lalo-hekwarahi ihamaoromaorodia na mai dibamu. Harihari ina revareva boma duahia diba bona anina boma hadibalaigu, bena dabua kakakakadia amo bae hadabualaimu, bona *gold* agevana na aiomu ai bae ha-inulaimu, bona basileia lalonai lohia dagina ihatoina bavabia.

¹⁷Bena Daniel na hanua pavapavana vairanai e haere, eto, Emu herahia ḡaudia na emu ai bae mia, bona emu dava ḡaudia na tau ta ba henia; ḡau tamona lau ese revareva baina duahia, hanua pavapavana emu ai, bona anina danu baina hadibalaimu. ¹⁸Pavapava e, Herea Mikamika Diravana ese tamamu Nebukadnesara na pavapava dagina, dagi badana, hairai bona lohia siahuna e henia; ¹⁹bona vada e henia dagina badana dainai bese idau-idau bona basileia idau-idau bona gado idau-idau iboudiai na ia vairanai e heude-heudeva bona e gariva. Iala-masedia e urava taudia na e aladia maseva, bona ihamauridia e urava taudia na e hamauridiava; iabi-isidia e urava taudia na e abidia isiva, bona iato-dihodia e urava taudia na e atodia dihova. ²⁰A sibona e heabi isi bona lalona e ha-aukaia, bena hekokoroku karadia e karava; una negana ai pavapava teronona amo e hadihoia bona hairaina e abia oho, ²¹taunimanima bogaragidia amo e lulua lasi, lalona na boroma lalona heḡereḡerena ai ela, uda donikidia ida e nohova; rei e aniva, boromakau na heto, bona tau-anina

na guba hununa ese e haparipariava, ema bona ia vada e diba Herea Mikamika Diravana ese taunimanima edia basileia e lohiaiamu, bona e uramu baine henia tauna na e heniamu, baine lohiaia totona. ²²Oi danu, ia natuna Belesasara, ena be ina idoinai dibamu to so hahemanaumu; ²³a oi na sibomu vada o heabi isi, guba Lohiana vada o dadaraia; iena dubu keheredia na oi vairamu ai vada e vareailaidia, bona oi bona emu lohia taudia bona adavamu korikoridia bona vada o adavadia hahinedia ese unu ġau lalodia amo vine ranuna vada o inu; *silver, gold*, auri labora-labora, auri, au bona nadi diravadia, asie itamu, asie kamonaimu, asie dibamu gaudia, vada o imodaidia, a laġamu na imana ai bona emu dala iboudiai na ienai Diravana na so matauraia.

²⁴Bena ia vairana amo hari ima ta vada e siaia, bona ina revareva vada e torea. ²⁵E torea revarevana binai: MENE, MENE, TEKELE, PARASINI. ²⁶Anina binai: MENE, Dirava ese emu basileia dinadia vada e hagogaudia bona vada e hadokoa; ²⁷TEKELE, metaumu vada e hahetohoa, so heġereġere; ²⁸PERE, emu basileia vada e haria, Mede bona Parasa taudia vada e henidia.

²⁹Bena Belesasara e haheġani, bona Daniel na dabua kakakakadia amo e hadabualaia, bona *gold* agevana na aiona ai e ha-inulaia, bona e gwauraia hedinarai, ia na lohia dagina ihatoina baine abia basileia lalonai.

³⁰Una hanuaboi, Belesasara, Kaldea pavapavana, na e alaia mase. ³¹Bena Darauese, tau Mede, ese basileia e abia; ena mauri lagarudia na tauratoi-ahui-rua sisivana.

Leona kohuana

6 ¹Ena ura dainai, Darauese ese heitatao taudia sinahu-ta ruahui e duanaidia, basileia na bae biagua, basileia kahadia iboudiai; ²bona idia daediai hekwara taudia tatoi e atodia, ta be Daniel. Hari heitatao taudia ese edia ġaukara sivaraidia na hekwara taudia bae hamaorolaidia, hanua pavapavana ena ġau ta basine boio helaoreana. ³Bena hari Daniel ese hekwara taudia bona heitatao taudia iboudiai e hereadia, badina be lauma herea-daena ese e rohea; bona hanua pavapavana ese e laloa hata, basileia idoinai ikwarana ai baine halaoa eto.

⁴Bena hari hekwara taudia bona heitatao taudia ese hahebade badina ta e tahua, basileia ġaukarana dainai Daniel bae habadelaia eto; a hahebade badina ta eiava kerere ta asie davaria; badina be ia na e kara maoromaoro, bona kara rea ta eiava kerere ta ienai asie davaria. ⁵Bena unu tatau eto, Ina Daniel ihabadelaina badina ta basita davaria, a reana ena Dirava ena taravatu dainai ta baita davaria.

⁶Bena hari hekwara taudia bona heitatao taudia na e raka bou ela, hanua pavapavana dekenai, e hereva henia, eto, King Darauese e,

ba mauri hanaihanai! ⁷Basileia ena hekwara taudia, ena lohia, ena heitatao taudia, ena hahealo taudia bona ena hegunalai taudia iboudiai ese lalodia vada e hatamonadia, hanua pavapavana ese taravatu ta baine haginia bona baine ha-aukaia, baineto dina toi-ahui lalodiai taunimانيا iboudiai ese oi pavapava taumu sibomu bae gurimu diba, a ta ese dirava ta eiava tau ta bema guria, vada bae abia, leona kohuana lalonai bae tahoā vareai. ⁸Pavapava e, harihari taravatu ba haginia, bona iha-aukana pepana ai ladamu ba torea, bona basie ha-idaua diba, Mede bona Parasa taudia edia taravatu dalana hegeregerena ai basie hadokoa diba. ⁹Taunabunai, King Darauese ese ladana e torea una taravatu pepana ai.

¹⁰Daniel e diba pepa na e hetore, bona ena ruma ela. Ena ruma atai daiutuna na mai gaba-mauruna haida, Ierusalem italaia ai. Bona dina ta ta ai ia ese nega hatoi tuina e hadaiva, e ġuriġuriva bona ena Dirava e hanamo heniava, vaevae e karava hegeregerena. ¹¹Bona unu tatau na e raka bou ela, Daniel e davaria, ena Dirava vairanai e ġuriġuriva bona e noinoiva. ¹²Bona idia ese hanua pavapavana e raka henia kahi, taravatu e herevalai henia, eto, Pavapava e, oi ese taravatu pepana o torea, ani, oto dina toi-ahui lalodiai taunimانيا iboudiai ese oi pavapava taumu sibomu bae ġurimu diba; a ta ese dirava ta eiava tau ta bema guria, vada bae abia, leona kohuana lalonai bae tahoā vareai. Hanua pavapavana e haere, eto, Hereva vada e auka midimidi, Mede bona Parasa taudia edia taravatu dalana hegeregerena ai basie hadokoa diba. ¹³Bona idia na hanua pavapavana vairanai e haere, eto, Pavapava e vanegai Daniel, Iuda amo e mailaidia taudia ta, ese se kamonia henimumu, bona vada o torea taravatu pepana se badinaiamu, a dina ta ta amo nega hatoi e ġuriġurimu.

¹⁴Unu hereva e kamonia negana ai, hanua pavapavana lalona vada e hisihisi herea, bona lalona e hadaia Daniel ede baine hamauria toma; ia na e hekwarahi ela bona dina e diho, Daniel Ihamaurina totona. ¹⁵Bona unu tatau na hanua pavapavana dekena e raka bou ela, e hereva henia, eto, Pavapava e, ba diba, Mede bona Parasa taudia edia taravatu na iniheto: hanua pavapavana ese e haginiamu taravatuna na ta ese basine ha-idaua diba.

¹⁶Bona hanua pavapavana e hahegani; bona haida ese Daniel e mailaia, leona edia kohua lalonai e tahoā vareai. Hanua pavapavana ese Daniel e hamaoroa, eto, Emu Dirava, o toma henia diho louloumu Diravana, ese baine hamaurimu. ¹⁷Bona nadi ta e mailaia, kohua iduarana e koulaia; bona hanua pavapavana ese ia toana bona ena lohia taudia toadia na una nadi ai e kara, Daniel enai vada e kara ġaudia na ta ese basine ha-idau helaoreana. ¹⁸Bona hanua pavapavana na ena ruma ela, e anivaga rani, lalona ihakeruna ġaudia haida ia dekena asie laohai, bona se mahuta.

¹⁹Daba e kinia, bena hanua pavapavana e tore isi, leona edia kohua e lao henia haraḡa. ²⁰Daniel e atoa kohuana na e raka henia kahi, bena mai ganaganana ida e boi lolo, Daniel e boi henia, eto, Daniel e, Mauri Diravana ena hesiai tauna, emu Dirava, o toma henia diho louloumu Diravana, ese ihamaurimu mai dibana eiava? ²¹Bena Daniel ese hanua pavapavana e haere henia, eto, Pavapava e, ba mauri hanaihanai. ²²Egu Dirava ese ena aneru ta e siaia mai, bena ia ese leona ududia e hakapudia, bena asie hadikagu; badina be ia vairanai lau na asi egu kerere, bona oi vairamu ai danu, pavapava e, lau na asina kara kerere. ²³Bena hanua pavapavana na e moale dikadika, bena e haheḡani, Daniel na kohua lalona amo bae abia lasi. Taunabunai Daniel na kohua lalona amo e abia lasi; bena bero ta ienai asie davaria, badina be h ese ena Dirava vada e abidadama henia. ²⁴Bena hanua pavapavana ma e haheḡani, bena unu Daniel e habadelaia taudia na e mailaidia, leona edia kohua lalonai e tahodia vareai, idia bona natudia bona adavadia danu. Bena dounu moru-dobidia ai, leona ese e daredia, turiadia iboudiai e hakwaidudia patapata.

²⁵Bena King Darauese ese revareva ta e torea, bese idau-idau bona basileia idau-idau bona gado idau-idau taudia iboudiai, tanobada idoinai latanai e nohomu taudia, ediai, eto: Maino na emui ai baine bada. ²⁶Na haheḡanimu, lau ese na lohiaiamu basileiana idoinai lalonai taunimanima na bae heude-heude bona bae gari, Daniel ena Dirava vairanai.

Badina be ia na Mauri Diravana,
e mauri hanaihanaimu;
ena basileia na basie habuaia tari ela bona hanaihanai,
ena siahu na baine hesiriu ela bona dokona.

²⁷Ia na e hahemaurimu bona e herauamu,
toa bona hoa karadia ia ese e karamu,
guba ai bona tanobada ai danu.

Ia ese Daniel vada e hamauria,
leona edia siahu amo.

²⁸Bena hari Daniel ena namo e badava, Darauese ena lohia negana ai, bona Kurese, tau Parasa, ena lohia negana ai.

Daniel ena nihi ta

7 ¹Belesasara, Babulono pavapavana, ena lohia laḡanina gini-gunana ai, Daniel na e nihi, bona mata-hanai ḡaudia haida na kwarana lalonai e hedinarai, ena mahuta patana ai e hekureva negana ai. Bena ia ese nihi sivaraina e torea, bona anina e hahedinarai. ²Daniel eto, Hanuaboi ai na mata hanai bena na itaia, guba laina haniosi ese gadobada e hahurehurea. ³Bena mauri ḡaudia badadia hani na davara lalona amo e dae, ita-itadia na

idau-idau. ⁴Gini-gunana na leona na heto, a mai hanina, ugava hanina na heheto. Bena na itaiava ai na hanina e butudia oho, bena tano ai e haginia tore, aena ruaosi ai e haginia, taunimانيا na heto, bona taunimانيا darana e henia. ⁵Bena mauri ġauna ta ma na itaia, iharuana, bea na heto. E haginia tore, gini-gunana ohena ai, bona uduna ai na rudu turiadia autoi, isena padadiai. Ta ese e hamaoroa, eto, A tore isi, vamu momo bavani. ⁶Una murinai na roha lao, ta ma na itaia, taiga na heto, a manu hanidia hani na doruna ai; bona una mauri ġauna na mai kwarana hani danu; bena lohia siahuna na e henia. ⁷Una murinai, hanuaboi mata-hanidia ai, mauri ġauna ihananina na itaia, mai garina bona mai kudou-hetahana; ia na goada dikadika danu. Isena na auri gaudia, bona bada herea; bena ia ese ġau e aniva, e dare patapatava, bona momoruna na aena amo e moia patapatava. Ia na idau, dia e gunalaiia ġaudia heġereġeredia; ia doana na gwauta. ⁸Doana na haerodia, bena na itaia, doa ma ta idia bogaragidiai e tubu, maraġi-muaġina; bena ia vairanai unu doa gunadia toi e heraga oho. Na itaia danu, una doa na mai matana, tau matana na heto; bona mai uduna, hereva badadia e gwaurai. ⁹Na itaiava ai na

terono haida na hehelai,
 bena ġauka ta na e helai diho;
 ena dabua na kuroka-kuroka, *snow* na heto,
 bona kwarana huina na mamoe huina ġoeva-daena na heto;
 ena terono na lahi hururu-hururudia,
 ava-keikeina na e aramu lahina.

¹⁰ Ia vairanai lahi e aru lasiva,
 sinavai na heto;
 daha daha ese ia isiaina e lao heniva,
 gerebu gerebu na ia vairanai e giniva,
 hahemaoro tauna na e hahemaorova,
 bona buka na e hekehova.

¹¹ Bena hereva badadia, hari doa ese e gwaurai gaudia, daidiai na roha lao. Bena na roho laova ai, hari mauri ġauna na e alaia mase, tau-anina na e habuaia tari, e heni, Iahi ese baine ġolea oho. ¹² Hari mauri ġaudia oredia na edia lohia siahuna na e abia oho, a edia mauri na nega taina e hadaudaua ela bona nega ta. ¹³ Bena hanuaboi mata-hanidia ai na itaia, ta na guba oridia ai ema,
 ia na taunimانيا natuna na heto;
 ia na Gauka dekena ema,
 bena vairanai e hakaua lao.

¹⁴ Bena lohia siahuna e henia,
 bona hairai bona basileia danu,
 bese idau-idau bona basileia idau-idau bona gado idau- idau iboudia
 ese

ia isiaina bae lao heni helaoreana;
 iena lohia siahuna na mia-hanaihanai siahuna,
 basine puki oho ġauna,
 bona ena basileia danu
 ta ese basine habuaia tari.

¹⁵A lau Daniel na laumagu e daure, bona kwaragu mata-hanaidia ese e hagarigu. ¹⁶Bena unuseni ai e giniva taudia ta na raka henia kahi, na nanadaia, ina idoinai anina korikori be dahaka. Taunabunai ia ese e hamaorogu, bona unu ġau anidia e hadibalaigu, eto, ¹⁷Ini mauri ġaudia badadia haniosi na pavapava hahani, tanobada ai bae tore isi. ¹⁸A Herea Mikamika Diravana ena helaġa taudia ese basileia bae abia, basileia na bae ġaunaia hanaihanai, oibe, ela bona hanaihanai.

¹⁹Bena na ura baina diba, hari mauri ġauna ihahanina herevana korikorina be dahaka. Ia na idau, dia oredia iboudiai heġereġeredia. Ia na mai gari-badana; isena na auri bona kahauna na auri labora-labora. Ia ese ġau e aniva, e dare patapatava, bona momoruna na aena amo e moi patapatava. ²⁰Bona doa gwauta kwarana ai herevadia danu, bona una doa ta, e tubu bena ia vairanai doa toi e moru ġauna, mai matana bona mai uduna bena hereva badadi e gwaurai bona ita-itana ese bamona ita-itadia na e hereadiava gauna, herevana. ²¹Lau na roha laova ai, una doa ese helaġa taudia e tuari henidia bona e hadareredia, ²²ela bona Ġauka na ema, bena ia ese hahemaoro e karaia, Herea Mikamika Diravana ena helaġa taudia maorodia e gwaurai; bena negana e gini dae helaġa taudia ese basileia e abia.

²³Taunabunai ia eto, Mauri ġauna ihahanina na iniheto:
 Basileia ihahanina na tanobada latanai baine vara;
 ia na baine idau, dia basileia iboudiai heġereġeredia;
 ia ese tanobada idoinai baine hadonoa,
 baine moia tao, baine hamakohia patapata.

²⁴Unu doa gwauta be pavapava gwauta,
 una basileia lalona amo bae tore isi;
 bona idia muridiai ma ta baine tore isi.
 Ia baine idau, dia unu gunadia heġereġeredia,
 ia ese pavapava tatoi baine hadareredia.

²⁵Ia ese Herea Mikamika Diravana baine gonagonalai,
 bona Herea Mikamika Diravana ena helaġa taudia edia goada
 baine ha-orea;

ia ese nega bona taravatu iha-idaudia daladia baine lalo hata,
 bena ia imana ai bae heni,
 laġani ta bona laġani rua bona laġani kahana ai.

²⁶A hahemaoro tauna ese hahemaoro baine karaia,
 bena iena lohia siahuna bae abia oho,

bae ha-orea bona bae habuaia tari ela bona dokona.

²⁷ Bena basileia bona lohia siahuna,

bona guba idoinai henunai e miamu basileiadia siahudia danu na

Herea Mikamika Diravana ena helağa taudia bae henidia;

edia basileia na mia-hanaihanai basileiana ai bainela,

bona orema mai siahudia iboudiai ese

isiaidia bae lao heni bona bae kamoni henidia.

²⁸ Hereva dokona binai. A lau Daniel egu lalo-hadai ese e hagarigu bona na labora ġuġuru; a ina hereva na lalogo ai na dogoa tao.

Daniel ena nihi iharuana

8 ¹ King Belesasara ena lohia lağanina ihatoina lalonai, lau Daniel na mata hanai lou, nega gunana ai egu ai e kau ġauna e hedinarai murinai. ² Egu mata-hanai ai ġau haida na itadia; na itadia negana ai lau na hanua badana Susa ai, Elam tanona ai; bena mata-hanaigu ai na itaia, lau na Ulai sinavaina isena ai. ³ Lau na roha isi, bena mamoe maruanena ta sinavai isena ai ginina ai na itaia. Ia doana na rua; ruaosi lalata, a ta ese ma ta e hereaia, bona lata-hereana na gabe ai e tubu ġauna. ⁴ Bena na itaia, hari mamoe maruanena na mai daġedaġena ida e heau taiko-taiko, lahara kahana ai bona mirigini kahana ai bona diho kahana ai; mauri ġauna ta se heġereġere ia vairanai baine gini, bona ta se heġereġere iena sياهو amo baine heraua. Ia ese sibona ena ura e karava, bona sibona e heimodaiva.

⁵ Na haeroava ai, nani maruanena ta na itaia, lahara kahana amo ema, tanobada idoinai e hanaia, tano ai se moi kauva; ia na mai doana ta, hedinarai mataka-mataka ġauna, matana ruaosi padadai. ⁶ Ia na ema, hari mamoe maruanena mai doana rua, sinavai isena ai na itaia ġauna, dekenai; bena mai badu ġaraġarana ida e heau henia. ⁷ Lau na itaia, ia ese hari mamoe maruanena e heau henia kahi, bena e badu henia lalodika, e nuaia, doana ruaosi e hakwaidudia. Hari mamoe maruanena na asi goadana ia vairanai baine gini; una ġau ese e nuaia keto tano ai, bena e moia patapata; asi tauna ta ese una mamoe maruanena na ia siahuna amo baine hamauria diba. ⁸ Bena hari nani maruanena na sibona e heaġi dikadika; a ena goada negana ai hari doana badana e kwaidu, bena ia gabuna ai doa hani, hedinarai mataka-mataka ġaudia, e vara, guba laidia haniosi kahadia e tubu henidia.

⁹ Idia ta ena amo doa maragina ta e vara, bena e tubu badabada, diho kahana bona mairiveina kahana bona mai hairaina tanona e tubu henidia. ¹⁰ E tubu badabada ela bona guba oreana; bena hisiu haida na tano ai e tahodia dobi, bena e moidia patapata. ¹¹ Sibona e heaġi, guba oreana lohiana e dae henia; bena ġole-oho boubouna, e heni louloumu ġauna, na iena amo e abia oho, bona ena gabu helaġana na e ġiġia dobi.

¹²Bena orea na ia imana ai e heato, bona gole oho boubouna, e heni louloumu g̃auna, danu, kara havara dainai; hereva momokani na tano ai e henege dobi, bona hari doa e gaukarava bona ena namo e habadaiava. ¹³Bena helaḡa tauna ta gadona na kamoni; bena helaḡa tauna ma ta ese e hereva guna tauna na e nanadaia, eto, Ini mata-hanai g̃audia, g̃ole-oho boubouna, e heni louloumu g̃auna, bona kara havara, gabu e havahuamu gauna, bona gabu helaḡana bona orea na ae-moimoilai g̃audia ai e halaodiamu na bae hesiriu ela bona edena nega ai? ¹⁴Bena ia ese e haere henia, eto, Ela bona adorahi daha-rua sinahu-toi bona daba daha-rua sinahu-toi; bena gabu helaḡana na bae hanamoia lou, oromana korikorina baine abia lou.

¹⁵Lau Daniel ese una mata-hanai na itaia vaitani, bena anina na tahua; bena ta na lau vairagu ai e gini, ita-itana na taunimanima na heto. ¹⁶Bena tau ta gadona na kamoni, Ulai sinavaina isena padadia amo e boiboi, eto, Gabriel e, ina tau na mata-hanai anina ba hadibalai. ¹⁷Taunabunai, ia ese egu gini gabuna e raka henia kahi; bena ia ema negana ai na gari, bena na goru diho. A ia ese e hamaorogu, eto, Taunimanima natuna e, ba diba, una mata-hanai na nega dokona e hahedinalaiamu.

¹⁸Ia dounu e herevava ai, lau na goru-dihogu ai na mahuta hedavauhe; a ia ese e daugu toho, bena e haginigu tore. ¹⁹Ia eto, A itaia, baina hadibamu, badu negana dokona ai dahaka baine vara; badina be nega dokona vada e duanaia negana herevana binai. ²⁰Hari mamoe maruanena o itaia mai doana rua, unu na Media bona Parasa pavapavadia. ²¹Hari nani maruanena na Helene tanona pavapavana; doa badana ia matana ruaosi padadiai na pavapava gini-gunana. ²²Doa ta e kwaidu, bena ia gabuna ai doa hani e tubu anina be basileia hani na iena bese amo bae vara, a iena siahu basie haheḡereḡerea. ²³Edia lohia negana dokona ai, kara havara taudia bae goada ḡuḡuru negana ai, pavapava ta, vaira-auka bona hereva hehunidia anidia mai dibana tauna, baine tore isi. ²⁴Ena siahu baine bada; ia ese hahebua-tari badana baine havaraia, ena g̃aukara ai baine kwalimu, goada tauna bona orea helaḡana taudia na baine habuadia tari. ²⁵Ena dibaka ai, kara koikoi anidia baine habadadia, ia unana henunai, bona lalona ai sibona baine heaḡi. Ia ese hutuma baine habuadia tari taku; lohia edia Lohia danu baine tuari henia, bena baine darere, a dia taunimanima ta imana amo. ²⁶Hari adorahi bona daba sivaraidia mata-hanaina na momokani; a una mata-hanai ba hunia, badina be una na dina hoho vairai herevana.

²⁷Bena lau Daniel taugu na e manori, dina haida na hekure noho, mai goreregu ida. Bena na tore isi, hanua pavapavana ena g̃aukara na karaia; a una mata-hanai dainai lalogu e hekwarahi; bona asina dibaia namonamo.

Daniel ena ġuriġuri

9 ¹Darauese Ahasuero, tau Mede, ese Kaldea basileiana e pavapavaia laġanina gini-gunana ai, ²ena lohia laġanina gini-gunana lalonai lau Daniel buka lalodia amo na diba laġani hida baela ela bona Ierusalem ihavahuna baine guguru, Iehova ena hereva peroveta tauna Jeremia enai e kau heġereġerena; unu laġanidia be hitu-ahui.

³Bena Ġaubada Dirava na haġerea, ġuriġuri ai bona noinoi ai na tahu, mai anivagagu bona mai puse-dabuagu bona mai kahugu ida. ⁴Iehova, egu Dirava, na guria, egu dika na gwaurai hedinarai, nato:

Ġaubada e, Dirava badana bona mai garina, oi ese emu gwauhamata bona emu hebogahisi o hahehisiudiamu, e ura henimumu bona emu haheġani e badinadidiamu taudia ediai. ⁵Ai na vada a kara dika, vada a kara kerere, kara havara bona daġedaġe karadia vada a kara, emu haheġani bona emu taravatu daladia amo vada a raka siri; ⁶emu hesiai taudia, peroveta taudia, oi ladamu ai emai pavapava, emai lohia, senemai bona tano taudia iboudiai e hereva henidia taudia na asia kamoni henidia.

⁷Ġaubada e, kara maoromaoro na oiemu ai, a ai emai ai na hemarai, ina dina ai heġereġerena, Iuda taudia ediai, bona Ierusalem inoholaina taudia ediai, bona Israel idoinai enai, gabu kahikahi taudia bona gabu daudau taudia, vada o luludia lao tanodia iboudiai lalodiai; badina be idia ese oi ihadikamu karadia vada e kara.

⁸Ġaubada e, hemarai na ai emai ai, bona emai pavapava bona emai lohia bona senemai ediai, badina be ai ese vada a kara dika henimu. ⁹Ġaubada, emai Dirava, na mal hebogahisina bona mai dika igwau-taona; badina be ai ese vada a daġedaġe henia ¹⁰bona Iehova, emai Dirava, gadona asia kamoni henia, ena taravatu, ena hesiai peroveta taudla eia amo vairamai ai e atodia taravatudia, asia badinadia. ¹¹Israel idoinai ese emu taravatu vada e tataia utu; vada a raka siri, oi eremu ikamonaina asia ura. Heuduguirai bona gwauhamata helaġana Dirava ena hesiai tauna Mose ena taravatu ai e hetore gaudia, na ai latamai ai vada eme hebubu dobi, badina be ai ese vada a kara dika henia. ¹²Ia ese ena hereva vada e hamomokanidia. ai latamai ai bona ikwaramai taudia latadiai e gwaurai gaudia, hahehisi karana badana na ai latamai ai vada e mailaia; badina be guba idoinai henunai kara ta nega ta ai se karaia, Ierusalem vada e kara henia heġereġerena. ¹³Mose ena taravatu ai e torea heġereġerena ai, ina hahehisi karana idoinai na ai latamai ai vada e kau, ġau tamona Iehova, emai Dirava, asia noi henimu ba lalo namo henimai, emai kara havara amo ba mede kerehai bona emu hereva momokanidia nahuadia baia toho helaoreana. ¹⁴Taunabunai Iehova ese hahehisi karana vada e haheġaeġaea bona latamai ai vada e mailaia; badina be Iehova,

emai Dirava, na maoromaoro, vada e kara karadia iboudiai lalodiai, bona ai ese ia erena asia kamonaia.

¹⁵Ĝaubada e, emai Dirava e, oi ese emu bese taudia na Aigupto tanona amo o hakaudia Lasi, mai imamu goadana ida, bona ladamu vada o habadaia, ina dina ai heĝereĝerena; a harihari ai ese vada a kara dika, vada a kara havara.

¹⁶Ĝaubada e, emu kara maoromaorodia iboudiai heĝereĝeredia ai, emu badu bona emu lalo-dika na emu hanua Ierusalem, emu ororo helaĝana, amo baine siri; badina be emai kara dika bona senemai edia kara havara daidiai, Ierusalem bona oiemu bese na gwaurai-gwaurai herevana ai vada e hahelao, e ĝeĝemai dae taudia iboudiai bogaragidiai. ¹⁷Taunabunai, emai Dirava e, emu hesiai tauna ena ĝuriĝuri bona ena noinoi ba hakala henidia, bona oi sibomu daimu ai, Ĝaubada e, oi vairamu ese emu gabu helaĝana, vada eme vahu gabuna, baine hadiaria.

¹⁸Egu Dirava e, laiamu a hakala, a kamoni, matamu a hapapa, ĝaĝaemai ai ba itamai, bona oi ladamu e nemailaia hanuana ba itaia. Badina be emai noinoi na oi vairamu ai e daemu, dia ai emai kara maoromaoro daidiai, a oiemu hebogahisi badana dainai. ¹⁹Ĝaubada e, a kamoni; Ĝaubada e, emai dika ba gwau tao; Ĝaubada e, ba lalomai, ba kara; egu Dirava e, basio halahe, oi sibomu daimu ai, badina be emu hanua bona emu bese na oi ladamu e hahenemailaia.

Peroveta herevadia

²⁰Egu hereva bona egu ĝuriĝuri lalodiai egu kara dika bona egu bese Israel edia kara dika na gwaurai hedinarai, bona Iehova, egu Dirava, na noinoi heniava, egu Dirava ena ororo helaĝana dainai; ²¹bena, ĝuriĝuri dounu na gwauraiava ai, hari tau Gabriel, mata-hanai ai na itaia guna tauna, na dekegu e roho mai haraga, adorahi boubouna negana ai. ²²Ia na ema, e hereva henigu, eto, Daniel e, aonega bona lalo-parara batna henimu totona vada na hedinaraimu. ²³Emu noinoi matamana ai hereva ta e lasi, bena ihamaorolaimu totona vada nama, badina be oi na e lalokau henimu badamu; taunabunai, hereva ba haeroa, bona matahanai anina ba diba.

²⁴Laĝani hitu nega hahitu-ahui be vada e gwauraidia, emu bese bona emu hanua helaĝana latadiai, kerere iha-orena, kara dika ihadokona, kara havara irohodia, baine mia hanaihanai kara-maoromaorona imailaina, matahanai bona peroveta tauna ihamomokanina bona helaga-hera gabuna ihorona totodia. ²⁵Taunabunai ba diba, lalomu danu baine parara, Ierusalem ihanamo-louna bona ihaginina herevana baine hedinarai negana ela bona lohia ta, e horoa tauna, bainema na pura hitu. Bena pura tauratoi-ahui rua lalodiai bae haginia lou, mai ariarana bona mai iĝeĝe-ahuna koupona, a hekwakwanai momo negana ai. ²⁶Bena

unu pura tauratoi-ahui rua muridiai, e horoa tauna na bae negea daure, ġau ta ienai basine mia; bona bainen-a lohiana ena oreā taudia ese hanua bona gabu helaġana bae habuadia tari. Utu-utu ese baine ha-orea, bona tuari do baine hesiriu ela bona dokona. Hahevahu karadia vada e gwaurai hata. ²⁷Bena ia ese hutuma ida bae hegwau hamata heheni, gwauhamata aukana ta, ela bona pura ta baine ore. Pura kahana ai ia ese boubou bona herahia karadia baine hadokodia, bona ġau dika-rohorohona hanina latadiai hahevahu tauna ta bainema, ela bona vada e gwauraia hata dokona negana na hahevahu tauna latanai baine hebubu dobi.

Daniel ena mata-hanai Tigris sinavaina isena ai

10 ¹Kurese, Parasa pavapavana, ena lohia laġanina ihatoina ai, hereva ta e hedinarai Daniel (ladana ta na Beletesasara) enai. Hereva na momokani, tuari badana herevana. Hereva anina vada e dibaia, bona matahanai anina danu.

²Unu dinadia ai, lau, Daniel, lalogu e hisihisiva pura toi lalodiai.

³Aniani gaihodia asina ani, vamu eiava vine ranuna na udugu ai asie vareai, bona dehoru ai asina hedahu, ela bona unu pura ġuġurudia toi.

⁴Hua gini-gunana dinana iharuahui-hanina ai, sinavai badana, ladana Tigris, isena ai na giniva negana ai, ⁵lau na roha isi, tau ta na itaia, ena hahedoki na dabua aukana ġaua bona ena gaba ġauna na Ufasa *gold*-na. ⁶Tau-anina na berulio nadina na heto; vairana ita-itana na kevaru; matana na kede hururu-hururudia na heheto, imana bona aena na auri labora-labora hmorena na heto, bona erena na hutuma eredia na heto.^a

⁷Lau, Daniel, sibogu ese mata-hanai na itaia, badina be bamogu ese asie itaia, to gari ese e butudia tao, bena e heau, bae komu totona.

⁸Taunabunai, hu na sibogu na noho, una mata-hanai badana na itaia, bena goadagu vada e ore; vairagu hairaina e idau herea, bona goadagu taina dia mia. ⁹Bena erena na kamoni. Erena na kamoni negana ai, lau na goru parapara tano ai, na mahuta hedavauhe.

¹⁰Bena ima ta ese e daugu toho, bena na hetao isi, tuigu ai bona imagu ai, mai heude-heudegu ida. ¹¹Ia ese e hereva henigu, eto, Daniel e, e lalokau henimu badamu taumu, na hamaorolaimumu herevadia nahuadia ba toho, ba gini tore, badina be ina harihari oi dekemu vada e siaigu mai. Ina hereva e hamaorolaigu lalonai, na gini tore mai heude-heudegu ida.

¹²Bena ia ese ma e hamaorogu, eto, Daniel e, basio gari, badina be laloparara o tahua matama bona emu Dirava vairanai sibomu o hahemanau dinana amo, emu hereva na vada e kamoni, bena emu hereva daidiai vada nama. ¹³Parasa basileia lohiana ese dina ruahui-ta e ginigu shu;

^a 10.6 Berulio na herahera nadina ta ladana.

benā Mikael, lohia badana ta, na ikahagu totona ema, taunabunai unuseni ai na rakatania, Parasa basileia lohiana ida. ¹⁴Bena nama, dina gabedia ai dahaka dahaka baine vara emu bese taudia ediai baina hadibamu totona. Badina be mata-hanai na nega vaira ġauna.

¹⁵Ini hereva e hamaorolaigu negana ai, tano na igo henia, asi reġereġegu na noho. ¹⁶Bena ta, ita-itana na taunimanima natudia ta na heto, ese bibinagu e daudia toho. Bena udugu na kehoa, na hereva. Vairagu ai e giniva tauna na hamaoroa, nato, Egu lohia e, na mata hanai dainai, hisihisi na egu ai vada e kau, bona egu goada vada e ore. ¹⁷Egu lohia emu hesiai tauna na egu lohia ida ede baita hereva-hereva toma? Badina be harihari goadagu taina na dia mia, bona laġagu taina danu dia mia.

¹⁸Una murinai ta, ita-itana na taunimanima na heto, ese e daugu toho, e hagoadagu. ¹⁹Ia eto, E lalokau henimu badamu taumu e, basio gari, maino na emu ai baine mia; ba goada, ba haheauka. E hereva henigu negana ai na goada, bena nato, Egu lohia e, a hereva, badina be vada ome hagoadagu. ²⁰Bena ia eto, Oi dibamu dahaka dainai dekemu vada nama a? A harihari baina lou lao, Parasa lohiana baina tuari henia; baina hadarerea, bena Helene lohiana bainema. ²¹A baina hamaoromu, hereva momokanina bukana ai ede e hetore tomamu; asi tauna ta ohegu kahana ai e tuarimu, emu lohia Mikael mo sibona.

11 ¹A lau be Darauese, tau Mede, ena lohia laġanina gini-gunana ai na tore isi, baina hamomokania bona baina hagoadaia totona.

Mirigini kahana pavapavana bona diho kahana pavapavana

²Harihari lau ese hereva momokanina baina hahedinarai henimu. A itaia, pavapava tatoi ma bae tore isi Parasa ai, bona ihahanina ena taġa ese idia tatoi edia taġa baine hereadia; bena ena taġa dainai baine goada negana ai, ia ese taunimanima iboudiai lalodia baine ani, Helene basikiana bae hadikaia. ³Bena pavapava mai siahuna ta baine tore isi; ia baine lohia mai siahu-badana ida, bona ena ura heġereġerena ai baine karaia. ⁴Baine tore isi murinai, ena basileia baine heġiġi rohoroho bona baine hehari, guba laidia haniosi ediai; ia garana basie abia, bona ta ese basine lohiaia mai siahuna ida, iena lohia siahuna heġereġerena; badina be ena basileia baine heraġa oho, idaudia haida ese bae abia, dia idia:

⁵Bena diho kahana pavapavana baine goada, a iena lohia tauna ta ese goada ai baine hereaia, bena ena lohia siahuna na baine herea. ⁶Laġani haida baela, bena bae heroheaino; bena diho kahana pavapavana natuna hahinena na mirigini kahana pavapavana dekena bainela, maino ihavarana totona; a una hahine imana siahuna na basine mia, bona una tau mai natuna ida basie noho daudau; bena una hahine na baine heabi mauri, ia bona ena hesiai hahinedia bona natuna bona adavana.

⁷Unu negadia ai, una hahine ramuna amo e tubu rigidia ta na una tau gabuna ai baine tore isi, bena ia ese tuari oreana baine tuari henia, mirigini kahana pavapavana ena ruma aukana ai baine dae kau, baine ala-ala henidia, bena baine kwalimu. ⁸Edia dirava bona edia kaivakuku, e hahetaridia gaudia, bona edia sdver bona *gold* gaudia, gau namo-hereadia, danu baine abidia, Aigupto baine laohaidia; bena laḡani haida lalodiai ia ese mirigini kahana pavapavana basine tuari henia. ⁹Bena hari mirigini kahana pavapavana na diho kahana pavapavana ena tano lalonai baine raka vareai, a ma baine lou, ena tano korikori bainela.

¹⁰Bena ia natuna mamaruanedia bae tuari, tuari oreadia badadia momo bae haboudia, bena bae aru lao, bae utua dae, bae hanai, tuari ma bae laohaia ela bona ena ruma aukana. ¹¹Bena diho kahana pavapavana na mai baduna ida baine raka lasi, mirigini kahana pavapavana baine tuari henia; ore a bada-hereana baine haboua, a una ore na ia imana ai baine heato. ¹²Bena hari ore bada-hereana baine darere negana ai, ia lalona baine heagi, bena gerebu gerebu baine hadareredia, to basine kwalimu. ¹³Badina be hari mirigini kahana pavapavana ese hutuma ma baine haboudia, ina hutuma ese e haboua guna oreana na baine hereaia; bena laḡani haida baela murinai ia na ma baine tore isi, mai ena tuari oreana badana bona ena kohu momo herea ida.

¹⁴Unu negadia ai hutuma ese diho kahana pavapavana bae tuari henia, bona emu bese korikorina bogaragina amo daḡedaḡe taudia haida bae tore isi, mata-hanai anina ihavarana totona; to basie kwalimu. ¹⁵Bena mirigini kahana pavapavana na bainema, tano baine larebaia heḡeḡe, bena hanua auka-hereana ta na baine abia. Bena diho kahana tuari oreadia na basie gini tutuka, oibe, ena tuari diba-herea taudia na basie gini tutuka, badina be edia goada basine heḡereḡere. ¹⁶A baine tuari henia tauna ese sibona ena ura heḡereḡerena baine karaia; tau ta ia vairanai basine gini diba. Ia na tano herea-daena ai baine gini; idoinai na ia siahuna lalonai baine mia. ¹⁷Ia vairana baine ha-aukaia, ena basileia goadana idoinai ida bainema, herohemaino herevadia baine mailai, bona karadia baine kara. Hahine herea-daena baine henia, basileia ihabuatarina helaoreana; a anina basine vara bona basine durua. ¹⁸Gabeamo ia talaina na kone tanodia baine henidia, bena momo herea baine abidia. A tuari lohiana ta ese ena hekokoroku baine laoa ahu; momokani, ma baine haloua ia latanai. ¹⁹Bena talaina na ena tano korikori gabudia aukadia ma baine heni; a baine hetutuhi, baine hekida diho, bena ta ese basine davaria.

²⁰Bena tau ta baine tore isi, ia gabuna ai baine gini; una tau ese heaiva monina igwauraina tauna ta baine siaia lao, ena basileia kahadia herea-daedia iboudiai lalodiai; a dina hida hona baela, bena haida ese bae alaia, dia badu ai bona dia tuari ai. ²¹Ia gabuna ai bonegita tauna ta e

tore isi, pavapava dagina asie henia tauna; ia na baine gini lasi kava, boga-alaga herevadia amo basileia na baine abia. ²²Tuari oreadia na ia vairanai bae hedaro oho, bae karoho rohoroho, bona heroheimaino lohiana danu. ²³Ia ida bae heroheimaino negana amo, ia na baine kara koikoi; bena orea maragina ida baine goada. ²⁴Tano ena taġa-herea gabudia ai baine hedinarai kava, bena tamana bona tubuna asie kara karadia baine kara, dadidadi bona hena kohudia bona ġau idau-idau na bogaragidiai baine ġiġidia rohoroho. Gabu aukadia ihabua-taridia daladia baine lalo hata, a basine maivalo. ²⁵Bena tuari oreana badana amo ena sياهو bona ena haheauka baine habadadia, diho kahana pavapavana ihadikana totona; bona diho kahana pavapavana danu tuari oreana bada-hereana bona goada-hereana amo baine tuari; a basine gini tutuka, badina be haida ese ia ihadikana totona bae henega bou. ²⁶Ena aniani gaiho-lia bae ani taudia ese danu bae hahekwakwanaia; ena tuari oreana baine hedaro oho, bona hutuma na ala-ala ai bae hekida diho. ²⁷A hari pavapava raruosi be kara dika bae uralai bada; pata tamona ai koikoi herevadia bae gwaurai, a anidia basie vara; badina be dokona be dohore, vada e gwauraia guna negana ai mo. ²⁸Bena ena tano korikori baine lou henia, mai taġana ida; a lalona ese heroheimaino helaġana baine dadaraia. Ena ura baine karaia, bena ena tano korikori baine lou henia.

²⁹E gwauraia guna negana ai ia ma baine lou lao, diho kahana; a ina negana ai nega gunana heġereġerena ai basine vara lou. ³⁰Badina be Kitim lagatoidia na ia ihadikana totona bae mai henia; bena ia na baine gari, baine raka oho, mai baduna ida baine lou lao, heroheimaino helaġana ihadikana karadia baine kara. Baine lou lao, heroheimaino helaġana e rakataniamu taudia baine kamoni henidia. ³¹Iena tuari oreadia haida bae hedinarai, dubu bona ruma aukana bae hamirodia, bona ġole-oho boubouna, e heni louloumu ġauna, bae abia oho, bona ġau dika-rohorohona, hahevahu ġauna, bae haginia. ³²Heroheimaino e hadikaiamu taudia na boga-alaga herevadia amo baine dibaganidia; a edia Dirava dibadia taudia na bae gini tutuka-tutuka, bona edia kara bae kara. ³³Aonega taudia hahidaosi taunimanima bogaragidiai e nohomu ese hutuma na bae hadibadibadia; ġau tamona idia na dare bona lahi hururu-hururuna bona abi-mauri bona dadidadi amo bae dika, dina haida lalodiai. ³⁴Bae dika negana ai, idia ese hekaha taina bae davaria. Hutuma na ediai bae tao, mai edia boga-alaga herevadia ida; ³⁵aonega taudia haida bae hekida diho, ihanamodia bona ihaġoevadia bona ihakurokurodia totona, ela bona nega dokona, badina be vada e gwauraia guna negana na do se kau.

³⁶Hanua pavapavana ese ena ura heġereġerena baine karaia; sibona baine heimodai, sibona baine heaġi, dirava iboudiai daediai, bona hoa herevadia baine gwaurai, dirava edia Dirava latanai. Namona baine

hesiriu, ela bona badu baine guguru; badina be vada e gwawaia hata karana do baine hekara. ³⁷Senena edia dirava eiava hahine e lalokau heniamu diravana na basine kamoni henidia; bona dirava idauna ta basine kamoni henia, badina be sibona baine heimodai, dirava iboudiai daediai. ³⁸Idia gabudia ai ia ese gabu aukadia diravana baine imodaia; senena asi dibadia diravana na goW bona *silver*, dava-bada nadidia bona davabada herahia gaudia, amo baine imodaia. ³⁹Gabu auka-hereadia baine hadareredia, dirava idauna ta ena hekaha dainai; bae abiabiraia taudia na ia ese baine imodaidia bada. Ia ese hut uma ilohiadia ai baine halaodia, bona dava bagunai tano baine haria.

⁴⁰Nega dokona ai, diho kahana pavapavana ese baine tuari henia; a mirigini kahana pavapavana ese baine heau henia, koe-hirihiri na heto, mai ena kariota bona ena hosi-gui taudia bona ena lagatoi momo ida; tano haida baine lao henidia, baine ha-utudia dae, ma baine hanai. ⁴¹Tano herea-daena lalonai baine kau. Gerebu gerebu bae hekida diho, a ini na id imana amo bae roho mauri: Edom bona Moab bona Amono besena kahana badana. ⁴²Tano idau-idau ihadikadlia totona ia ese imana baine toia roro; Aigupto tanona danu basine roho mauri. ⁴³Aigupto ena dava-bada gaudia, *gold* bona *silver* gaudia bona gau namo-hereadia iboudiai, biagudia ai bainela; bena Libia bona Etiopia taudia ese ia bae gavaia. ⁴⁴A sivarai haida mairiveina kahana bona mirigini kahana amo baema, bae hagara; bena ia na mai badu-garagarana ida baine raka lasi, hutuma baine aladia ore bona baine habuadia tari helaoreana. ⁴⁵Ena kalaga herea-daedia na davara bona ororo helašana mai hairaina padadai baine haginidia; gau tamona ena doko negana baine kau, una negana ai ta ese basine kahaia.

Nega dokona

12 ¹Una negana ai Mikael, emu bese ireguna lohiana badana, baine tore isi. Hekwakwanai negana ta baine vara; unuhetomana na nega glmadia ta ai se vara, basileia e hematama negana amo ema bona hari ela bona una nega baine kau. A una negana ai emu bese taudia na bae rauadia, buka ai ladadia vada e hetore taudia iboudiai. ²Tano gahuna ai e mahutamu taudia hutuma na bae noga, haida mauri hanaihanai enai, ma haida hemarai bona hedadarai hanaihanai enai. ³Bena aonega taudia na bae diari, guba kiama-kiamana na heto, bona hutuma kara maoromaoro dalana lalonai bae hakaudia vareai taudia na bae diari, hisiu na heheto, ela bona hanaihanai. ⁴A oi, Daniel, hereva ba hunidia, bona buka ba koua kunuka-kunuka, ela bona dokona negana. Hutuma na bae heau lao heau mai, bona lalo-parara bae habadaia.

⁵Bena lau, Daniel, na roha lao, tatau rarua ginidia ai na itadia, ta sinavai inikahana ai bona ta sinavai unukahana ai. ⁶Bena dabua aukana

e hahedokilaia bona sinavai ranudia daediai nohona tauna na nanadaia, nato, Nega ede daudauna bainela ela bona ini hoa karadia dokodia. 7Bena dabua aukana e hahedokilaia bona sinavai ranudia daediai nohona tauna ese imana idibana bona laurina amo guba e dudui henia; bena na kamoni, ia na e noho hanaihanimu Diravana ladana ai e gwau hamata, laḡani ta bona laḡani rua bona laḡani kahana baela, bena bese helaḡana ena siahu igigi-rohorohona baine ore negana ai, ini ḡau iboudiai anidia bae vara. 8Hereva vada na kamoni, to lalogu se parara. Bena lau nato, Egu lohia e, ini ḡau amo dahaka baine vara? 9Ia eto, Daniel e, emu dala ai a raka lao; badina be hereva vada hehehuni, vada e hekou kunuka-kunuka, ela bona dokona negana. 10Hutuma na bae haheḡoeva, bae hahekurokuro, bae ḡoeva dae; a kara dika taudia do bae kara dika. Kara dika taudia ta lalona basine parara, a aonega taudia lalodia bae parara. 11Bena ḡole-oho boubouna, e heni louloumu gauna, baine heabi oho, bona ḡau dika-rohorohona, e hahevahumu ḡauna, bae haginia, negana amo dina daha-ta sinahu-rua taurahanita-ahui do baela. 12Baine henari noho ela bona dina daha-ta sinahu-toi toi-ahui ima bae ore tauna na namo. 13A emu dala ai ba raka ela bona dokona, bena oi na do ba laḡani, bona doko dinadia ai na vada e gwaurai henimu gabuna ai do ba gini.

HOSEA

Hosea adavana bona natuna

1 ¹Ina na Iehova ena hereva, Hosea Be-eri enai e kau herevana, Iuda pavapavadia Usia bona Iotam bona Ahasa bona Hesehia bona Israel pavapavana Ieroboam Ioasa edia nega ai.

²Iehova ese Hosea uduna amo e hereva matama negana ai, Iehova ese Hosea e hamaoroo, eto, Aola, ariara hahinena ta bavadavaia, bona ariara memerodia ba havaradia, badina be ina tano taudia e lebulebu hereamu, Iehova irakatanina ai.

³Taunabunai ia na ela, Gomere, Diblaimi natuna hahinena, e abia; bena hahine na e rogorogo, natuna maruanena ta e abia.

⁴Iehova ese e hamaoroo, eto, Ladana ba nemaia Iesrele; badina be asi vanahana lau ese Iehu iduhuna davana baina henia, Iesrele rarana dainai, bona Israel iduhuna basileiana baine ha-orea. ⁵Una dina ai Israel ena peva baina hakwaidua, Iesrele kourana ai.

⁶Hahine na e rogorogo lou, natuna kekenina ta e abia. Iehova ese Hosea e hamaoroo, eto, Ladana ba nemaia “Se bogaia hisimu”; badina be ina murinai lau ese Israel iduhuna taudia basina bogadia hisi, bona edia dika basina gwau tao, lasi ona lasi vaitani. ⁷A Iuda iduhuna taudia baina bogadia hisi; lau Iehova, edia Dirava, sibogu ese baina hamauridia, dia peva eiava dare eiava tuari eiava hosi eiava hosi-gui taudia amo.

⁸“Se bogaia hisimu” ese sinana ratana e rakatania murinai, hahine na ma e rogorogo lou, bena mero ta ma e abia. ⁹Bena Iehova eto, Ladana ba nemaia “Dia lauegu bese”; badina be umui na dia lauegu bese bona lau na dia emui Dirava.

¹⁰Gau tamona, Israel taudia na bae hutuma, kone mirina na heto, basie hahetohodia bona basie duahidia diba gauna. E hamaorodia “Umui na dia lauegu bese” gabuna ai, bae hamaorodia, baeto “Mauri Diravana natuna verina”. ¹¹Bena Iuda taudia bona Israel taudia na bae hahebou, ikwaradia tauna tamona bae gwauraia hidi. Bena tano amo bae dae lao, badina be Iesrele ena dina baine bada.

Iehova ena uraheni ena gwau-edeede besena enai

2 ¹Tadikamamui ba hamaorodia, baoto “Egu bese”, bona taihumui ba hamaorodia, baoto “Hebogahisi vada e davaria”.

- 2 Sinamui ba noia,
 badina be ia na dia lau adavagu,
 bona lau na dia ia adavana;
 ba noia, ena ariara karadia na vairana amo baine atodia siri,
 bona ena heuda-hanai ratana padadia amo;
- 3 ena dabua iboudiai baina tapusi oho
 ena vara dinana ai e ga ae hegeregerena ai baina halaoa,
 tano gāgaena bona tano kaukauna hegeregerena ai baina halaoa,
 bona ranu-mase amo baina alaia na garina.
- 4 Ia natuna danu basina bogadia hisi,
 badina be idia na ariara natudia.
- 5 Badina be sinadia ese ariara karadia vada e kara,
 e havaradia hahinena ese hemarai karadia vada e kara.
 Badina be ia eto: E ura henigumu taudia muridia amo bainala,
 idia ese aniani bona ranu e henigumu,
 egu mamoe huina bona egu varo aukana,
 egu dehoru bona egu inuina gāuna danu.
- 6 Taunabunai au ginigini amo baina maḡua ahu,
 ia ilao-ahuna maḡuna baina haginia,
 bena ena dala basine davaridia diba.
- 7 E ura heniamu taudia na baine gavadia,
 to basine lasidia tao;
 baine tahudia,
 to basine davaridia.
 Bena baineto: Lau na bainala,
 adavagu gunana baina lou henia,
 badina be una negana ai egu noho na namo,
 a harihari egu noho na dika.
- 8 Ia na asi dibana,
 uit bona vine ranuna bona dehoru na
 lau ese na henia;
silver be lau ese na henia momomomo,
 bona *gold* danu, Baal e henia gāuna.
- 9 Taunabunai, egu uit baina abia lou, ena nega ai,
 bona egu vine ranuna danu, ena hua ai;
 egu mamoe huina bona egu varo aukana,
 ia ihadabulaina gāudia,
 baina abidia oho.
- 10 Harihari lau ese baina hahemaraia,
 e ura heniamu taudia vairadiai;
 ta ese basine harohoa mauri,
 lau imagu nuana amo.

- 11 Ena moale idoinai baina hadokoa,
 ena aria, ena hua matamatadia bona ena dina helaḡadia,
 bona e gwaurai guna ariadia iboudiai danu.
- 12 Ena vine bona ena suke audia,
 e herevalaidia, eto “Lau davagu bini
 e ura henigumu taudia ese e henigu” ḡaudia na
 lau ese baina havahudia;
 uda ai baina halaodia,
 bena uda boromadia ese bae anidia.
- 13 Baal edia aria dinadia e badinadia dainai,
 lau ese baina hahisia;
 unu dinadia ai muramura mai bonana e gabu henidia,
 ena vaḡivaḡi bona ena herahera nadidia e heralai,
 e ura henia taudia muridia amo ela,
 a lau e lalogu boio.
 Iehova na e herevamu.
- 14 Taunabunai, a itaia, baina ha-uraia,
 tano ḡaḡaena ai baina hakaua lao,
 lalokau herevadia amo baina hereva henia.
- 15 Unuseni ai ena vine imeadia baina henia,
 bona Akoro Kourana na helaro iduarana ai baina halaoa.
 Unuseni ai danu ia na baine haere, ulatona negana ai heḡereḡerena,
 Aigupto tanona amo e raka lasi negana ai heḡereḡerena.
- 16 Iehova na e tomu, Una dina ai ba gwauraigu “Lau adavagu”, basio
 gwauraigu lou “Egu Baal”. 17 Badina be Baal ladadia na uduna amo baina
 abidia oho, ladadia basine hato lou. 18 Una dina ai baina haherohemui
 maino, umui bona uda boromadia bona atai manudia bona tano ai e raumu
 ḡaudia; bona peva, dare, tuari na tano ai baina hadokodia; bena mai
 mainomui ida ba hekure diba. 19 Maohenigu ai baina halaomui ela bona
 hanaihanai, oibe, maohenigu ai baina halaomui, kara maoromaoro ai bona
 hahemaoro ḡoevaḡoeva ai, lalokau ai bona hebogahisi ai. 20 Heabidadama
 ai maohenigu ai baina halaomui; bena Iehova vada ba dibaia.
- 21 Iehova na e tomu: Una dina ai guba baina haere henia, bena guba ese
 tanobada baine haere henia; 22 tanobada ese uit bona vine ranuna bona
 dehoru baine haere henidia, bena idia ese Iesrele bae haere henia; 23 tano
 ai ia baina hadoa lauegu. Bena “Se bogaia hisimu” na baina bogaia hisi;
 bona “Dia lauegu bese” baina hamaoroa, bainato “Oi na egu bese”, bona
 ia baineto “Oi na egu Dirava”.

Hosea bona heuda-hanai hahinena

3 1 Iehova ese ma e hereva henigu, eto, Ma baola, tau ta ese e
 eno henia bena ia ida e heuda hanai hahinena na ba ura henia,